

MATT. CLUB. 2.

SCS, MC, 2



HISTOIRE
DE LA GUERRE D'ECOSSE.

+

HISTOIRE DE LA GUERRE D'ECOSSE:

PENDANT LES CAMPAGNES

1548 ET 1549.

PAR JEAN DE BEAUGUÉ.



RÉIMPRIMÉ À EDIMBOURG :

M.DCCC.XXX.



PRESENTED
TO THE MEMBERS OF
THE MAITLAND CLUB

BY
WILLIAM SMITH.

THE MAITLAND CLUB.

JUNE, M.DCCC.XXX.

THE EARL OF GLASGOW.

[PRESIDENT]

ROBERT ADAM, ESQ.

ROBERT AIRD, ESQ.

JOHN BAIN, ESQ. [TREASURER]

5 JOSEPH BAIN, ESQ.

ROBERT BELL, ESQ.

THE MARQUIS OF BUTE.

LORD JOHN CAMPBELL.

JOHN D. CARRICK, ESQ.

10 HENRY COCKBURN, ESQ.

JAMES DENNISTOUN, ESQ.

JOHN DILLON, ESQ.

JAMES DOBIE, ESQ.

RICHARD DUNCAN, ESQ.

15 JAMES EWING, ESQ. [VICE-PRESIDENT]

KIRKMAN FINLAY, ESQ.

JOHN FULLARTON, ESQ.

JAMES HILL, ESQ.

LAURENCE HILL, ESQ.

20 JOHN KERR, ESQ.

THE MAITLAND CLUB.

- R. A. KIDSTON, ESQ.
G. R. KINLOCH, ESQ.
DAVID LAING, ESQ.
JOHN GIBSON LOCKHART, ESQ.
25 ALEXANDER MACDONALD, ESQ.
WILLIAM MACDOWALL, ESQ.
JOHN W. MACKENZIE, ESQ.
JAMES MAIDMENT, ESQ.
J. H. MAXWELL, ESQ.
30 ANDREW M'GEORGE, ESQ.
DONALD M'INTYRE, ESQ.
ALEXANDER M'NEILL, ESQ.
WILLIAM MEIKLEHAM, ESQ.
W. H. MILLER, ESQ.
35 WILLIAM MOTHERWELL, ESQ.
EDWARD PIPER, ESQ.
ROBERT PITCAIRN, ESQ.
J. C. PORTERFIELD, ESQ.
HAMILTON PYPER, ESQ.
40 P. A. RAMSAY, ESQ.
WILLIAM ROBERTSON, ESQ.
SIR WALTER SCOTT, BARONET.
JAMES SMITH, ESQ.
JOHN SMITH, ESQ.
45 JOHN SMITH, ESQ.
WILLIAM SMITH, ESQ.
GEORGE SMYTHE, ESQ.
JOHN STRANG, ESQ.
SIR PATRICK WALKER, KNIGHT.
50 JOHN WYLIE, ESQ. SECRETARY
-

PREFACE.

THE Work which is now presented to the Members of the Maitland Club, it is presumed, will form an interesting, as well as valuable contribution, to the historical literature of Scotland. It relates to one of the most important and stirring periods in the history of this country—that immediately preceding the dawn of the Reformation, when the kingdom was divided by the interests of two contending parties, the one supported the cause of England, and of the new religion; the other, the Catholic clergy, and the friends of the old religion, busied as they imagined to maintain its independence, invoked, and obtained the aid of France. The expedition which was sent over by Henry II., in consequence of the appeal made to him by the party attached to the Catholic religion, and opposed to the usurping power of England, was placed under the command of M. de Dessé, an officer of ability and experience, and landed in Scotland in Spring 1548. M. de Beaugue, the historian of the campaigns in which M. de Dessé, and the French army were engaged, seems to have accompanied the

expedition in no other character, than as the personal friend of its commander, and accordingly appears to have returned with him again to France, when he was replaced in June 1549 by M. de Thermes. The work has been long known to all, who have had occasion to examine the history of Scotland during the period of which it treats, to contain a faithful and interesting narrative of many important events, which occurred during the time the author was in Scotland, and of which he was himself an eye-witness. It was printed by the author at Paris in 1556, several years after his return, and subsequently to the death of his friend M. de Dessé, as appears from the dedication to Monseigneur Montmorency. It is perhaps worthy of remark, that, although there is only one edition of the work, copies of it are known bearing three different *imprints*, each of them dated 1556, as stated in the note below,* and are essentially the same book. This may be explained in the following way,—each of the three booksellers, whose names appear in the different imprints, having acquired a certain number of copies of the book, seems to have printed a new title with his own name, and affixed it to those sold by himself. This practice was very common, and many instances might be adduced

* The copy of the work followed in printing, as will be seen by the facsimile of the old title-page, bears the imprint of Gilles Corrozet. The second imprint is as follows. "A Paris, pour Estienne Groulleau, libraire demeurant en la rue neufue nostre Dame, à l'image saint Ian. 1556. Avec privilege du Roy." The third reads, "A Paris, pour Vincent Sertenas, tenant sa boutique au Palais, en la gallerie de la chancellerie & en la rue Neufue nostre Dame, a lenseigne saint Ian l'Eangeliste. 1556. Avec Privilege du Roy." The *colophon* in all the copies, it may be mentioned, is the same.

of works printed in England at the same period, occurring with similar variations of the *imprint*.

Dr. Abercromby, the author of the *MARTIAL ACHIEVEMENTS OF THE SCOTS NATION*, published in 1707 a translation of the original work, but in so unsatisfactory a style, and in such a form, as do not at all comport with the present taste in printing. To this translation he prefixed a very long preface, the only parts of which, that appear worth being presented here, are those included in the following extracts.

‘ The Author of the following Sheets was a Foreigner ; ’tis now 151 years since he wrote this part of our History ; And I thought I should oblige the present Age, by letting them know, what a People we were in the former, and what a Figure we then made in the World, in the Judgment of Foreigners. He was also an Eye-Witness to what he Relates ; and for this Reason, I humbly conceive, the Accounts he gives of us to his Country-men, must needs be diverting, especially at this Distance of Time. There is an agreeable Variety of Matter in the Book, and a more particular and accurate Detail of Things, than is to be met with in any of our own Historians. Buchanan, no doubt for some good Reasons of his own, does not bestow half a Sheet of Paper upon all the Military Performances of the Campaigns mention’d in the Title Page ; and yet there were Battles fought, Sieges carry’d on, Fortresses taken, Armies and Fleets defeated, Countries o’er-run, and Stratagems of War invented and executed, equal perhaps to any that are extant upon Record. Here a handful of Men are coop’d up on all hands by huge Armies, and yet make a Shift to escape ; there unequal Numbers engage, and the Victors bring off the Field more Prisoners than they had Hands to Seize them. In some Places, the Vertues shine in their full Lustre ; and elsewhere, Vice is fet out in its Native Drefs : But what, in my opinion, cannot fail to take, is, that the Theatre, on which these various Parts were acted, is in our Eye ; and we cannot look about us, without seeing the Scene of some notable Exploit.’ [Pp. iii. iv.]

‘ The next Spring 1548, Mr. de Dessé was sent to our Relief, and you have in

the following Sheets a distinct Account of his and our Exploits till the Month of June of the succeeding Year 1549. I shall only observe in this place, that the Author is very much out when he tells us, that my Lord Gray a Scots-Man, was become the Terror of his Native Country, that he Commanded an English Army against us, deliver'd up the Castle of Brouchy, &c. The English Lord Gray of Wilton, did indeed command those Armies he speaks of, in the Quality of General of the Cavalry, and the Oneness of the Name has probably occasion'd our Author to mistake one Man for another, the rather, because 'tis true, that the Scots Lord Gray had been deeply engag'd in the English Faction, he was one of those Patriots who, to save Scotland, had betray'd it at Solway-Moss; he was a mighty Stickler in Opposition to the Court, and being in his Heart an early Convert to the more pure Religion, as Buchanan has it, 'tis not unlikely, but that if he did not actually give up his Castle of Brouchy to his English Friends, he might have been shrewdly suspected by his Scottish and Popish Enemies to have done it. Bating this one Mistake, which you see was not groundless neither, and the erroneous Descriptions Monsieur Beaugué gives us of, or rather inconsiderable Escapes he falls in, no doubt through misinformation, about some of our Islands and Towns, which after all he does not describe to their Disadvantage: I find not that he has advanc'd any thing, that is not exactly consistent with the Accounts of our own Writers; and to me, 'tis Matter of Admiration, that a French Man unacquainted with our Language, Customs and Families, who stay'd so short time amongst us (for as he came, so he seems to have return'd with Mr. de Delfé) and that too, in the midst of the hurry of continual Action, should have been able to have given the World the most compleat Piece (for so much) of our Scots History that is any where to be met with; and that under the Disadvantages I have mention'd, he should have stumbled upon so very few Errors, with reference to our Country.' [Pp. lxiv.—lxvi.]

'I need say little of the Expression, Style, Turn of Thought, Method and Order of the following History; whoever is pleas'd to take notice, that my Author wrote it in the Year 1556, that is, when the Belles Lettres were like young Plants but beginning to bud, and that he wrote it in French, the Language in the World that, till of late, was, as their other Modes, most liable to the Tyranny and Capricio's of Custom.' [Pp. lxviii. lxix.]

Of the author, M. de Beaugué, after a very careful search, nothing can be discovered, or even of his more distinguished friend, M. de Dessé, the commander of the expedition. Several entries, relating to the matters narrated in this work, in the Treasurer's accounts of the time, having occurred in the course of our search concerning its author, they have been thought worthy of being given in this place, both on account of their curiously illustrating the manners of the time, as well as the events touched on by our author.

‘ Item viij Aprilis [1548] ane to play throw the town with the swefche to raife certane men of weir to pas to Zaister. iij. s. Item xix Maij to certane chylder of my Lord Governouris courte that wroucht ane haill nycht at the casting of the trinfchis about Hadingtoun. xxij. s. Item xij Junij effray quhilk come furth of Hadingtoun allegeand the Inglishche men to cum In to this toun of Edinburgh to certane cairteris quhilkis come with thair horse to the Castellhill to haif reffavit small munitioun. x. s. Item xx Junii to ane man that playit throuch the toun of Edinburgh twyse upoun ane swefche to have convenit pyonaris for the assege of Hadingtoun. iij. s. vj. d. Item xij Julij to David Spens to pas & seik certane marineris & pylattis to convoy the galeis to the west feyis for his lawbouris be the space of four dayis. xxij. s. vj. d. Item to Johne Paterfoun purfervant direct to Kingorne Kirkaldye &c. &c. for marineris to be pylattis & pas about in the galayis to the west feyis that past to France with the Quenis grace. xxij. s. September Item to vij Servandis of the Laird of Blacateris to by them vij speris quha had slane vij. Inglishemen & broken thair awin speris. lvj. s. Item ij. Nov. to John Cob Meffinger clofit Writingis to the Erles of Rothes to Fyff Angus The wrytingis send fra the Quene and my Lord governour to convene the cuntreis for refitting of the Inglishche schippis cuming to Dundee his wage. xxij. s. vj. d. Item xv Nov. to David Spens send to Linlithque & Striviling chargeing all maner of man to cum fordward to Edinburgh conform to the first proclamatioun and with him the fyre croce. xxij s. vj. d. Februar [1549] Item to Monsieur Derfyeis [Deffé] foure trumpettis

in ix crownis of the fone. x. li. ij. s. vj. d. Item to tua Italianis quha dependit upoun the fort of Inveresk. ix li. Item Aprilis, the Quenis grace my Lord governor & Counfale being advertist of the new Cumpanye of Inglishe horfemen cum- and in to Hadingtoun & of purpois to cum to persew the fort of Inveresk and ane boy to the laird of Elphingstoun charging him gif ony fray wer to mak balis and cum fordward with the fray. ij. s. Item to ane boy direct with ane charge to David Spens fra the Quene & Counfale charging John Bartane Davidfone & Captane John Hume to cum to Leith with thair Shippis at the nixt tyde to support the galayes quha war to combat the Inglishe Schippis at Aberladye. ii. s.'

Our historian being ignorant of the correct names of the persons and places, which he had occasion to introduce, in the course of his work, was obliged to trust to the authority of others, without being able to discover the correctness of the information so given. The errors, not very numerous, which he has committed, will in this way be very readily accounted for. In many instances, he seems to have adapted the orthography to the sound which caught his ear, and was consequently led to present the names, both of persons and places, in so barbarous a form as to render them quite unintelligible. The perusal of the work being by these means rendered irksome, as it is impossible in several parts of it to discover what the author intended to express, it has been thought proper to subjoin a list of all the words which appear to require explanation, with the correct reading affixed to each. The interpretation of the words has been taken from Dr. Abercromby's translation, wherever he has enabled us to do so.

ABERDIM. The city of Aberdeen.

ANNICQ. The town of Alnwick.

COMTE D'ARAM. James Earl of Arran, Governor of Scotland, and ancestor of the Duke of Hamilton.

COMTE D'ARQUIL. Earl of Argyll.

BERLADE. Aberlady, on the sea coast, to the north of Haddington.

BERRUIQ. The town of Berwick.

BLACQUENAY. Blacknefs.

BROUTYGRECQ, PORTYGRES, ET PORTYGRECQ. Broughty-craig, or Broughty-Castle, on the south side of the estuary of the Tay.

BRUTYLAN. Burntisland.

CONTE DE CASSELLES. Earl of Caillies.

LES MONTS DE CHENYOT. The Cheviot hills.

CHASTEAU DE CORNOUAILLE. Cornhill, an old house of considerable strength, on the borders.

DOMBARRE. Castle and town of Dunbar.

DOMBERTRAM. Dunbarton Castle.

DONDY. Town of Dundee.

LE SEIGNEUR DE DUNE. The laird of Dun, Erskine.

EDIMTON. The town of Haddington.

ESMONS. Town of Eyemouth.

ESTRELIN. The town of Stirling.

LERD DE FERNAYS. The laird of Fernihurst, Sir Andrew Ker, ancestor of the Marquis of Lothian.

CHASTEAU DE FEUR. Ford Castle.

FAUXCASTEL. Fast Castle, Berwickshire.

LA RIVIERE DE FORD. The river Forth.

GEDOUART. The town of Jedburgh.

LA RIVIERE DE GEPT. The river Jed.

LE SEIGNEUR DE HUME. Lord Hume.

SAINCT IAN D'ESTON. St. Johnston, or Perth.

ISLE DES MAGOTS. The Bafs.

L'ISLE DIEU. Inchkeith.

LADRES. Town of Lauder.

LAURETTE. Loretto, at the east end of Musselburgh, formerly the site of a Chapel dedicated to our Lady of Loretto, and the spot where a Villa, bearing the same name, now stands.

CONTE LENNAULT. Earl of Lennox.

MEUROS. Melrose.

MONSSEBROU. The town of Musselburgh.

MOURES ET MONROSTS. Town of Montrose.

NORTBERRIQ. The town of North-Berwick.

OILFORT. Sir John Wilford, General of the Forces in Haddington.

ISLES DES OLCHADES, ET D'ORCANET. The Orkney Isles.

OUARC. Newark, a small town in the English borders.

MER PETHELANTIQUE. The Pentland Firth.

PEUPLES. The town of Peebles.

RONSSSEBROU. The town of Roxburgh.

LA RIVIERE DE THIM. The river Tyne.

THUYDEL. Tweeddale.

LA RIVIERE DE TIF. The river Teviot.

TREINNANT. The village of Tranent.

L'HISTOIRE

DE LA GVER-

RE D'ESCOSSE, TRA I-
tant comme le Royaume fut affailly, &
en grād' partie occupé par les Anglois, &
depuis rendu paifible à fa Reyne, & re-
duit en fon ancien eftat & dignité.

A MONSEIGNEVR MESSIRE
François de Montmorency, Cheualier de l'or-
dre, Capitaine de cinquante hommes d'armes,
Gouuerneur de Paris, & de l'isle de France.

Par Ian de Beaugué, gentilhom-
me François.

A P A R I S,
Pour Gilles Corrozet, en la grand' falle du Pa-
lais, pres la chambre des Confultations.

1 5 5 6.

AVEC PRIVILEGE DV ROY.

EXTRAIT DV PRIVILEGE.

IL est permis à Gilles Corrozet, marchand libraire à Paris, d'imprimer, ou faire imprimer, & mettre en vente vn petit liure intitulé, L'Histoire de la guerre d'Escoffe, traitant comme le Royaume fut assailly, & en grand' partie occupé par les Anglois, & depuis rendu paisible à sa Reyne, & reduit en son ancien estat & dignité : Et defendu à tous Imprimeurs, libraires, & autres marchans, quels qu'ils soient, imprimer, ne faire imprimer, n'exposer en vente ledit liure, iusqucs à six ans prochainement venans, à conter du iour & datte qu'il sera paracheué d'imprimer : sur peine d'amende arbitraire, & de confiscation des dits liures, qui se trouueront imprimez par autre que par ledit Corrozet, ou à son auçu : Comme il est plus à plain contenu par lettres du priuilege du Roy, Donné à Paris le fixiesme iour de Septembre, l'an de grace mil cinq cens cinquante six : Et le dixiesme du Regne du Roy Henry II.

Signé Par le conseil,

De Courlay.

Acheué d'imprimer pour la premiere edition, le douziesme dudit mois de Septembre, audit an 1556.

TABLE DES CHAPITRES

DES TROIS LIURES DU DISCOURS DE LA GUERRE D'ESCOSSIE.

DU PREMIER LIURE.



Monfeigneur, Mefire François de Montmorency, Che-
ualier de l'ordre, Capitaine de cinquante hommes
d'armes, Gouverneur, de Paris, & de l'ifle de France.

Chap. premier 5

Bref discours des commencemens de la guerre. Chap. ii. 7

Concion de monfieur de Delfé à fes foldats. Chap. iii. 10

Continuation des premieres entreprifes de guerre contre
les Anglois. Chap. iiij. 11

Auec quel ordre le Capitaine Loup alla reconoitre Edimton. Chap. v. . 14

Du fiegé, que planta monfieur de Delfé deuant Edimton. Chap. vi. . 18

Continuation des faillies, que firent ceux de dedans, pour trauailler monfieur de
Delfé, en afleant fon camp. Chap. vij. 20

Description du plant de la fortrefle d'Edimton. Chap. viij. . . 22

Comme les Efcossois arriuerent à Edimton : & de quelques autres efcarmouches,
qui l'attaquerent auec les Anglois, durant le fiegé. Chap. ix. . . 23

Des approches & baterie d'Edimton. Chap. x. 26

Comme les feigneurs de Brezé, & de Villegaignon conduirent en France Ma- dame Marie, Reyne d'Escoffe. Chap. xj.	29
Par quelle ruse les Anglois secoururent Edimton. Chap. xij.	31
De la maniere de proceder des Escossois au fait des armes: de l'aduertissement, que receut monfieur de Delfé, des entreprifes des ennemis: & de l'ordre, que mit le feigneur d'Andelot, à drefler & aguerrir les foldats de France. Chap. xij.	33
Exemple de finguliere vertu en la Reyne Marie, douairiere d'Escoffe. Chap. xiiij.	36
Concion de la Reyne douairiere d'Escoffe, aux Escossois. Chap. xv.	37
Continuation de la prudence de la Reyne douairiere d'Escoffe. Chap. xvj.	38
Concion de la Reyne douairiere d'Escoffe, aux François. Chap. xvij.	39
Des effects qu'eut la concion, que fit la Reyne douairiere aux foldats: & de l'ordre que donna monfieur de Delfé en fon camp, pour attendre les ennemis. Chap. xvij.	40
Concion de monfieur de Delfé aux Soldats. Chap. xix.	42
Comme les François deffirent les Anglois en bataille, pres d'Edimton. Chap. xx.	43

TABLE DU SECOND LIURE.

P Ar quels moyens la Reyne douairiere prouueut à recompenser la vertu de ceux, qui auoient bien fait en la bataille. Chap. premier	49
Concion de la Reyne douairiere d'Escoffe, aux gens de guerre. Chap. ij.	50
Continuation des bienfaits, que receurent les foldats de la Reyne douairiere. Chap. iij.	51
D'un auertiffement, que donna vn foldat Albanois à monfeigneur de Delfé. Chap. iiij.	52
Comme fucceda l'entreprife, que fit le general d'Edimton, de transporter quel- ques grains dans fa place. Chap. v.	53
Continuation du fucces de l'entreprife du general d'Edimton. Chap. vj.	55
Des armées, que le Duc de Sommarfet enuoya en Escoffe, fous la charge & conduitte de l'Admiral d'Angleterre, & du Milhord Grés. Chap. vij.	56

Pour quelle occasion monſieur de Deſſé fut contrainct de leuer ſon ſiege d'Edimton. Chap. viij.	58
Harangue premiere de monſieur de Deſſé. Chap. ix.	59
De la faute que fit le Milhord Grés, en l'exécution de ſon entrepriſe. Chap. x.	60
Par quelle ruſe les Anglois eſſayerent de nuyre aux François : & de ce qui en auint. Chap. xj.	61
Du ſecours que la Reyne douairiere enuoya à monſieur de Deſſé. Chap. xij.	62
Concion deuxieſme de monſieur de Deſſé. Chap. xij.	63
Concion troiſieſme de monſieur de Deſſé. Chap. xiiij.	63
Comme le Milhord Grés ſe retira à Edimton ſans combatre. Chap. xv.	64
Comme ſucceda à l'Admiral d'Angleterre, vne deſcente qu'il fit, dans le pays de Thais. Chap. xvj.	65
Continuation de ce qui auint à l'Admiral d'Angleterre au pays de Thais. Chap. xvij.	68
D'un fort, que fit conſtruire le Milhord Grés, à deux lieux de Dombarre. Chap. xvij.	70
D'une eſcarmouche, que monſieur de Deſſé attaqua aux Anglois d'Edimton : & du ſucces d'icelle. Chap. xix.	71
De ceux, qui ſe mirent au retour en France : & brefue deſcription du Petit liſt. Chap. xx.	72
Quelles forces peut auoit vn doux & humain traiçement à l'endroit de gens de guerre. Chap. xxj.	74
Qui fut occasion que monſieur de Deſſé ne peut arriuer à temps, pour trouuer les Eſpagnols, qui eſtoient dans le pays de Thuydel. Chap. xxij.	75
De quelque tumulte, qui ſe fit à Edimbourg. Chap. xxij.	76
Du moien de proceder, qu'eut monſieur de Deſſé, à couvrir le deſſaut de ſon armée. Chap. xxiiij.	77
D'une eſtrette & Camifade, que donna monſieur de Deſſé à ceux d'Edimton. Chap. xxv.	78
Continuation de la Camifade. Chap. xxvi.	80
De Portygrés, que le Milhord Grés mit entre les mains des Anglois : quelle iſſue prindrent les entrepriſes, que ſeit monſieur le Conte d'Aram, pour le re-	

courir : & celles, qui firent les Anglois, pour l'agrandir en cet endroit d'Escosse. Chap. xxvij.	81
D'une escarmouche, que le Conte Rimgrau, & le seigneur d'Etauges attaquèrent aux Anglois de Portygrés. Chap. xxviij.	83
La maniere comme le chasteau de Humes tomba es mains des Anglois. Chap. xxix.	85
Du recourement du chasteau de Humes. Chap. xxx.	88
La prise du seigneur d'Etauges devant Brontygrech. Chap. xxxi.	91
Continuation de l'histoire, & des quatre compagnies enuoyées par le Roy en Escosse. Chap. xxxij.	94
D'une escarmouche devant Dombarré, ou fut pris Ser Ian Oilfort, general d'Edimton. Chap. xxxij.	96

TABLE DU TROISIÈME LIVRE.

A vec quelle vertu monsieur de Dessé entreprit le voyage de Thuydel. Chap. premier.	99
Comme on emporta d'un seul assaut le chasteau de Fernays, qui estoit estimé inexpugnable. Chap. ii.	101
Du payement que receurent quelques Anglois de leurs cruautés. Chap. iii.	104
Comme le Seigneur de la Chappelle alla reconnoître Rouslebrou : Et quel rapport il en fit. Chap. iiij.	105
Avec quelle prudence monsieur de Dessé fauoit euer les insolences de la guerre : & quel bon heur il auoit, à emporter les places des ennemis. Chap. v.	106
Continuation de l'histoire, & du bon heur de monsieur de Dessé. Chap. vi.	107
D'un exploit d'armes, dont le capitaine Cobios emporta le dessus sur les Anglois. Chap. vij.	108
Du degast, que fit le seigneur de la Chappelle au pays de Northumbeland. Chap. viij.	110
Du degast, que fit monsieur de Dessé dans le pays d'Angleterre. Chap. ix.	111
Comme les Anglois font tousiours cas des propheties. Chap. x.	113

DES CHAPITRES.

vii

Des afflictions, que receurent les François à Gedouart. Chap. xj.	114
D'un auertissement, que receut monfieur de Delfé des entreprifes des Anglois.	
Chap. xij.	117
De la retraite de Gedouart. Chap. xij.	118
Des nouuelles entreprifes, que drefferent les Anglois fur le Royaume d'Efcoffe.	
Chap. xiiij.	120
Continuation des entreprifes de l'armée d'Angleterre. Et brefue defcription	
de l'ifle de May. Chap. xv.	123
Comme l'armée d'Angleterre entra dans la riuere de Fort. Et comme les An-	
glois s'emparerent de l'ifle Dieu. Chap. xvj.	124
Description de l'ifle Dieu. Chap. xvij.	127
De la venuë de monfieur de Termes en Efcoffe. Chap. xvij.	128
Comme monfieur de la Chappelle alla reconoitre l'ifle Dieu. Chap. xix.	129
Du bon ordre, que donna la Reyne en l'entreprife de l'ifle Dieu. Chap. xx.	130
Harangue de la Reyne aux François. Chap. xxj.	132
Continuation de l'entreprife de l'ifle Dieu. Chap. xxij.	133
Harangue de monfieur de Delfé aux foldats de France. Chap. xxij.	135
Discours des combats, qu'ils firent à la defcente de l'ifle. Chap. xxiiij.	135
Continuation du combat. Chap. xxv.	137
De quelques combats particuliers en la furie de l'affault. Chap. xxvj.	138
Comme on emporta l'ifle Dieu fur les Anglois. Chap. xxvij.	140
D'un stratageme que voulut iouër le Capitaine faint André. Et comme mon-	
fieur de Delfé fe mit au retour en France. Chap. xxviiij.	141

FIN DE LA TABLE DES CHAPITRES.



ODE

DE IAN DE BAROT, BARON DE TAYE,

SUR L'HISTOIRE DU SEIGNEUR DE BEAUGUÉ.



Adis l'éloquent Romain,
Par la grandeur de sa gloire
Curieux de la victoire,
Que l'honneur nous met en main,
Voulut sa Togue priser,
Pour les armes mépriser.

Il estima la vertu
Seule gefir sous la robe,
Que fouvent l'habit dérobe
Dont l'ignare est reuestu,
Mesurant le vertueux
Selon l'habit somptueux.

Plus on ne l'estimera,
Ny sa Togue d'honneur ceinte,

ODE.

Pour la croire feule peinte
Du fçauoir, qui l'honora :
Puys que le guerrier Beaugué
Sonde le Pegafin gué.

Plus ta Togue ne prendra
(Romain) des guerres la grace,
Du feul gendarme l'audace
Les efcrire entreprendra.
L'artifan prompt & fubtil
Iamais n'excede l'outil.

Ton œil fuperbe n'a veu
Les chocs furieux des armes,
Ny les bruyantes alarmes
L'oreille n'a entendu,
Les fons des Canons tonnans
Ne t'ont eté étonnans.

Ny du boulet furieux
Foudroyant la tour fuperbe,
Ny du camp armé fur l'herbe
Tu ne repeuz onc tes yeux,
Ny les harnoyz reluyfans
Te furent oncques plaifans.

Les trompettes & clerons
Par l'air dardans leur orage
Ne t'ont donné le courage
De veoir aux forts efcadrons

ODE.

Maintes armes cracqueter,
Maints panonceaux voleter.

Le feul gendarme a souffert
Les durs perils aux tranchées,
Aux dangereufes couruées
Courageux il s'est offert.
Seul donques il efcrira
Au vray, ce que ven aura.

Ainfi, mon fage guerrier
Beaugué, ta diuine Muſe
Des affaux cruels la ruze
Aux hommes vient publier,
T'accompnant aux efforts
De mil effroyables morts.

L'immortel Montmorency,
Qui te faiët chanter la guerre,
Ses victoires fur la terre
Te fera chanter aufsi,
Ainfi que le peuple heureux
Le chante victorieux.

RIEN PLUS CONSTANT.



L'HISTOIRE
DE LA
GUERRE D'ESCOSSÉ,

TRAITANT COMME LE ROYAUME FUT ASSAILLY, & EN GRAND PARTIE OCCUPE
PAR LES ANGLOIS, & DEPUIS RENDU PAISIBLE À SA REYNE,
& REDUIT EN SON ANCIEN ESTAT & DIGNITÉ.

PAR IAN DE BEAUGUE,
GENTILHOMME FRANÇOIS.

A MONSIEGNEVR MESSIRE FRANÇOIS DE MONTMORENCY,
CHEVALIER DE L'ORDRE, CAPITAINE DE CINQUANTE HOMMES D'ARMES,
GOUVERNEUR DE PARIS, & DE L'ISLE DE FRANCE.

CHAPITRE PREMIER.



Je ne puis taire aucunement, Monseigneur, les braves entreprises, la bonne conduite, & excellente vertu, les diligentes executions, & les hauts & magnanimes faits de ceux, qui, au service du Roy, se trouuerent en la guerre d'Escoffe: puis que de tant de doctes, & vaillans hommes, qui auiourdhuy (decorans nostre France de leurs beaux escripts) payent le falaire iustement deu à la vertu, ne s'est encor presenté aucun, qui ayt voulu despendre sa pene au plaisir de si louable exercice. Et par ce qu'il me plaist de librement confesser ma bonne volonté en cet en-

droit, pour l'estime que ie fais estre vn impossible & à moy, & à tous autres faisans profession des armes, de mieux employer le tems d'une trefue : Ie ne me veux masquer de l'excuse ordinaire, de ceux, qui hors de propos alleguent tousiours la force qu'on leur fait de publier leurs labeurs. Bien vous diray-ie, Monseigneur, que, des l'heure que ie mis premierement la main à la plume, pour laisser à la posterité l'honneur, & la gloire de ceux, qui, pour le seruice du Roy, ont preferé l'esperance d'une renommée immortelle, à une longue, honteuse & reprochable vie : ie vouay des lors à vostre excellence ce, que les laborieux trauaux, les longs voyages, le bon heur d'une constante memoire, le soin & diligence extreme, & toutes mes forces pourroient satisfaire à recompenser, avec le moyen de mes escrits, la vertu des excellens, & illustres personnages, que ie ramentoy en mon histoire. Desquels defunct monsieur de Dessé, personnage de singuliere & recommandable memoire, est tres digne du premier ranc, duquel vous, Monseigneur, auez connu, & noté maintesfois l'assurée vertu aux graues & dangereux affaires, le bon heur à l'exécution des hautes, & hazardeuses entreprises, et la singuliere diligence, & sagesse à se conseruer l'honneur, qu'il s'estoit acquis au fait des armes. C'est pourquoy ie traite d'assurance ses vertuz, & bonnes conditions : ayant vn tesmoin des louanges, que dignement ie luy donne, de si graue & singuliere autorité, dignité, & honneur, que vous, Monseigneur : que ie me fay croire estre encor si affectionné à la louenance de son nom, que vous prendrez en bonne part, si i'ay osé dedier mon histoire à vostre grandeur. Dont ie vous supplie tres humblement : & me faire receuoir tant de grace, que de me tenir en comte de ceux, qui ont plus de desir de despendre leurs vies à vostre seruice. De Paris, ce dixiesme iour de Septembre, 1556. Par

Vostre tres humble, tres fidele, & tres obeyssant seruiteur,

IAN DE BEAUVGE.

BREF DISCOVERS

DES

COMMENCEMENS DE LA GUERRE.

CHAPITRE DEUXIESME.



EU apres le deces du tresexcellent François premier du nom Roy de France, ce grand Roy duquel les bonnes lettres tiennent la vie, le Roy Henry deuxiesme, non feulement son successeur es Royaumes & grandes seigneuries qu'il tenoit, mais encores en toutes ses singulieres vertuz & bonnes parties, tourna tous ses desceins à remettre le Royaume d'Escosse en son premier etat & dignité. Et si tost que monsieur le Prieur de Capue, personnage certes de recommandable vertu, & digne de tout honneur, en fut de retour, ayant fort heureusement executé le fait de sa charge: Ce pendant que le Roy entendoit à y faire passer plus grands forces, sa Maiesté y despescha le Seigneur de la chappelle de Biron, avec vn bon nombre de gentils-hommes pour euter par ce prompt & soudain secours, que les Escossois ne tumbassent en linconuenient qu'ils auoyent encouru plus d'une fois, de se perdre par faute de conduite, lequel comme personnage qu'il est d'excellente & amirable vertu, encor qu'il trouuast l'Escosse en vn merueilleux trouble, assaillie, & en grand partie occupée par les Anglois, si donna il tel ordre à garder le reste contre les ennemis, que du iour qu'il entra en Escosse les Anglois trouuerent tousiours depuis non seulement qui leur fist teste, mais encores qui leur rompist & empeschast leurs des-

ceins. Presque en mesme tems le Roy auoit mandé au seigneur du Chastel son Lieutenant general en Bretagne en l'absence de monsieur d'Estampes, qui en est gouverneur, au seigneur de la Maillerave Visamiral de France, au Seigneur d'Espoir Visamiral de Bretagne, & au seigneur de Carney gouverneur & capitaine de Brest, ou l'armée se deuoit embarquer, de commencer à faire tous les aprests qu'ils verroient estre necessaires pour l'embarquement de l'armée que sa maiesté deliberoit enuoyer en Escosse, & toutesfois ne voulant laisser aucune chose en arriere de ce qui se pouuoit faire pour hastier le partement de ce secours, attendu avec extreme necessité par les Escossois, le Roy fit election du seigneur de Noailles, à present gentilhomme de sa chambre, & lors son maistre d'hostel ordinaire, personnage de grande siffisance & vertu, auquel sa maiesté donna la principale charge & superintendance, tant pour faire les montres des gens de guerre, comme pour dresseur leur embarquement, ordonner des finances, pour les fraiz de l'aduitaillement, & pour toutes autres choses necessaires à telle entreprinse.

Ce pendant donq que se donnoit bon ordre à aduitailler & equipper les vaisseaux esleuz pour faire le voyage, monsieur d'Andelot, lequel auoit esté par le Roy établi Collonel de l'infanterie Françoisé, arriua en vn village, appellé Pellerin, pres de Nantes, ou ce faisoit la reueuë des gens de guerre qui deuoient passer en Escosse : ou, regardant marcher les rances en bon ordre, iugeant de la contenance des vns & des autres, les gens de pié commencerent vn salué, durant lequel fut tué d'une harquebouzade le Cheualier de Bonninnet, qui fut fort plainct & regreté de tous : car ceux qui le conoissoient, l'auoyent tous en reputation de preux, sage, & hardy gentilhomme. Il fut cerché par toutes les bandes, pour trouuer le malheureux, qui auoit esté occasion d'un tel inconuenient. Et à la fin par soupçon fut pris vn soldat, qui confessá auoir tiré de deux plombs : Qui fut causé, avecq cet indice que le Cheualier de Bonninnet estoit aussi bleffé de deux balottes l'une bien pres de l'autre, que le soldat


fut pendu au cymetiere de Pellerin, ou le cheualier estoit pres monsieur d'Andelot, quand il fut bleffé. Ce piteux accident aporta de l'ennuy en cete bonne compagnie, ou au parauant n'auoit été propos que de choses de plaisir. Mais se monstrant le vent aucunement fauorable, monsieur de Dessé (duquel le Roy auoit fait election, pour estre son Lieutenant general en la guerre d'Escoffe, comme personnage excellent en toutes choses dignes de louange) commanda que chacun se tint prest pour entrer le lendemain aux nauires.

Or estoit-ce vne chose que monsieur de Dessé auoit en singuliere recommandation, de faire en premier lieu esprouuer à ses soldats, ce que fauoient faire les ennemys, à fin de leur oster la crainte que l'opinion conceüe d'un ennemy inconnu pourroit auoir donnée à aucuns : assuré que leurs effects ne pourroyent repondre à la valeur qu'on leur attribuoit. A la verité maints vaillans hommes etoyent en l'armée, qui auoyent maintesfois essayé les armes des Anglois, & monsieur de Dessé mesmes au siege de Landrecy, à Boulogne, & autres lieux. Et quant aux Espagnols & Italiens, on les auoit veuz & afrontez souuent. A cete cause, si tost que l'armée fut descendue en Escoffe, fut deliberé qu'on yroit diligemment trouuer les Anglois. Et pource qu'Edimton estoit le lieu, qui pouuoit plus empescher noz plus grandes entreprinſes, la resolution du conseil fut, auant qu'entreprendre autre chose, qu'on essayeroit de le recouurer. A fin donq que le tout fust conduit seurement & avec consideration & bon ordre, monsieur de Dessé commanda que toute sa compagnie & la caualerie du seigneur d'Etanges se tiendroyent prestes, et que monsieur d'Andelot, & le Conte Rimgraue mettroyent leurs fanteries aux chams. Ce qu'il alla faire entendre à la Reyne, & à monsieur le Conte d'Aram pour lors gouuerneur d'Escoffe : lequel se presenta liberalement pour estre de la partie, avec les gens de cheual qu'il auoit dans la ville, qui etoyent de sept à huit cens hommes armez à l'Escoffoise. Au sortir d'Edimbourg monsieur de Dessé trouua la fanterie Françoisé,

que monsieur d'Andelot auoit fait ranger en bataille en vn plain camp. Il confidera longuement la façon de faire de ses foldats : Puis parla à eux en semblables paroles.

CONCION DE MONSIEUR DE DESSÉ A SES SOLDATS.

CHAPITRE TROISIÈME.

“  Vand bien vous n'auriez iamais eprouué les armes
 “ des Anglois, si croy-ie fermement, Soldats, que le
 “ moindre de tant que vous estes oferoit bien entre-
 “ prendre d'entrer en combat contre le plus braue
 “ Anglois qui soit entre eulx : pource que sans
 “ aymer la vertu & auoir vostre honneur, en grand
 “ recommandation, vous n'auriez hazardé voz vies pour vous trouuer en
 “ lieu ou on n'acquiert reputation, que par le seul moyen du bien faire.
 “ Mais, à mon iugement, il ne s'en trouue point entre vous, qui non
 “ seulement n'ayt fait bon essay de leurs forces, mais encores qui ne les
 “ ayt maintesfois rangez à discretion. Maintenant donq que vostre bon
 “ heur veult qu'ayez pour tesmoignage de vostre vertu, & pour vostre
 “ feurté & support, tant de braues & vaillans hommes : faites vous doute
 “ que ne venions facilement à notre honneur de si foibles ennemys : &
 “ que ne les puissons ietter hors d'Escosse par les epaulles ? De ma
 “ part, Soldats, j'espere avec ces armes vous montrer le chemin de bien
 “ faire à pié & à cheual : Et que ce bras, qui ha été maintesfois fouillé
 “ au sang des Anglois avec souveraine louange, se lassera encor à repa-
 “ dre la ceruelle de leurs testes, de meilleur cœur que iamais, pour vous
 “ donner à cognoistre que me ferez plus de plaisir en vous disposant de
 “ s'uyure l'exemple de mes faits, qu'en prestant vostre foy à mes paroles.”

CONTINVATION
DES PREMIERES ENTREPRISES DE GUERRE
CONTRE LES ANGLOIS.

CHAPITRE QUATRIESME.



Pres que monsieur de Dessé eut parlé en ces termes, & que les soldats eurent montré avec gaillardes & fauorables aclamations le grand espoir qu'ils en receuoient : Il s'adressa au regiment du conte Rim-graue, lequel il trouua bien armé & en bon ordre. Car il n'y auoit soldat, qui ne monstraft vilage de gentil compaignon. Ce pendant les taborins de la fanterie Françoisé batoient par les chams, commençans ceux cy à marcher par le chemin hault droit à Monsbrou, et les Allemans selon la riuie de la mer, avec l'artillerie, dont estoit commiffaire le seigneur Duno, homme accomply de beaucoup de bonnes conditions.

Monsieur de Dessé pria le seigneur de Dunes, Escossois gentilhomme de grand bonté & valeur, d'aller de compagnie avec le Capitaine Loup, Lieutenant du Seigneur d'Etauges, descourir, si les ennemys eroient en campagne. Et commanda au Seigneur d'Etauges de les sùyre avec le reste de sa caualerie legere, pour les souter, & faire au reste selon que le besoin se presenteroit.

Mais auant qu'entrer plus auant es discours de la guerre, il fault noter à quelle extremité etoyent reduits les Escossois, quand leurs ennemis, apres auoir bruslé leurs villes, saccagé tout le plat pays, & vsurpé les meilleurs endroits de toute la frontiere, les tenoyent assiegez si étroite-

ment, qu'ils n'heussent osé fortir aux chams, fors en bien grosse troupe : dequoy encor les Anglois faisoient si peu de cas, (comme ils font tousiours en cete faulx herefse de croire, qu'il n'y ayt nation en tout le monde qui les vaille) qu'enuiron cinq cens cheuaux, qu'ils pouuoient estre d'Anglois en Escosse, osoient bien entreprendre de courir iour & nuict iusqu'aux portes d'Edimbourg, foudroyans toute cete coste de leurs courtes, & tenans en subiection tout le paylage des ennuirons. Si fault il entendre que les Escossois ne sont moins belliqueux, ny en chose que ce soit inferieurs aux Anglois : mais à cause des ligues & partialitez, qui pour lors estoient entre eux, & que l'un ne se fioit de l'autre, ils laissoient non seulement aux Anglois gagner autorité sur eux, mais encores souffroyent estre molestez avec mille sortes de tyrannies & afflictions : pource, à mon iugement, qu'ils estoient delaissez de Dieu, lequel crée quelques fois executeurs de sa iustice les Tyrans, les barbares, et les Turcs mesmes, comme il permit à Cam Zoroast d'affliger les Italiens, à Nembroth les Babiloniens, à Sardauapale les Persans & Arabes, à Pharaon la posterité d'Abraham, à Attyla les François, & de fresche memoire à Mahumet Otthoman les Grecs & Chrestiens Orientaux. Et non sans grand' raison ie dy que Dieu estoit irrité contre les Escossois : car s'ils eussent sceu appaiser son ire, chose fort malaisée eust esté aux Anglois, de les pouuoir reduire au poinct ou ie les ay veuz. Il fault donq croire, que le iuste iugement de Dieu permette, qu'un peuple souffre ces defauantures, pour luy donner dequoy exercer sa foy, & luy faire recognoistre ses fautes. Puis quand ce vient à l'extreme neccessité, il se declaire voloir fauoriser & soutenir les siens. Ainsi en est il auenu aux Escossois : car des le iour que l'armée de France mit le pié en Encoffe, le bon heur des Anglois, qui leur auoit longuement tenu bonne compagnie, commença à les eslongner peu à peu. Puis tout à coup se declaira leur ennemy, & leur tourna les epaules : comme ie le donneray à conoistre, en discurant sur les particularitez de mon histoire. Retournant donq

au propos, dont ie suis fort pour faire cete digression : Monsieur de Delfé ayant despesché gens pour aller à la descouuerte, faisoit marcher son armée en toute diligence pour soutenir ceux, qui en auroient besoin, laquelle estoit diuisée en deux regiments : l'un desquels estoit d'Allemands, conduits par le Conte Ringraue, homme certes tres suffisant & loyal au seruice du Roy : & l'autre estoit de François, auxquels commandoit monsieur d'Andelot, personnage non moins preux & hardy, que sage & de grande entreprise. Les soldats tenoyent tous contenance de gens assurés, & esperans de trouuer l'ennemy, doubloyent leurs pas, comme s'ils eussent fait doute de n'arriuer à tems pour combatre. Mais comme l'armée n'estoit qu'à demye lieuë de Monsbrou, Danché, vn gentilhomme de la compagnie du seigneur d'Etauges, vint auertir monsieur de Delfé de la part de son Capitaine, que tous les Anglois s'estoyent retirez à Edimton : à quoy se soubfryant monsieur de Delfé, & se retirant vers monsieur le Conte d'Aram, les seigneurs Pierre Strozzi, & d'Andelot : Voicy Danché, dist il, qui nous apporte de bonnes nouuelles : car si les Anglois nous craignent auant que nous auoir veuz, que feront ils lors, qu'ils nous conoistront ? Cherchant occasion pour faire auoir en mespris l'ennemy, & d'affurer ses soldats de la victoire. Aussi n'est ce chose malfeante aux bons chefs & grand Capitaines, d'vser quelques fois de termes extraordinaires, pour augmenter l'assurance à vue armée de bandes nouuelles, quand ils doyuent affronter ennemis non accoustumez. Il renuoya incontinent Danché au seigneur d'Etauges, luy dire, qu'il l'attendist à Monsbrou. Puis commandant au Capitaine Rotouze, Lieutenant du Conte Ringraue, de faire marcher l'auangarde au petit pas, se mit deuant avec monsieur le Conte d'Aram, le seigneur Pierre Strozzi, & autres, suyuis de bonne troupe de gens de cheual.

AVEC QVEL ORDRE LE CAPITAINE LOUP ALLA
RECONOISTRE EDIMTON.

CHAPITRE CINQUESME.



E pendant que ces choses se faisoient, le Capitaine Loup, qui estoit allé descourir, auoit esté guidé iudques à vn village au dessus d'Edimton, ou n'ayant rien trouue à quoy s'employer, delibera d'enuoyer cinquante lancettes, essayer d'attirer les Anglois hors de leur fort : & les ayant instruits en quelle part ils feroient leur retraite s'ils etoyent forcez, les enuoye, & se tient avec sa trouppe en imbofcade au couuert de quelques vieilles mafures, laissant vne sentinelle sur la montagne, pour estre aduertie de ce qui apparestroit. Les Escossois ee pendant approcherent d'Edimton, & y demurerent assez long tems, attendans que les ennemis faillissent sur eux. Mais ils ne firent aucun semblant de sortir : seulement leur tiroient selon leur coutume, qui estoit (car ainsi ie l'ay veu souuent) que pour deux ou trois cheuaux, qui se presentioient deuant leur fort, ils tiroient sans grand propos dix & douze canonades : ee que sachant le Capitaine Loup sortit de son imbofcade, & descendant pour se ioindre avec les Escossois, à fin de reconoistre tous les quartiers du pays, & les comoditez d'y loger, environ trois cens hommes sortirent de la ville, toutesfois ils ne l'eslonguerent plus que d'une mousquetade, & ne volurent attendre le Capitaine Loup, combien qu'il essayast de les attaquer plusieurs fois. Voyant donq qu'ils n'en voloient autrement manger, se retira pour aller trouuer monsieur de Dessé, ayant reconnu Edimton du pié de la muraille, d'on on luy tira plusieurs coups en vain. Et marchant plus outre, se tenant

ferré & en bon ordre, defcouurit vn gros fquadron de Caualerie du cofté de la mer, venant droit à luy. Parquoy doutant que fuflent ennemis, gagna l'auantage d'vn coftau, qui fe trouua à propos, & enuoya dix Sallades des fiens, avec Beauchafte, & vingt & cinq Efcossois, les mieux montez, pour les roconoiftre : leur commandant de ne rien hazarder : fauançans luy & le feigneur de Dunes avec le refte de leur troupe, par les lieux auantageux, pour les fouftenir & faciliter leur retraite. D'autre part monfieur de Deffé, ayant defcouuert ces lancettes, eftimant que feuffent ennemis, auoit enuoyé pour les reconoiftre, le feigneur d'Etauges, hardy & cheualeureux gentilhomme, avec cinquante Sallades, & le Capitaine Pierre Longué, par vn autre chemin, pour les furprendre, & empefcher leur retraite. Et ainfi s'apprestoyent au combat d'vne part & d'autre. Car le tems etoit pluuieux, & couuert de groffe nuée & brouillas, à quoy la region eft fort fubieète. Mais cete opinion leur dura peu : Car à l'approcher, ils fe reconurent, & enfemble retournerent ou etoit monfieur de Deffé.

Lequel, apres qu'il eut donné ordre à faire loger fon armée à Laurette, & aux autres chofes plus neceffaires, auoit pris avec luy fa compagnie & celle du feigneur d'Etauges, & vn bon nombre d'Allemands. Il choifit aufsi de toutes les bandes cinq cents harquebouziers, ceux qui luy femblerent plus difpos : lefquels fuyirent le feigneur d'Andelot, leur Collonel.

Certe troupe etoit celle, que le feigneur d'Andelot auoit defcouuerte, ainfi qu'il retournoit d'Edimton, & avec laquelle, il s'etoit ioinct, comme i'ay dit, s'effayant d'abreger le chemin, par le recit de ce qu'il auoit appris, de la façon de faire des Anglois. Et cependant monfieur de Deffé approcha de la montagne, etant au deffus d'Edimton du cofté de Berlade, ou il ordonna que le feigneur d'Etauges iroit attaquer l'Efcar-

mouche, de la parte de la porte d'Edimton : & que monfieur d'Anделot, avec le feigneur de la Chappelle, les Capitaines Villeneufue & Achault, & avec trois cens harquebouziers, iroyent par le dos de la montagne fe montrer de l'autre cofté d'Edimton, effayer s'il y auroit moyen de dreffer quelque bonne entreprife. Puis ayant laiffé deux enfeignes d'Allemands, & deux pieces d'artillerie de campagne, rangez en bataille fur la montagne, pour fouteñir ceux qui en auroient befoin, s'approcha plus pres, avec fa gendarmerie, & le refte des harquebouziers, pour veoir à fon aife le circuit & contenu de la ville, les lieux comodes pour y loger, & reconoitre les plus foibles endroits par ou elle fe pourroit mieux battre. Ce pendant leur artillerie iouoyt fans cefle, & auoyent fait fortir à la faueur quelques harquebouziers Italiens, avec deux cens laucettes, du cofté d'Edimbourg. Mais ils furent en peu d'heure rambarrez iufques à leurs portes, par le feigneur d'Etauges & ceux de fa compagnie, ou il y auoit de vaillans ieunes hommes, lefquels fuyans l'exemple de leur Capitaine, y firent ce que gens de bien fauroient faire. Les Italiens leur volurent faire teste, à la faueur de quelques harquebouziers, que Tybere auoit atiltrez dans le foffé : Mais il les alla battre iufques dans leurs barrieres, avec le fupport que luy fit le lieutenant de monfieur de Deffé, avec dix hommes d'armes des fiens. Quelque autre nombre d'archers & harquebouziers Italiens & Anglois, voyans que le feigneur d'Anделot, venu pour reconoitre leur fort, ne s'efmouuoit pour le tonnerre de leur artillerie, mais comme hardy & affuré qu'il eft, s'approchoit toujours plus de leur foffé, fortirent enuiron deux cens pour le venir charger. Il fit du commencement mine de les vouloir attendre, avec le feigneur de la Chappelle, le Capitaine Villeneufue, & vingt & cinq ou trente harquebouziers, qu'il auoit pres de luy : & de fait leur fit tirer force harquebouzades, & en tomba plufieurs de ceux qui s'etoient plus auancez. Mais quand il luy fembla que les ennemis s'efchauffoyent, il commença à retirer fes gens peu à peu. Puis quand il veid fon poinct,

il prit la cargue toute entiere, iufques à quelques vieilles ruines, derriere lefquelles il auoit atiltré le Capitaine Achault, & le refte de fes harquebouziers, tendant de venir à bon effect de ceste entreprife. Et en cet endroit fait tourner vifage contre les ennemis : lefquels, pour ne s'eftre apperceuz de la tromperie, l'auoyent fuiuy iufques lá à la debandade, & fans aucun ordre, pource qu'ils etoyent en groffe troupe, & penfoient trouuer leur retraite plus aifée, qu'ils ne firent. Car le feigneur d'Andelot les chargea par teſte avec ſes harquebouziers, & le Capitaine Vिलенеufue par flanc avec les ſiens, de forte qu'il n'y eut gueres de coup, qui ne fuſſent bien employez : toutesfois ils s'efforcerent de faire teſte, voyans vne groffe troupe de caualerie venir à toute bride pour les ſoutenir. Ce pendant on en tumba pluſieurs morts par terre : & ne perdirent noz ſoldats leur aſſurance accoutumée, pour quelque renfort & refreschiſſement qui fuſt venu aux ennemis : Mais les ayant chargez de plus belle, ſacquerent les épées au poin, & ſe ferrans enſemble, ſe meſlerent furieufement entre eux, ou ils n'auoient gueres moins d'auantage que les Anglois : car il n'y en auoit point en ce petit nombre de bous ſoldats, qui ne fuſt armé de mourrion, de iaques, & manches, armes fort requiſes & neceſſaires à l'harquebouzior (quelque opinion qui ſ'authorifé auioird'huy au contraire) pour les accidens qui le forcent quelquefois de venir aux mains. En cet endroit Monſieur d'Andelot & ceux que i'ay nommez firent tant d'armes, qu'ils repoulſerent les ennemis à coups d'épées. Ainſi etoit chaudement attaquée l'eſcarmonche en pluſieurs lieux. Car monſieur de Deſſé avec cinquante cheuaux auoit chargé deux cens lancettes, & vingt cinq harquebouziers à cheual, qui etoient fortis avec Ser Ian Oilfort, general d'Edimton, pour faciliter la retraite des vns & des autres : & les auoit faucez avec telle furie & hardieſſe, que la plus part fut taillée en pieces, & le refte fut chaffé battant iufqu'aux portes de la ville. Et en meſme inſtant monſieur d'Andelot rambarra ceux, qu'il auoit affrontez, non ſans auoir ionché le chemin de

plusieurs morts, & bleffez des ennemis : & n'ayant receu de sa part autre dommage, que de quatre gentilshommes de sa maison, lesquels y furent quelque peu bleffez. L'artillerie d'Edimton auoit tousiours tiré : mais pour les grandes pluyes qui tunboyent, & que la nuit approchoit, pres- que tous leurs coups etoyent tirez à l'auanture, & sans aucun effect. Ainsi nous demeura l'honneur de ce premier rencontre : qui fut assez pour abatre de l'outrecuidance des Anglois, du moins nous y gagnâmes vn tel auantage sur eux, qu'onques depuis ils n'oserent attendre noz gens d'assurance. Les seigneurs Pierre Strozzi, de la Mailleraye, d'Oifel, le Conte Rimgrau, & la meilleure part des gentilshommes, qui etoyent venuz en l'armée, auoyent esté donner coups de coutelas iusques à la porte d'Edimton : comme ils ont fait encor plusieurs fois depuis, & avec autant de braueté & hardiesse, qu'autres firent onques. Chacun se retira la part qu'estoit Monsieur de Dessé, & luy avec le tout vers Laurette, faisant tousiours marcher les gens de pié en bataille, & tenant sus le derriere toute sa caualerie en armes, n'ayant fait autre perte que d'un soldat, qui y fut tué d'une canonade, & de cinq ou six qui y furent bleffez.

DU SIEGE QUE PLANTA MONSIEUR DE DESSÉ DEUANT EDIMTON.

CHAPITRE SIXIESME.



Le soir que monsieur de Dessé fut retiré à Monsbrou, il declara qu'on delogeroit le lendemain des l'aube du iour : ce qu'on fit, apres que la monstre generale fut faite de noz gens : & allâmes camper à la veuë d'Edimton, ou desia etoit attaquée l'escarmouche par le Milhord de Humes, Escossois. Mais les Anglois se retirerent incontinent à la faueur de leurs murailles, quand

ils decoururent nostre auangarde. Monsieur le Conte d'Aram, qui la conduisoit, se tint en bataille en la prairie, avec la plus grand partie de son squadron, enuoyant le reste courir iusques au guet des ennemis : Ce pendant que les Allemans se logeoient, & que monsieur de Dessé arriuait avec le surplus de l'armée : lequel voyant quelques harquebouziers des ennemis endommager le feigneur de Humes, enuoya le Capitaine Gourdes, avec cinquante soldats, pour les harquebouzer : lequel fit tel denoir, qu'il les contraignit gagner la faueur de leurs murailles : ou encores il auoit entrepris de les aller charger, combien que leur artillerie le batist de toutes parts, quand il s'apperceut que plus de cent cheuaux estoient fortis d'Edimton, pour le cuider venir surprendre : & alors il retira ses gens au pas, & temporisa, arrestant les ennemis à coups d'harquebuzades, iusqu'à ce qu'il fust renforcé & secouru par le Capitaine Villeneufue, lequel avec soixante harquebouziers leur donna en flanc de grande assurance & hardiesse.

Mais ainsi que les ayant rompus il les menoit battant deuant luy, & qu'une grande ardeur l'auoit conduit iusques sur le bord du fossé d'Edimton, ou il auoit precipité plusieurs des ennemis avec leurs cheuaux : Il receut vn coup d'harquebuzade, dont il cheut peu apres mort estendu en la place, ayant en ce ieune aage, ou il estoit, fuiuant les hazards de la guerre, montré en plusieurs autres endroits de grandes preuues de sa valeur. Entre tous ceux qui se dolurent de sa mort, les soldats en firent vn fort grand dueil, qui l'auoient conu accomply de toutes les bonnes parties requises à vn gentil Capitaine. Il s'en trouua qui alleguerent que le Capitaine Villeneufue s'estoit trop hazardeusement présenté à la mort. Mais i'estime, avec bon nombre d'autres, que la hardiesse de ce vaillant Capitaine n'est occasion de luy auoir abregé la vie, nonplus qu'aux couards la crainte de retarder la mort inuitable : comme dit I. du Bellay.

Car il fault que l'on meure :
 Et l'homme ne peut pas
 Tarder de demie heure .
 Le iour de son trefpas.

CONTINVATION

DES SAILLES, QUE FIRENT CEUX DE DEDANS, POUR
 TRAUAILLER MONSIEUR DE DESSÉ, EN ASSEANT
 SON CAMP.

CHAPITRE SEPTIESME.



Devant ces escarmouches le Conte Rimgrau faifot camper ses Allemans à costé d'Edimton, ou Duno faifoit faire des tranchées pour la garde de l'artillerie qu'il mit à la veuë des ennemis : Et ce pendant partie de nostre fanterie Françoisse se tenoit en bataille pres monsieur de Dessé, attendant le seigneur d'Andelot, qui menoit le reste, lequel se monstra peu de teins apres. Mais ne voulant presenter sa troupe sans l'auoir esprouuée, print trois ceus harquebouziers, & laissant le reste de sa troupppe en bataille en vn endroit de la montagne, qui ne pouuoit estre veu d'Edimton, descendit fur la riuere de Thim, qui passe à l'vn des bouts de la ville, le plus couuertement qu'il peut. Toutesfois il fut descouuert par les ennemis, qui firent fortir fur luy le Capitaine Tybere, avec ses harquebouziers Italiens : lesquels prenans les lieux auantageux pout tirer à couuert, n'abandonnoyent la faueur de leurs murailles. A cete cause monsieur d'Ande-

lot fit auancer le Capitaine la Prade, avec vingtceinq harquebouziers des fiens, pour les aller attirer. Mais en fin voyant que les ennemis ne s'auançoient en forte que ce fust, il enuoya encor le Capitaine Lucenet, avec soixante foldats, leur donner vne charge, iusques la part ou ils estoient : ce qu'ils firent, & allerent iusqu'à quarante pas pres. Puis selon qu'ils estoient instruits, se retirerent à toute course : qui esmeut les ennemis de s'esbranler pour les pourfuyure. Mais monsieur d'Andelot, qui ce pendant s'estoit auancé, les chargea si à propos, qu'ils ne peurent se retirer si hatiuement dans leurs barrieres, qu'il ne les enfonçast, executant ceux qui se trouuerent en chemin, avec vne si grand celerité & hardiesse, que les ennemis etonnez & presséz fermerent leur porte, par laquelle ils ne firent aucune saillie depuis, tant que dura le siege, mais fut deflors terrassée & condamnée : & ainsi dix de leurs foldats, qui s'etoient trouuez plus pesans à la retraite, demeurerent enuelopez : fix dequels furent retenuz prisonniers, & les autres se ietterent dans le fossé : Ou deux des nostres les voulans suyure, sans ce qu'il leur fust commandé, furent fort blesez, l'un d'une mousquetade qu'il receut en l'épaule, dont il mourut quatre iours apres : & l'autre d'une harquebouzade dans le bras gauche. Ce pendant que monsieur d'Andelot, executant vaillamment son entreprise, batoit de ce costé les Anglois, monsieur de Dessé leur auoit tant donné d'affaires de la part de l'abbaye de Northberriq, & les auoit rembarrez tant de fois, qu'ils ne firent plus de mine de nous venir reueoir de tout ce iour. Partant chasque compagnie se retira au quartier, qui luy estoit distribué, sans entreprendre autre chose iusqu'à la nuit, qu'accomoder le logis, & commencer quelques ruelins, flancs, & tranchées aux auenues de nostre camp.

DESCRIPTION DV PLANT DE LA FORTRESSE
D'EDIMTON.

CHAPITRE HUITIESME.



Le plant du fort d'Edimton est tout quarré, & assis au milieu d'une plaine raze & basse, n'ayant montagne ne colline qui luy puisse commander. Il est clos d'un large fossé à fonds de cuue, & d'une bonne & forte courtine de gazons de grosse terre, remparée de spacieux rempars, & appropriée de bons & feurs parapets : aux quatre coins de laquelle sont assis quatre fors boulevards, se mirans l'un l'autre, dont le dessus peut commodement servir de plateforme, pour enpecher la reconoissance des plus dangereux endroits : sur le derriere desquels, mesinement ou la campagne est plus decouverte, sont releuez plusieurs terrins en façon de raelins & de plateformes, sans reueture, ou les Anglois auoient mis en baterie plusieurs pieces moyennes, pour nous trauailler voulans asseoir nostre camp. Et au dessus des desenses auoient basti avec fascines une courtine, ou leurs harquebouziers pouuoient seurement tirer à couuert. Derriere, & contre le rampart de la premiere muraille est un profond fossé bordé d'une forte courtine, quatre couillons aux quatre coins, faits en maniere de tourrions, seruans de defenses & clousture au dongeon & cors de logis. Et entre le bord du fossé & la courtine de ce dongeon, sont plusieurs Casmates enleuées à fleur du premier rempart, que l'artillerie ne sauroit toucher : dedans lesquelles on peut atiltrer harquebouziers, pour la defense du second fossé : de forte encor que les couillons seruans de defenses à la muraille du dongeon eussent peu estre minez à force de coups de ca-

non, ces Cafmates pouuoient feruir de cet office, avec la comodité des faulſes brayes qui ſont entre deux. Et quant au dongeon, il ne peut eſtre batu que d'un coſté, duquel eſt la riuere dé Thim : & ſur le rarnpart duquel au lieu le plus dangereux eſt enleué vn caualier, qui garentiſt le logis & les foldats. Au demeurant le dedans du fort eſt tant ſpacieux & commode qu'on ſ'y peut facilement retirer, ranger en bataille, & reparer, s'il eſt beſoin. Les Anglois auoyent edifié ce fort en la façon qu'auons dit, & auoient pris Edimton en main (à mon iugement) d'autant qu'il eſt en fertile & bonne aſſiette de pays, & en endroit pour traauiller & porter grand doinnage aux Eſcoſſois, etant comme au cœur d'Eſcoſſe. Mais ie ne ſçay s'ils conoiſſoyent que ces belles commoditez etoyent accompagnées de cete neceſſité, qu'ils ne pouuoient eſtre ſecouruz & auitaillez, qu'avec vne armée. Pource, comme auons deſia dit, qu'il eſt au milieu de l'Eſcoſſe : & qu'ils ne tenoyent entre leurs mains les places, qui pouuoient eſtre propres à leur retraite : & que la mer n'en approche qu'à deux lieuës pres.

COMME LES ESCOSSOIS ARRIUERENT À EDIMTON :

ET DE QUELQUES AUTRES ESCARMOUCHES, QUI

S'ATTAQUERENT AVEC LES ANGLOIS, DURANT LE SIEGE.

CHAPITRE NEUFIESME.



A guerre ainſi aſprement commencée contre les Anglois d'Edimton, & qu'on ſçeut que monſieur de Deſſé auoit arreſté d'y continuer le ſiege, les Eſcoſſois, qui demeurent aux iſles d'Orcanet, qu'ils appellent ſauuages, & ceux qui habitent la partie de midy ſ'afſemblerent à Edimbourg en grand nombre, & de là obeiſſans à la Reyne nous vindrent trouuer à Edimton, ou ils

nous firent bonne compagnie quelques dixhuit ou vingt iours, & se trouuerent aux escarmouches plusieurs fois, mesmes à l'heure qu'ils arriuerent en nostre camp : car ils n'auoient encor pensé de leurs logis, que cinq ou six cens se desfroberent de la grosse troupe, & tous ferrez (comme est leur accoutumance d'aller à la guerre) coururent teste baissée iusqu'aux portes d'Edimton, armez de leurs iacques, & ayans chacun d'eux vn grand arc au poin, & leurs carquois, espées & boucliers penduz en escharpe. Quelques sauuages les suyurent, ainsi qu'ils font nuz fors que de leurs chemises taintes, & de certaines couuertures legeres faites de laine, de plusieurs couleurs, portans de grands arcs, & semblables epées & boucliers que les autres. Là chacun d'eux montra euidentement, qu'ils ne craignoient point les Anglois : car apres auoir repoulsé leur guet à coups de fleches, mirent les epées au poin pour se ioinde à cinq ou six cens hommes qui estoient à la garde entre la porte d'Edimton & les barrieres : mais l'espouuementement non accoutumé de l'artillerie de la ville fit tourner le dos aux sauuages, lesquels se bouchans les oreilles se iettoient le ventre contre terre, pour la moindre piece qui tiraît : Ce qui incita emuiron trois cens Anglois de s'esbranler pour les suiure. Mais le Capitaine Linieres se rencontra deuant eux, avec soixante foldats, qui les arresta tout court : car il les chargea par flanc avec vingt cinq harquebouziers des siens, ce pendant que monsieur d'Andelot, excellent qu'il est en toutes conditions dignes de louange avec quarante ou cinquante gentilshommes, qui estoient fortiz de sa tente avec luy, pour aller visiter les tranchées, les enfonça de sa premiere charge si viuement, qu'il les força d'auoir recours à leurs barrieres, ou ils entreprendrent faire teste. Là le seigneur de Duffac, gentilhomme Lymosin, alla choisir vn Anglois, qui l'auoit bleffé cinq ou six iours parauant, & d'vn coup de hallebarde l'abatit mort par terre, puis se retira à la troupe de monsieur d'Andelot, lequel ayant fait ce qu'il auoit entrepris, gagna noz tranchées sans aucune perte. Peu apres monsieur de Delfé armé à la soldade, avec

messieurs Strozzi, d'Andelot, de la Chappelle de Biron, d'Ouartis, & bien vingt autres gentilshommes, allerent reconoistre les lieux ou on pourroit mieus dresser la baterie : d'autre part le Capitaine Gaillard, sergent maior, & les Capitaines Gourdes, & Argenlieu, avec chacun vingt cinq harquebouziers, etoyent allez debuſquer quelques foldats Italiens, qui ſe tenoyent dans vne tranchée couchez ſur le ventre, & harquebouzoient ceux qui s'aprochoient, pour reconoistre la courtine : ce qu'ils executerent d'une merueilleuſe hardieſſe : car ſeparez & epanduz allerent en diuers endroits de la tranchée des ennemis, leur tirer force harquebouzades, tellement qu'ils les contraignirent ſe tetirer dans la ville. Et apres que monſieur de Deſſé eut reconu toutes choſes à ſon aiſe, & comme il ſe retiroit, eut le paſſetemps d'une entrepriſe, que fit vn ſauuage de monſieur le Conte d'Arquil, lequel ayant longuement conſideré les façons de faire des foldats François, & comme hazardeuſement ſans crainte ne d'artillerie ne de la mort meſmes ils alloyent chercher les ennemis juſques dans leur fort : ſ'eſmeut finalement droit à vne troupe d'Anglois, qui faiſoyent teſte à quelque petit nombre de François, que conduiſoit le Capitaine Voquedemar, & en ſurprit vn de telle viteſſe, qu'on ne le ſçeut empêcher qu'il ne le chargeaſt ſur ſes epaules, & qu'en ce poinct il ne l'aportaſt dans noſtre camp : ou on peut veoir qu'il l'auoit mors en l'épaule ſi aſprement, qu'il en cuyda morir. Monſieur de Deſſé donna au ſauuage vn bon iaques, & vingt eſcus, qu'il montra avec tous les ſignes qu'il peut d'accepter de bon cœur. Comme juſques vers les oiſeaux, ſ'il faut parler en Poëte, cete vniuerſelle peſte a touſiours heu ie ne ſçay par quel deſtin telle & ſi puiſſante propriété, qu'il ne reſte creature vivante qui ne l'adore, comme choſe diuine deſcendue du ciel.

DES APPROCHES ET BATERIE D'EDIMTON.

CHAPITRE DIXIESME.



Le ne fut fait autre chose digne de memoire de tout ce iour & iusqu'à la nuit ensuyuant, que huit ou neuf cens pioniers Escossois, conduits par le feigneur de la Chappelle, commencerent à faire vne tranchée à main gauche de la porte de l'abbaye, ensemble des trauerfes pour y estre en plus grande seurte, & mieux à couuert de l'artillerie des ennemis. Cete mesme nuit quelques foldats sortirent d'Edimton : lesquels venans pour reconoistre la tranchée qu'on faisoit, furent vaillamment repouzez par messieurs Strozzi, & d'Andelot, lesquels y passoyent ordinairement la meilleur & plus grand part de la nuit : & y perdirent les ennemis neuf foldats, qui y furent tuez sur le camp.

Le lendemain & par quatre ou cinq iours ensuiuans les Anglois firent diuerfes faillies, cuidans nous trauailler : ou se dresserent maintes belles escarmouches, en l'vne desquelles monsieur le Marechal Strozzi, personnage non moins hardy & vaillant que sage & entendu, fut fort blessé d'vne mousquetade. Mais ce me sembleroit chose superflue de les ramenteuoir par le menu : car il suffira de dire qu'en tant de combats, qui y furent attaquez, n'y en eut vn seul qui ne tournast au desauantage & grand confusion des Anglois : & ce par la souueraine prudence de ceux, par lesquels les affaires se conduisoient avec si bon ordre, tel conseil, & diligence, que monsieur de Dessé se pouuoit vanter auoir en son armée autant de foldats, que de personnes.

En ces entrefaites vn Italien de la garnifon d'Edimton fe vint rendre à nous, & donna aduertiffement à monfieur de Delfé, que les ennemis n'auoient viures, n'autres munitions de guerre dans Edimton, qui peuſſent baſter pour douze iours : affurant ces chofes eſtre vrayes à pene de fa teſte. Qui fut cauſe, que monfieur de Delfé, pour auoir au parauant receu pluſieurs ſemblables aduertiffemens, fit haſter l'œuvre des tranchées tant qu'il fut poſſible : leſquelles ſe trouuerent tant auancées, que deux iours apres on vint au pié d'un Boulouard, lequel on entreprint par ſappe, avec tel deuoir & diligence, que les Capitaines Linieres, Voquedemar, Duſſac, Ferrieres, Guerin, le ieune Cobios, & pluſieurs autres gentils-hommes, & bons foldats monterent pluſieurs fois deſſus : Meſmes vn ſoldat Guafcon aſſez mal empoinct y banda par deux fois ſon arbaleſte, & tira à ceux de dedans autant aſſurement, que s'il euſt tiré au gibier pour ſon plaifir, et retourna à nous ſain & diſpoſt.

Et enuiron vnze heures du ſoir on fit les aproches des gabionades, ou furent faites canonieres pour loger ſix pieces, deſquelles on donna vn reueil à ceux d'Edimton des l'aube du iour, contre le pan du mur d'entre la porte d'Edimbourg, & le Boulouard de Tyberi, & aux parapects des courtines, ou etoyent atiltrez quelques mouſquets & harquebouzes à croq, leſquelles nous tiroient ſans intermiſſion.

Noz ſix pieces tirerent ce iour trois cens quarante coups, tant contre le pan du mur, qu'aux parapects, leſquels furent fort endommagez : mais quant à la courtine, elle ne ſe trouuoit encores gueres minée de ce commencement de baterie, à cauſe qu'elle etoit de merueilleuſe epeſſeur, & bien remparée par le dedans de groſſe terre, ou les boulets alloient mourir, et telle, que ie l'ay decrite cy deuant, au plus pres de la verité, & le plus curieufement qu'il m'a été poſſible.

Or pource qu'il ne ſembloit point, que la baterie eut beaucoup endommagé ce pan de mur qu'auons dit, monfieur de Delfé fit la nuit enſuyuant tranſporter noz gabionades vn peu plus bas, enuiron à foixante pas

de leur fossé : ou noz pieces tirerent en baterie enuiron deux cens coups.

Mais voyant monsieur de Dessé que toutes ces choses ne luy profitoyent, mit en auant au conseil que lon deuoit donner l'assault, & qu'il estoit en volonté d'y aller des premiers, & de laisser sa charge pour ce coup au seigneur de la Mailleraye.

“ Monsieur de la Mailleraye (disoit monsieur de Dessé) est suffisant, & capitaine de cinquante hommes d'armes, comme moy : & me fay fort, que le Roy l'aura agreable : Car quand les choses viennent à bien, elles sont tousiours louées pour bonnes : & nulle chose est impossible aux hommes de vertu, quand ils se veulent determiner à l'entreprendre. Les Anglois ne sont point en si grand nombre dans Edimton, si nous venons aux mains avec eux, que ne les emportions. Car ils conoissent fort bien, quels nous sommes, & qu'ils ne sont en rien à comparer à nous, de vaillance & hardiesse.”

Plusieurs, qui assistoyent au conseil, se conformerent à l'auis de monsieur de Dessé : & de fait chacun se tint prest pour y aller. Mais toutes choses considerées & debatues, fut arresté en fin, que l'assault ne se deuoit donner en sorte que ce fust, pour ne hazarder ce petit nombre d'hommes, qui etoyent passez en Escosse : lesquels deffaits, auant qu'on en eust recouuert d'autres pourroit suruenir de grans inconueniens au pays : dequoy le Roy ne seroit content, d'entendre qu'on auroit ioué à quicte ou double, sans que la necessité nous eust contraincts à ce faire. Ioinct que l'on n'estoit encor bien assuré de la volonté de tous les Escossois, bonne part desquels auoyent esté practiquez par les Anglois, & attirez de leur part.

COMME LES SEIGNEVRS DE BREZÉ, ET DE
VILLEGaignon CONDUIRENT EN FRANCE MADAME
MARIE, REYNE D'ESCOSSE.

CHAPITRE VNZIESME.



Ntre tant de persequutions & tristes euenements, que les Escossois auoyent portez & soufferts, depuis la mort du Roy Iacques, cinqiesme, leur tresbon & vertueux Prince, ils n'auoyent encouru inconuenient, qui ne fust reparable en quelque forte. Mais ce mal'heur eust été sans remede, s'ils se fussent alliez des Anglois, selon qu'il auoit été practiqué par les ennemis, & pris complot de le consentir par euxmesmes. Car entre les causes des ruines des republicques cete-cy en est vne des premieres & principales, auoir donné leur estat entre les mains d'un ancien ennemy: lequel fera tousiours alors sentir sa mauuaise intention, quand il aura rendu ses forces egales à sa volonté.

Parlons doncques de la Reyne douairiere d'Escosse, laquelle faisoit garder la Reyne sa fille au chateau de Dombertram, lequel pour estre assis sur vn hault & inaccessible rocher, & pour autres circonstances est estimé de tous ceux, qui l'ont veu, inexpugnable. D'autre part en vn recoin d'Escosse fort eslongné d'Angleterre. Mais ce qui l'assuroit & fortifioit d'auantage, estoit vn bon nombre de gentilshommes François, vertueux & hardis, qui etoyent establis à la garde de la Reyne: lesquels faisant leur deuoir ne permettoient l'entrée à personne viuant, qu'à ceux, qui apportoient lettres de la Reyne douairiere: laquelle comme elle est

vne des plus sages Princeſſes de la terre, ayant ſceu faire trouuer bon aux Princes & grans ſeigneurs du Royaume, que la Reyne ſa fille fuſt conduite en France, pour eſtre nourrie aupres de la Reyne, donna ordre que Villegaignon (perſonnage tres digne, auquel on commette vne charge d'importance) partiſt de la rade du petit liët, avec quatre galleres, lequel ayant ſainct de prendre la route de France entra en la mer Germanique & Pethelantique (qu'ils appellent) ou ayant coſtoyées les trente Iſles des Olchades en moins de tems qu'on n'eſperoit qu'il le peuſt faire, arriua à Dombertram ayant fait vne nauigation, que galleres n'auoyent iamais fait : auſſi font elles mal conuenables à reſiſter aux impetuofitez de cete mer, à cauſe des marées qui y font merueilleuſement fortes, & des tourmentes qui y font continuelles. Auſſi ne ſe doutoyent les Anglois, qu'elles peuſſent tenir cete route : leſquels auoyent creu, & penſoyent de croire le vray, qu'il étoit force de paſſer par le pas de Calaix, à qui voudroit nauiguer en France : auquel lieu ils attendoyent noz galleres, en ferme deliberation de les detrouffer, ſe confians au grand nombre de leurs vaiſſeaux.

Le ſeigneur de Villegaignon arriué à Dombertram, comme dit eſt, trouua la Reyne douairiere : laquelle, comme trefuertueuſe qu'elle eſt, ayant pourueu à tout ce qui étoit neceſſaire pour le voyage de la Reyne ſa fille, la fit embarquer dans la galere Reale, ou étoit le ſeigneur de Brezé, vaillant & treſſage gentilhomme, lequel auoit été deſpeché expreſ par le Roy, pour conduire cete Princeſſe, laquelle pouuoit eſtre aagée alors de cinq à ſix ans, vne des plus parfaites creatures, qui iamais fut veüe, & telle que des ce ieune aage avec eſmerueillables & louables commencemens elle ha donné ſi grande attente de foy, qu'il n'eſt poſſible de plus eſperer de Princeſſe de la terre.

Mais il peut ſuffire de cecy, pour ce que j'ay à continuer mon propos des premieres entrepriſes de guerre, qui furent faites ſur les Anglois.

PAR QVELLE RVSE LES ANGLOIS SECOURURENT
EDIMTON.

CHAPITRE DOUZIESME.



Pres donq que la derniere deliberation du conseil, qui estoit de ne donner l'assault, fut publiée par le camp, fut pris par noz sentinelles vn matin deuant iour vn goyat fortant d'Edimton, lequel confessa liberalement qu'un Italien, son maistre, l'auoit enuoyé à Edimton, donner aduertissement à Tybere, qu'on ne luy donneroit point d'assault, & qu'il s'aydast de cet aduertissement, pour garder l'honneur du pays. Ce Tybere estoit vn capitaine Italien, qui auoit charge de trois cens hommes de pié, au seruice de l'Anglois, & (comme bon & vigilant foldat, qu'il estoit) d'un des Boulouards de la place, lequel il auoit dextrement fortifié du costé de la ville, pour ne tumber es mains des François en la furie de l'assault, esperant puis apres faire quelque honorable composition. Mais quand il eut receu ces nouuelles, il en sceut si accortement faire son profit, qu'il ne demandoit que sa compagnie, pour deffendre la bresche, & tonte la ville. Ce que Ser Ian Oilfort, leur general, ne pouuoit bonnement prendre en payement : car il conoissoit la furie des François. Desquels, pource qu'en chose tant creable ie puis tesmoigner des louanges de ma nation, i'oseray laisser à la posterité, que, depuis qu'ils ont esté dressez & aguerriez par nostre trefuictorieux Roy Henry deuxiesme, ils ne sont soutenables par difficulté de bresches, tranchées, ou rempars, ne par le tonnerre de toute l'artillerie de l'Europe. Toutesfois persuadé le general d'Edimton de l'importunité de Tyberi, s'assura en forte, que l'occasion nous eschappa pour cete fois d'emporter la place.

En ces entrefaites monſieur de Deſſé, qui voloit euitier, que les Anglois d'Edinton ne fuſſent ſecouruz par tems de nuit, faisoit ordinairement tenir à cheual ſur vne des auenües de noſtre camp ſa gendarmerie, & la caualerie du ſeigneur d'Etauges : ſe promettant que de l'autre coſté les Eſcoſſois feroient ſi bon guet, que du moins ils l'aduertiroyent, s'il ſuruenoit quelque choſe. Ce neantmoins les ennemis, qui auoyent de longue main fait practiquer & marchander le paſſage, entreprirent de ſecourir leurs compagnons d'Edinton de deux cens hommes, et de quelques munitions de poudres, boulets, & viures plus neceſſaires. Dequoy étant aduerty monſieur de Deſſé, comme il etoit vigilant, ſage, & liberal, en l'entretien de ſes eſpions, vint des tranchées (ou il paſſoit bonne partie de toutes les nuits) la part ou etoit ſa gendarmerie, & la caualerie du ſeigneur d'Etauges, faire entendre à tous, qu'on etoit venu aux termes de combatre, & monſtrer par eſſect aux Anglois, que, ſi les François ſauroient ranger à la raiſon ceux, que les murailles & l'artillerie fauoriſent, ils ſont encor accoutumez à vaincre ceux, qui s'oſent rencontrer avec eux en la campagne. Monſieur de Deſſé, ayant pris le chemin que venoyent les ennemis, etoit pour ſe trouuer entre eux & la ville, ainſi qu'un Eſcoſſois, nommé l'homme à deux teſtes, luy fit croire avec mille iuremens & proteſtations aſſez vray ſemblables, qu'il deuoit aller trouuer monſieur le Conte d'Aram, par vn autre chemin, qu'il luy monſtra, à fin, comme diſoit cet homme à deux teſtes, qu'ils allaſſent enſemble trouuer le ſecours des ennemis, qui etoit encor à plus de trois lieuës, ce qui etoit faux. Mais pource que c'etoit auant iour, que lon ne pouuoit deſcouvrir les ennemis, monſieur de Deſſé donna foy à l'aduertiſſement de ce ruſtre : qui fut cauſé, que par le meſme chemin, qu'il auoit laiſſé, ce ſecours entra dans Edinton, avec autant d'allegreſſe, qu'il nous demeurait d'ennuy & de regret, que deux cens hommes ennemis euſſent trouué l'oportunité de paſſer avec train & bagage, à deux cens pas de huit mil Eſcoſſois, ſans auoir trouué qui eſſayaſt d'empêcher leurs deſceins.

DE LA MANIERE DE PROCEDER DES ESCOSSOIS AU FAIT DES ARMES : DE L'ADUERTISSEMENT, QUE RECEUT MONSIEUR DE DESSÉ, DES ENTREPRISES DES ENNEMIS : ET DE L'ORDRE, QUE MIT LE SEIGNEUR D'ANDELLOT, À DRESSER ET AGUERRIR LES SOLDATS DE FRANCE.

CHAPITRE TREZIESME.



Eu apres que l'homme à deux testes, qui estoit de ceux qui auoyent intelligence avec le Conte Lennault, eut ioué le personnage qu'auons dit, tous les Escossois se retirerent, fors quelque cinq ou fix cens lancettes des compagnies de messieurs les Contes d'Aram & d'Otonlay. A ce propos il me semble, qu'il ne sera deuenable, si ie ramantoy que les Escossois ne se iettent iamais aux chams, si grande & extreme necessité ne leur fait prendre les armes. Et encores de ce que i'en ay peu veoir, pource qu'ils sont accoutumez de viure à la guerre sans souldre & à leurs propres cousts & despens, ne peuuent temporiser en faits de guerre, comme sont presque toutes les autres nations de l'Europe. Ils portent leurs choses necessaires selon le tems qu'ils veulent estre en vn camp, ou à faire leurs courses, qui est de peu de iours : pendant lesquels ils cherchent de se rencontrer avec leurs ennemis, qu'ils combattent avec vne inuincible obstination, principalement les Anglois, à cause de la haine naturelle, qui est entre leur voisiage, prouenant (à mon iugement) de l'ambition de voloir dominer, & de la ialouzie de leur grandeur. Puis si tost qu'ils ont consommé leurs

La façon de
proceder des
Escossois au
fait de la
guerre.

viures, ils'rompent leur camp : ou se retirent les vns apres les autres, quand bien ils n'auroient rien exploicté de leurs desceins.

Les Escossois donc deslogez de nostre camp, il vint auertissement à monsieur de Dessé des deliberations que faisoient les ennemis de nous venir leuer le siege. Parquoy il despescha gens de toutes parts, pour auoir encores plus seures nouuelles des entreprises des Anglois. Et ce pendant il auertit les Capitaines, de se tenir sur leurs gardes, sans leur declarer autrement ce qu'il auoit appris des ennemis. Car (ainsi qu'un prudent & accort Capitaine doit tousiours faire) sachant combien la necessité est profitable aux actions humaines, & à quel bon heur elle les ha maintes fois conduittes : il celoit l'entreprise des Anglois à ses soldats, à fin de les reduire à cete contrainte, qui les pouuoit rendre plus obstinez au combat. Mais il enuoya communiquer le tout à la Reyne douairiere, laquelle pour lors estoit à Edimbourg : & le fit entendre aux seigneurs Pierre Strozzi, d'Anelot, Conte Rimgrau, & à quelques autres, sans lesquels il ne faisoit aucune resolution : & renuoya la grosse artillerie à Edimbourg, retenant six pieces legeres de campagne. Et ce pendant que le seigneur d'Anelot, & le Conte Rimgrau, à fin d'oster aux Capitaines de leurs bandes toute occasion de legere excuse, donnoient ordre qu'ils tinssent eux & leurs soldats armez à toute heure : enioignans aux mesmes soldats, de n'abandonner leurs quartiers, sur pene de la vie : Monsieur de Dessé faisoit continuer en fort grande diligence l'œuvre des ruelins & rempars, qui etoyent commencez, pour fortifier nostre camp. Et pource que les bandes Françoises, hors mis quelque peu, auoyent été nouuellement leuées, le seigneur d'Anelot continuoit de les dresser & aguerrir sans intermission. Autant en faisoit le Conte Rimgrau de sa part, formant es soldats par tel moyen vne perfection de la discipline militaire, à laquelle ne deffailloit le vray exercice. Pource que ceux d'Edimton iettoient aux chams à toute heure gens de pié & de cheual, qui venoyent courir iusqu'à la garde de noz tranchées, & iusqu'à nostre

guet : ou se trouuoient tousiours tant de gens de bien, que les ennemis ne pouuoient si bien faire, qu'ils se retirassent vne seule fois dans leur fort en tel nombre qu'ils en etoyent fortis : & s'il auenoit qu'ils se hazardassent de l'eslonguer plus que d'une mousquetade, les gendarmes de monsieur de Dessé, sa caualerie, & celle du seigneur d'Etauges (part desquels estoit tousiours à cheual hors du camp) leur donnoient la chasse, suyuant l'exécution, iusques à leurs portes : ou ceux, dont les guilledins n'estoyent des plus vistes, etoyent mal traitez.

En ce tems les seigneurs de Humes & de Dunes & le Capitaine Pierre Longué (lesquels auoyent esté deux iours deuant despeschez auec enuiron trois cens cheuaux, pour aller iusqu'à Ronssébrou) ayans sceu accortement trouuer les moyens d'entendre au vray la deliberation des ennemis, rapporterent certaines nouuelles de leur venuë, & qu'ils auoyent logé la nuict precedente à Annuicq, qui est vn fort bon village, ou est vn chasteau de grande estendue, basti à l'antique, de grosse massonnerie, du domaine des Roys d'Angleterre.

En mesme heure vindrent deux espions, l'auertissement desquels se conformoit à ce rapport, A cete cause estimant monsieur de Dessé que plusieurs ne deuoient estre conduits par l'opinion d'un seul, mais que celui qui commande à vn grand nombre d'hommes, doit prendre l'opinion de plusieurs : fit appeller en son pauillon le seigneur Pierre Strozzi, les seigneurs d'Andelot, de la Mailleraye, d'Oysel, le Conte Rimgrau, & la meilleur part des Capitaines : suyuant l'opinion desquels, il conclud qu'il n'iroit point au deuant des ennemis, tant pour estre bien auerty qu'ils tenoyent leur chemin par les montagnes, par lesquelles il seroit malaisé de conduire nostre artillerie & bagage : & que la laissant en nostre camp, il y faudroit laisser aussi vne partie de noz forces : qui seroit grandement à nostre desauantage. Ioinct que nous estions en endroit fort auantageux pour les attendre : ou toutesfois les ennemis ne faudroyent de nous venir assaillir, estimans que ce, qui nous auroit empes-

ché de les aller trouuer sur le chemin, auroit été de crainte qu'aurions heu de leurs forces : qui seroit bonne occasion de faire entrer es esprits de noz soldats, vne neccessité de combattre, avec grande obstination : sur laquelle on peut toufiours fonder l'esperance de la victoire.

EXEMPLE DE SINGVLIERE VERTU EN LA REYNE MARIE, DOUAIRIERE D'ESCOSSE.

CHAPITRE QUATORZIESME.



I tost donq que la Reyne eut receu l'auertissement de monfieur de Delfé, fachant qu'un grand nombre de foldats François etoyent à casaner à Edimbourg, & que les Escossois, pour la plus part, s'etoyent retirez en leurs maisons : Curieuse du salut de tant de gens de bien, qui etoyent demeurez au siege d'Edimton, prests de despendre leurs vies à son seruice : Elle commande que tous les gentilshommes de sa maison, & les autres seruiteurs, ceux qui pouuoient porter armes, allassent diligemment au camp, sans en retenir aucun pour son seruice. Par eux elle enuoye aux gens de guerre grande quantité de pains, de vin, de biere, & de chairs : donnant charge aux plus suffisans de ses gentilshommes, de porter de sa part cete parole aux foldats.

“ Qu'elle n'entendoit leur faire present de si peu de chose en payement du seruice qu'elle esperoit d'eux : mais qu'ils se fissent croire sur sa promesse, qu'elle employroit tous les moyens, que Dieu luy auoit laissés en la main, & puis la faueur de tous ses amis ensemble, plustost qu'elle ne reconust suffisamment les merites d'un chacun.”

Ces dons & promesses receuz avec gaillarde volonté de tout le camp,


mesmement qu'ils venoyent de la liberalité de la Reyne, accreurent merueilleusement les cœurs.

“ Aussi n'est ce chose desconuenable, que les gens de bien foyent incitez aux vertuz, avec promesse de recompense : & estime qu'un Prince soit plus cherement aymé de ses gens de guerre, pour les presens qu'il leur fait, que pour la soulde, qu'il leur ordonne.”

Mis ordre qu'elle eut à ces choses elle monte à cheual, & sans autre compagnie que de ses Damoiselles, elle cherche toutes les maisons d'Edimbourg, & ainsi qu'elle trauerfoit la grand rue, elle rencontra plusieurs Escossois, auxquels remontrant le deuoir, elle disoit en leur langage, avec termes modestes & graues.

CONCION DE LA REYNE DOUAIRIERE D'ESCOSE, AUX ESCOSSOIS.

CHAPITRE QUINZIESME.

“  St-ce ainsi, mes amis, que vous fecondez les François ? Est-ce ainsi que vous leur estes exemple de bien faire ? Sus mon Dieu, si autre, que mes yeux, m'eust dit qu'eussiez ainsi voulu oublier vostre honneur, ie luy eusse donné aussi peu de foy, qu'à vne chose incroyable. Vous ayant attribué tant de louange toute ma vie, que ie pensois, & pense encor de croire le vray, que nation de la terre ne se deust egaller à vostre vertu. Il peut estre toutesfois, mais ie croy qu'il soit ainsi, que soyez venuz en cete ville pour vous equipper d'armes & de cheuaux, & non pour fuir le combat de noz ennemis.

“ Par tant, pource que ie me fais croire, que ne voudriez tumber en
 “ quelque reprochable faute, ie vous auerty que nous aurons la bataille
 “ à Edimton dedans deux iours. A celle fin aussi que n'ayez à vous re-
 “ pentir puis apres, d'auoir failly à vous trouuer en lieu si à propos,
 “ pour venger sur les mesmes perſones, qui vous ont offensez en tant de
 “ fortes, la mort de voz parens & amis, & reparer le degast de voz biens
 “ & heritages.”

CONTINVATION DE LA PRUDENCE DE LA REYNE
 DOUAIRIERE D'ESCOSSÉ.


CHAPITRE SEIZIESME.



L'estime qu'il n'est chose plus conuenable aux Princes excellens, qu'une telle prudence, par laquelle la Reyne douairiere d'Eſcoſſe ayma mieux pourueoir & remedier à gagner les Eſcoſſois, qui les contraindre à faire leur deuoir par vne ſuperbe violence. Elle vſa d'un autre moyen avec les ſoldats de France, qui ſe trouuerent pour lors à Edimbourg. Car les trouuant en aſſez plus grand nombre, qu'elle n'auoit penſé, & peſant de quelle conſéquence pourroit eſtre le gain ou la perte d'une bataille, aux termes ou elle ſe trouuoit reduitte blaſma fort cete façon de faire en perſones ayans les armes en grand pris & eſtime.

CONCION DE LA REYNE DOUAIRIERE D'ESCOSSÉ,
AUX FRANÇOIS.

CHAPITRE DIXSEPTIESME.

E m'esbais fort (leur difoit elle) puis que vous eftes entrez fi auant en la pourfuitte de l'honorable entreprife des armes, que ialoux de voftre renommée, vous n'avez efgard à ne vous priuer du plus grand honneur, que tous les hommes fauroient auoir. Les Anglois viennent, avec quatre ou cinq mille cheuaux, penfans leuer le fiege d'Edimton : mais ou y ha mis tel ordre, qu'avec l'aide de Dieu leurs defceins fortiront effects contraires. Parquoy encor que ne face doubte, que vous cerchiez autre chofe, que l'honneur pour le fallaire de vertu, ie louë que ne laiffiez à vous compagnons toute cete occafion de proffiter, mais bien de confirmer leur gloire, & aneantir la voftre. Car encor que ne fufiez de la partie, ils font affez de vaillans hommes au camp, pour vaincre noz ennemis. Mais en cete forte leurs prouëffes fe feront sentir des Anglois, & voftre infamie fe publiera par tout le monde. Mais nonobftant ce que ie dy faites en ainfi qu'il vous plaira : car félon que la bonté vous oblige, vous ne pourrez faillir en ce que vous deliberez."

DES EFFECTS QV'EVT LA CONCION, QUE FIT LA REYNE
DOUAIRIERE AUX SOLDATS : ET DE L'ORDRE QUE DONNA
MONSIEUR DE DESSÉ EN SON CAMP, POUR ATTENDRE
LES ENNEMIS.

CHAPITRE DIXHUITIESME.



Es paroles de la Reyne eurent si grand force à faire
veoir à ce nombre de soldats ce qu'ils etoyent obli-
gez de faire, qu'une heure apres il n'en demeura un
seul à Edimbourg, (fors quelques malades) & se
trouuerent tous au combat en bons & vaillans hom-
mes.

Telle prudence n'est pas esmerueillable en une Princeesse née avec
toutes les vertuz : & qui ne s'aide d'autre moyen de commander, & se
faire reuerer de chacun, sinon comme plus excellente que tous.

Or ay-ie recité cy dessus, comme le Seigneur d'Anelot s'employoit à
duire ses soldats aux armes, pour se seruir d'eux au besoin : lequel à la
verité estoit si present, qu'il requeroit bien la singuliere diligence de ce
Tulles François, pour dresser & façonner les siens : & l'experimentée
prouidence de monsieur de Dessé, pour conoistre & descouurir les desceins
& deliberations des ennemis. Car ainsi qu'il cerchoit curieusement de
les entendre, aussi sauoit il bien en faire son profit en temps & lieu.

Il auoit conclud (comme auons desia dit) qu'il attendroit les Anglois
en son camp. Parquoy des le soir, qui precedoit le iour de la bataille,
il commanda que nostre caualerie Françoisse fist le premier guet sur la
montagne, qui est sur le chemin des ennemis : & que partie des Escos-

fois, qui etoyent demeurez au camp, feroient vne autre garde à costé des François, à fin qu'ils peussent mieux secourir l'un l'autre, s'il estoit besoin : & que la gendarmerie & le reste des Escossois les iroyent releuer apres minuit.

Il ordonna d'autre part, que quatre enseignes d'Allemands feroient la garde aux tranchées par ranc : Semblablement que quatre compagnies Françoises garderoient nostre camp : & que le reste reposeroit les armes en dos : Estimant, avec Scipion African, estre vne honte & grande infamie à un capitaine, dire qu'il n'y auoit pas pensé, apres auoir receu quelque perte irreparable, par nonchalance. Monsieur de Dessé mesmes, les seigneurs de la Mailleraye, Pierre Strozzi, d'Anelot, le conte Rimgrau, & tous les autres seigneurs & gens de bonne maison furent toute la nuit en armes, partie à pié, faisant la ronde aux auenuës de nostre camp, & à la garde de nos tranchées : & partie à cheual, visitant le guet, & escoutes posez sur le chemin des ennemis : Lesquels vne heure ou deux deuant le iour, suyuant leur deliberation, commencerent d'approcher nostre camp, estimans nous trouuer endormis, & de pouoir enfoncer nos cors de garde, auant qu'eussions loisir de nous mettre en bataille. Toutesfois ils se trouuerent fort loin de leur comte : Car le Milhord de Humes (personnage de bon seruice, & veritablement digne de toute louange, qui auoit esté depeesché le soir precedent pour reconoistre l'estat de leur armée, estoit retourné deuant iour pour auertir monsieur de Dessé que les ennemis auoyent marché toute la nuit cuidans nous surprendre, & qu'ils ne pouoyent plus estre loin : & suyuant son auertissement, monsieur de Dessé auoit retiré nostre guet de cheual, & sans donner alarme auoit fait de main en main rendre toute la caualerie preste à combatre aux lieux ordonnez de longue main. Le seigneur d'Anelot eut en peu de tems rangé en bon ordre de bataille ses gens de pié François. Le conte Rimgrau dispoisoit de ses Allemands. Et furent toutes ces choses avec peu de pene mises en si bon ordre, que les chefs de l'ar-

mée auoyent occasion de se confier en personnes si bien instruites, & de croire qu'ils n'eussent peu faire mauvais fait. Ce pendant monsieur de Dessé alloit visitant les vns & les autres, deuisant avec tous, leur donnant vne parfaite confiance de vaincre, & les incitant à l'honneur & à la vertu, avec ces paroles.

CONCION DE MONSIEUR DE DESSÉ AUX SOLDATS.

CHAPITRE DIXNEUFIESME.

“ **M** Es compagnons, si l'occasion & la necessité ne nous
 “ rangeoyent à cete contrainte de prendre les armes,
 “ ie serois bien d'auis, que ne deussions attendre
 “ l'ennemy au combat, pour estre en lieu ou la perte
 “ de l'un de nous est inestimable. Mais puis que
 “ seroit vne extreme couardie, ne se monstrier coura-
 “ geux & hardis, lors que l'opportunité offerte nous donne espoir d'em-
 “ porter la victoire, & que l'armée de ennemis est desia si pres de nous,
 “ qu'il n'est plus tems de penser de la retraite : il fault deliberer de nous
 “ defendre iusq'à l'extremité, puis qu'il ne nous reste plus autre espoir,
 “ qu'es armes, & en la grandeur de noz courages. Car ie ne voy point
 “ comme vn seul de tant que nous sommes puisse autrement sauuer sa
 “ vie, soit en fuyant les ennemis, pource qu'ils sont tous fort bien mon-
 “ tez : ou en leur rendant les armes sous espoir de trouuer mercy en eux.
 “ Car i'ay heu certain auertissement que Milhord Bault ha iuré plufi-
 “ eurs fois en presence du Duc de Sommarfet (faisant estat de nous tenir
 “ enchefnez) que ceux de nous seroyent bien heureux, qui mourroyent
 “ en la furie de la bataille, si nous auions la hardiesse de les attendre.

“ Car ils deliberoient de luy faire vn present du reste, pour dressez les
 “ charmes des roberges de leur Roy. Mais ie suis assuré que nous les
 “ attendrons, & que, tout au contraire de ce qu'ils fongent, ils feront
 “ gens pour remplir noz galleres, & nous les executeurs de la iustice de
 “ Dieu, qui leur ha de long tems ordonné cete pene pour iuste penitence
 “ de leurs faultes. Aussi vous pourroy-ie bien dire les auantages, que
 “ nous auons sur noz ennemis. Mais plus tost leur aurons nous passé
 “ sur le ventre, que discouru sur les certains moyens, que j'ay pour en-
 “ porter la victoire. Suyuez moy donc, mes amis, & vous efforcez de
 “ bien faire, puis que vous auez à qui ressembler. Il n'y ha tranchée,
 “ ne ruelin entre nous & eux : noz armes sont plus fortes & mieux
 “ trempées que leurs iaques, quelques pompeux & dorez qu'ils soyent.
 “ Vous estes plus qu'eux en vertu, bon ordre, & assurance. Et (qui nous
 “ donne vn grand auantage sur eux) ils nous viennent prouocquer au
 “ combat iusques en nostre fort : & nous ont enclos de tous costez, pour
 “ nous reduire à cete necessité de combattre.”

COMME LES FRANÇOIS DEFFIRENT LES ANGLOIS EN BATAILLE, PRES D'EDIMTON.

CHAPITRE VINGTIESME.



Insi que monsieur de Dessé disoit ces paroles, l'armée
 des Anglois se monstra sur la montagne, en deux
 squadrons, qu'on estimoit estre de quatre à cinq
 mille cheuaux, tous bien en armes, & la meilleur
 part à la Françoisé. Et quant aux hommes (exce-
 ptez deux cens Albanois, nourris aux guerres de
 France) tout le reste estoit d'Anglois courtifans, & choisis entre les meil-

leurs de leurs gens de guerre, fort vaillans hommes, & qui s'etoient trouuez en plusieurs grandes entreprises.

Cete armée descouuerte, tous noz foldats commencerent avec gaillardes acclamations à demander la bataille, & à monstrier de toutes parts la bonne volonté que chacun auoit de combatre. Et ce pendant tous les Capitaines de l'armée des Anglois firent vn tour à Edimton. Mais fust pour mettre en deliberation leurs entreprises, ou pour veoir leurs amis, ils errerent grandement : d'autant que, par vn tel temporisement & sejour, ils ne faisoient que refroidir l'ardeur & impetuosité de leurs foldats : & par ce retardement non seulement assuroient les François : mais par cete maniere de proceder ils engendroyent encores en noz cœurs vn certain mespris de leurs forces, & vn pensément, que cete façon de faire ne pouuoit prouenir d'autre cause, que de vilté de cœur, ou bien de peu d'experience du fait de la guerre.

Ainsi donc que les Capitaines Anglois perdoient beaucoup de tems à louer leurs compagnons, de ce qu'ils auoyent si bien sceu garder la place, qu'ils etoient (disoient ils) venuz à fin de leur entreprise, employans tous les vœux & protestations qu'ils peurent penser, à leur vouloir faire croire que ce iour ils verroyent deuant leurs yeux, sans qu'ils s'en empeschassent, la ruine de tous les François qui etoient passez en Escosse. Mais retournons à monsieur de Dessé, lequel ayant receu grand plaisir de l'affurée contenance d'vn chacun, enuoya le seigneur d'Etauges, avec vingt fallades, pour attaquer l'escarmouche : & pour le soutenir, le Conte de Casselles, avec cinquante chevaux legiers Escossois. Ce pendant le seigneur d'Andelot s'auança, non sans sollicitier encor ses foldats de faire leur deuoir, les rangeant en l'endroit le plus auantageux, & s'étant jetté à pié au premier ranc de son bataillon, la picque au point, costoyé de ceux, ausquels il se pouuoit fier, & suyuy de bons & braues foldats, montrans tous celle fiere assurance & bonne volonté, qui estoit plus conuenable pour vaillamment attendre les ennemis.

Le Conte Rimgrauue auoit fait prendre vn autre chemin aux Allemans, & les auoit pofez vn peu plus hault à main gauche de la fanterie Francoife, en intention de charger les Anglois par flanc, ou ils s'adrefferoyent au bataillon du feigneur d'Andelot : ayant fix pieces d'artillerie de campagne au cofté de fon regiment, pour employer fur les premiers qui viendroyent.

Ainfi marchoyent noz deux bataillons de gens de pié en ordre de combatre, l'vn pres de l'autre, coftoyez de noftre gendarmerie & caualerie : fe dreffans plufieurs braues efcarmouches avec les cheualiers d'Angleterre, qui fe laiffoyent volontiers attirer au combat. Et à la verité ils auoyent entre eux plufieurs hommes de valeur, & qui manioyent les armes avec grande adrefle. Ils fe tenoyent ferrément, & montroyent tous contenance de gens experimentez en faits de guerre : temporifans, & quelquesfois renforceans l'efcarmouche, qui etoit attaquée en plufieurs lieux. Car le feigneur d'Andelot etoit forty de fon ranc, avec deux cens harquebouziers, & ayant pris vn tour (comme s'il feuft allé expres pour fonder le guay, qui etoit entre nous & les ennemis) alloit teſte baiffée, pour charger enuiron cinquante cheuaux, qui auoyent paſſé le guay, pourſuyuans ſept ou huit hommes d'armes des noſtres. Mais aperceuant vne groſſe troupe d'ennemis, qui venoyent pour le ſurprendre, il commanda à ſes harquebouziers, de ſe ſerrer enſemblement & de defendre la fuite : puis voyant qu'ils etoyent entrez au guay pour le trauerſer, fait promptement tourner viſage, & les chargea de fi pres, qu'il en feit tumber vn bon nombre, delibérant de faire teſte au reſte, d'vn lieu auantageux qu'il auoit gagné. Ce qu'il feit par l'eſpace d'vn grand quart d'heure, ſans perdre vn ſeul homme, que les ennemis ne le peurent faire demarcher : car c'eſt vn des hardis hommes que l'on ſauroit trouuer, & qui mieux ſoutient vn eſſort au beſoin. D'auantage le feigneur d'Etauges (homme prompt & hardy) s'etoit attaqué avec les Albaſnois, & ſecondé par le Milhourd de Dunes leur auoit donné vne charge,

terraillant & executant ceux qui se rencontroyent, estant suyuy d'un nombre de vaillans hommes, ayans le feu à la teste pour entreprendre toutes choses hazardeuses, & les executer avec vn grand heur & hardiesse. Le lieutenant de monsieur de Dessè, avec vingt hommes d'armes, l'estoit adressé la part ou le seigneur d'Andelot soutenoit soixante ou quatre vingts fallades des ennemis, & les arrestoit à coups d'harquebouzades, en faisant tousiours tumber quelqu'un. Mais eux se sentans chargez de toutes parts par ce refreschissement, commencerent les premiers à se retirer vers leurs squadrons, qui ne fut sans laisser de grans brisées en chemin de leurs gens morts & blesez. Durant ce temporisement les deux armées s'aprochoyent pas à pas, & commençoit nostre artillerie à iouer : & ainsi qu'on estoit sur le poinct de venir aux mains ensemblement, les enfans perduz feirent deux ou trois charges, ou moururent plusieurs des ennemis : vn squadron desquels vint donner furieusement dedans nostre bataillon, ou ils furent si vaillamment receuz à grans coups de picques par les seigneurs, que i'ay nommez, & par ceux qui les accompagnoyent, qu'il ne fut chose aisée de les faucher, combien qu'on ne les fist que soutenir, reseruant l'effort à la fin, quand ils auroyent iette leur feu, & laissé ceste premiere ardeur de combatre : laquelle veritablement eust esté esmerueillable, s'ils eussent eu teste d'autres ennemis que de François. Car monsieur de Dessè, avec sa gendarmerie, & les seigneurs d'Etauges, de Humes, & de Dunes, avec leurs troupes, les chargerent tous ensemblement par flancs sur le poinct que le seigneur d'Andelot les receuoit brauement, les abatant morts par terre à coups de picques & de hallebardes, ayant receu ses harquebouziers entre les rancs : en tenant le reste de ses gens de pié en si bon ordre, qu'ils pouuoient resister main à main aux ennemis : lesquels furent viuement enfoncez par le squadron de monsieur de Dessè, qui (méslé entre deux) en fit telle execution, qu'ils commencerent à diminuer beaucoup de celle ardeur, avec laquelle ils nous etoyent venuz assaillir. Toutesfois on ne veid iamais

mieux combatre, ne refifter plus virilement, qu'ils firent, attendans leur autre ſquadron de gendarmerie, qui eſtoit demeuré pour tenir en crainte noz Allemans : lequel marchant pour les venir ſecourir, le Conte Rimgrau pouſſa ſon regiment, pour leur faire teſte, eſperant leur donner tant d'affaires, qu'ils n'auroyent loifir ne moyen d'aider autrui : mais ils ne s'amuserent à le charger, ny autre part, juſqu'à ce qu'ils feuffent ioincts avec les premiers : & alors ſe renforça le combat : car monſieur de Deſſé, les Milhours de Humes, & de Dunes, & ſeigneur d'Etauges, & tous noz gens de cheual ſe trouuans rafſemblez entreprirent leur faire vne recharge, & de fait les faucerent, en tumbant mort par terre tout ce qui ſe rencontroit. D'autre part le ſeigneur d'Anделot, & ceux de ſon bataillon feirent en cet endroit tant d'armes, que iamais autres n'en feirent d'auantage. Mais celuy fut le comble du deſaſtre des Anglois, que le Conte Rimgrau leur vint donner au trauers ſi rudement, que monſieur de Deſſé pouſſant en meſme heure de ſon coſté, & le ſeigneur d'Anделot furieufement de ſa part, les ennemis furent mis en tel deſordre, qu'onques puis ils ne ſe peurent rafſembler, & alors en fut fait vn eſtrange carnage : car le ſeigneur d'Anделot, le Conte Rimgrau, & leurs batailles les chargeoyent ſi chaudement, qu'ils ne leur donnoyent loifir de mettre ordre à leur fait. Les ſeigneurs, & la plus grand part des foldats, juſqu'aux harquebouziers, auoyent ſacqué les epées au poin, & ſe meſlans entre les ennemis donnoyent aux iarrets des cheuaux, & les epouuenterent en forte, que ce peu, qui ſceut eſchapper de tant de vaillantes mains, tourna le dos fuyant en tel deſordre, que non ſeulement ils etoyent attaints & mis en pieces par les Eſcoſſois, leſquels en ioncherent les chemins de toutes parts, mais encores ſe trouuerent dixhuiët de ces fuyars, armez qu'ils eſtoyent de toutes armes, prins & arreſtez priſonniers par quelques pauures femmes payſantes, depuis deuenues riches du pris de leurs rançons, par le moyen de leur couardie. Pluſieurs autres ſe ietterent entre les bras des François, auſquels on ſauua la vie : & quel-

ques vns, qui se trouuerent mieux à cheual, tournerent vers Edimton, qui furent chaffez par monsieur de Dessé : lequel avec ses gens de cheual (comme est tousiours merueilleuse la furie de la victoire) les venoit recharger de si pres, qu'il ne leur donnoit loisir de tourner visage, les taillant en pieces iusqu'aux portes, ou ils se sauuerent à la faueur de leur general, qui l'estoit avec deux ou trois cens harquebouziers atilré dans les barrieres, & de mousquets & harquebouzes à croq, dont leurs defenes estoient bien fournies. En ceste bataille moururent de la part des Anglois enuiron huit cens hommes, & plus de deux mil furent prins prisonniers, sans qu'il y demeurast quinze hommes des nostres.

Voyant donc monsieur de Dessé, qu'avec tant d'honneur & de gloire il estoit demeuré maistre de la campagne : & faisant iugement, qu'à entreprendre vne chose graue & d'importance ne faut vser de soudaine deliberation : il conclud de ne hazarder sa victoire, & se retirer vers le seigneur d'Andelot, & le Conte Rimgraue, qui le suyuoient diligemment avec les gens de pié, en intention de ne donner loisir aux ennemis de prendre cœur, mais de les affaillir viuement, durant que l'ardeur de la gloire d'auoir vaincu seroit encor fresche es esprits des soldats. Toutes-fois cete entreprise mise en plus meure deliberation qu'il en estoit de faire, on fut d'opinion, " Que l'insolence de la victoire fait quelquesfois perdre l'occasion d'une gloire certaine, par espoir d'un plus grand honneur en-
" cor incertain : & que tel erreur met souuent les Royaumes & grans
" etats en peril & ruine." Donq qu'ayans emporté la victoire sus les ennemis, ne la deuoyent exposer en hazard de la perdre, sous espoir d'une autre plus grande. Le conseil desquels fut suyuy, & formée la retraite par le commandement de monsieur de Dessé, accoutumé à vser sagement de la victoire, à mesurer ses forces, & mettre borne conuenable à son esperance.

SECOND LIVRE DE L'HISTOIRE DE LA GUERRE D'ESCOSSÉ :

TRAICTANT COMME ELLE FUT ASSAILLIE, & EN PARTIE OCCUPEÉ PAR LES
ANGLOIS : & DEPUIS RENDUE PAISIBLE À SA REYNE, & REDUITTE
EN SON ANCIEEN ETAT & DIGNITÉ.

ESCRITE PAR L. DE BEAUGUÉ, GENTILHOMME FRANÇOIS.

PAR QUELS MOIENS LA REYNE DOUAIRIERE PROUEUT À
RECOMPENSER LA VERTU DE CEUX, QUI AUOYENT BIEN
FAIT EN LA BATAILLE.

CHAPITRE PREMIER.



Vand il me fouuent, qu'es perſonnes ou y a moins de merite, il y a fouuent plus grande preſumption : & qu'il eſt malaiſé, que ſans enuie on puiſſe parler de pluſieurs, ie ferois pour entrelaiſſer mon entrepriſe, ſi en meſme inſtant il ne me couloit en memoire, que pluſtoſt ie doy offeñſer pour eſtre veritable, que flatter pour complaire à autrui. Liſe donq mon hiſtoire qui voudra, i'oſe hardiment aſſeurer, que ie n'eſtime choſe, de quelque importance qu'elle ſoit, qui me face laiſſer le chemin de la verité : auſſi ay-ie apris d'un grand perſonnage : Que le dommage qui l'enſuit d'auoir eſté vray diſant, ne porte pas grand nuifance à l'homme de bien. Retournant donq au propos que i'auoy entrelaiſſé pour faire cete digreſſion, Ie dy que la Reyne douairiere, ayant eſté promptement auertie de ce qui ſ'eſtoit paſſé avec les ennemis, arriua au camp preſque ſur le poinct qu'on

fonnoit la Diane par les cors de garde. Je ne faurois bonnement dire qui apporta plus de contentement aux gens de guerre, ou le iugement de la fortune, qui leur auoit donné le deffus de la bataille, & l'auantage des autres combats particuliers : ou qu'en faueur de leurs œuures, la Reyne leur daignast faire cet honneur de les visiter, de parler familièrement avec tous, leur toucher les mains, les recommander à leurs capitaines, les honorer de toutes fortes de haute louange, & pour le faire court, estre aussi songneuse à ne rien oublier de leur meritée recompense, que s'ils eussent tous esté princes ou grans seigneurs.

CONCION DE LA REYNE DOUAIRIERE D'ESCOSSE,
AUX GENS DE GUERRE.

CHAPITRE DEUXIESME.

“ **L**’Ay toute ma vie beaucoup estimé de vous, mes
 “ amis, mais (leur disoit elle) voz valeurs me tien-
 “ nent aujourd’huy tant obligée à vous aimer, que
 “ pour n’estre ingrate vers voz merites, ie n’ob met-
 “ tray aucune chose, qui puisse rendre tesmoignage,
 “ de vostre vertu. Car puis que l’estat de ce Roy-
 “ aume, & mon seruice dependent seulement de vous, cela est fort iuste
 “ que vostre loyer vienne de moy seule. J’ay donné charge de vous faire
 “ de ma part quelques presens : prenez (ie vous pry) en satisfaction, non
 “ ce que ie fay maintenant, mais ce que ie desire de faire : & j’espère que
 “ ne me defaudra quelque iour le moyen de vous faire conoitre, que plus
 “ grans sont les salaires des victoires que dangereux les inconueniens
 “ des hazars de la guerre.”

CONTINIVATION DES BIENFAITS, QUE RECEURENT
LES SOLDATS DE LA REYNE DOUAIRIERE.

CHAPITRE TROISIEME.



A Reyne, sachant que les paroles superflues ostent beaucoup de l'autorité des personnes, ne s'estendit pour l'heure en plus long propos, & passa non seulement tout ce iour, mais plusieurs moys apres, à hault louer les morts, & à recompenser la vertu de ceux qui viuoyent, les attrayant tous à foy particulièrement tant par ses bienfaits, que par ses faueurs & louanges. Ce vray tesmoignage de sa bonté esmeut les foldats, à l'heure, d'aller publians par le camp à haute voix.

“ Les Princeſſes (disoyent ils) reçouyent pour la plus part leurs grans deurs de la fortune : mais la Reyne d'Eſcoſſe tient tout ſon bien de la “ vertu.” Les Eſcoſſois venoyent lors en groſſes troupes en noſtre camp, contemplant les corps des Anglois, qui etoyent tous nuds eſtenduz par terre : & ſembloit qu'ils leur portaſſent encor mauuaiſe volonté. Et ſ'en trouua de ceux (à mon auis) que les Anglois auoyent autresfois plus offenſez, qui eſſayoient d'arracher les yeux aux morts. “ Auſſi n'eſt ce “ pas choſe qui ſoit aiſée, que l'homme troublé par vne haine extreme “ uſe de raiſon. Et ne ſçay ſi ie doy dire que la haine eſt louable, “ quand l'occaſion en eſt cauſe.” Mais j'oſe bien ramenteuoir, que l'Eſcoſſe deſolée par fortunes ſur fortunes, ſes villes ſaccagées, ſes grands palais brulles & ars, ſes eglifeſ demolies & abatues, l'inhumaine bouche-rie de ſes nobles & citoyens, & autres cruantez des Anglois, pouoyent bien auoir engendré es cœurs de Eſcoſſois vn grand deſir de vengeance. Mais au contraire, ayans veu l'eſpreuue de la bonte & vertu des Fran-

çois, leur portoyent tout honneur, & se confirmoit vne parfaite amitié entre ces deux nations. “ Qui donne bien à connoître, que la vertu fait “ devenir l'étranger naturel : & que tous ceux qui l'auront acquise, feront, en quelque pays qu'ils foyent, aimez & honorez de tous.”

D'VN AVERTISSEMENT, QUE DONNA VN SOLDAT
ALBANOIS À MONSIEUR DE DESSÉ.

CHAPITRE QUATRIESME.



LE seigneur d'Andelot auoit présenté à monsieur de Dessé des le plus matin, vn soldat Albanois, lequel il auoit sauué de cinq cens espees en la bataille que j'ay decrite. Ce soldat luy auoit offert de courir choses de grande importance, s'il luy faisoit grace de la vie. Comparoissant donq deuant la Reyne l'Albanois, sans s'etonner, avec visage assuré, dist : Que cetoit chose manifeste, que le fort d'Edimton estoit cloz d'une muraille impossible à mille canons d'estre iettée par terre, & qu'un long siege estoit la seule voye de l'emporter : esmeu (comme il disoit) à assurer ces choses, pour ces raisons, qu'il y auoit assez gens de bien dedans pour la defendre par armes, si on y alloit à l'assaut, eu esgard à la difficulté d'y faire breche qui fust aisée à forcer. “ Mais que Tyberi & les soldats de sa “ compagnie se contentoient si peu du traitement, qu'on leur faisoit, que “ si la Reyne trouuoit bon que monsieur de Dessé temporisast” encores vn moys au siege (empeschant, avec la mesme heureuse prudence & grande hardiesse, avec quoy il auoit iusques là conduict toutes choses, que viures ou autres refreschissemens n'entraissent dans la ville) il se confioit que l'entrepryse viendroit à bien, & que ceux de dedans seroyent contrains de condescendre à quelque composition. La Reyne ayant fait vn conseil

fur toutes ces choses, conclud que monfieur de Deffé ne leueroit fon fiegé, qu'il n'eust affamé Edimton, ou que de beaucoup plus grands forces, que les fiennes, ne l'en chaffaffent : bien fut il auifé, que pour mieux accorder l'armée, monfieur de Deffé la feroit loger en vne abbaye, ou auoyent été campe-
pez les Efcoffois, qui estoit à quatorze ou quinze cens pas d'Edimton.

COMME SVCCEDA L'ENTREPRISE, QUE FIT LE GENERAL D'EDIMTON,
DE TRANSPORTER QUELQUES GRAINS DANS SA PLACE.

CHAPITRE CINQIESME.



Et elongnement incita le general d'Edimton & Ty-
beri, hommes belliqueux, à faire des faillies plus
fouuent qu'ils n'auoyent point encores fait, & à dref-
fer diuerfes entreprifes à toute heure du iour & de
la nuit : soit pour nous monftrer, qu'ils ne cerchoy-
ent le repos, ou pour couourir aucunement par telle
forcée apparence l'etat de leurs affaires : mais pource qu'il feroit trop
ennuieux de particularifer toutes leurs forties, il fuffira que ie die, que
quatre iours apres nostre deslogement des tranchées, fur les vnze heures
de la nuit, ils jetterent dehors enuiron deux cens cheuaux d'Anglois &
Italiens, lefquels penfans furprendre legerement nostre guet de gens de
cheual, qui estoit affis hors du camp, allerent prendre le tour par la mon-
tagne de Berladé : & ce pendant le general fit vne faillie avec trois ou
quatre cens hommes de pié, Anglois & Italiens, des mieux armez qu'il
eust, & cinquante ou foixante payfans Efcoffois pour feyer, & emporter
dans Edimton, quelques orges qui etoyent demeurez à l'harquebouzarde
du foffé de la ville. Or encores qu'en cete faifon de l'Autonne les nuits
foyent fort courtes & peu obscures en cet endroit d'Efcoffe, ou en tems
d'esté le iour est en rien ou bien peu obfurecy par la nuit : si est ce qu'à

l'occasion de quelques nuées & brouillards (à quoy la region est fort subiette) & d'une forte pluye qui commençoit de tumber, l'air estoit tant obscurcy, que dix ou douze ennemis des plus disposés, qui s'etoient iettez deuant, ne sceurent descouurir deux foldats des nostres, posez en sentinelle à vn iet de pierre de leur fossé, combien qu'ils passassent à vne longueur de picque pres d'eux. Or apres que ces deux foldats (qui auoyent esté instruits par le seigneur d'Andelot de ce qu'ils auroient à faire, si les ennemis sortoyent de leur fort) se furent coulez quelque peu plus bas, l'un d'eux alla au corps de garde, auertir le seigneur d'Andelot, de ce qu'ils auoyent decouuert : lequel, comme sage & vaillant qu'il est, commanda promptement que le Capitaine Gourdes attendroit les Anglois de pié coy, avec la compagnie dont il estoit lieutenant : & que pour les attirer le plus loing qu'il pourroit, il les enuoyroit attaquer à douze harquebouziers de bandes, avec commandement de prendre la premiere cargue qu'on leur feroit. Ce pendant que luy, avec l'autre compagnie de la garde, iroit essayer de leur empescher la retraite. Suyuant cete conclusion, le seigneur d'Andelot faisant tenir couuert le feu des harquebouziers, & ayant pris vn assez grand circuit, se ietta diligemment entre Edimton & ceux qui en etoyent sortis : car pour l'obscurité de la nuict & le bruit du combat, qui s'estoit attaqué entre le Capitaine Gourdes & les Anglois, l'entreprise du seigneur d'Andelot ne fut decouuerte, iusqu'à ce que, leur donnant le premier à dos, il dit à ceux qui le suyuoient : A eux, mes compagnons, & ne faites cas de gens qui sont en chemise comme belitres. Il parloit ce langage, pource que le general & sa troupe etoyent sortis d'Edimton en camifade. Ainsi le seigneur d'Andelot alla donner sur les ennemis, & suyuy de plusieurs bons foldats en tumba d'abordée vn grand nombre, auant qu'ils peussent se ranger ensemble. Le general, se sentant surpris, se voulut adresser au seigneur d'Andelot, qui estoit le plus auancé : & luy bien aisé de se trouuer en lieu ou il peust affronter le general d'Edimton (pour la bonne reputation

qu'il l'estoit acquise par les armes) le receut avec vne assurée gayeté de cœur. Mais pour ne me tenir longuement au discours de leur combat, qui sembleroit à aucuns vn compte de noz vieux Romans, le seigneur d'Anelot blessa le general en la main, & enfonça sa bourguignotte à tels coups d'épée, que le general ha confessé plusieurs fois depuis en bonne compagnie, qu'il ne fut en sa vie si bien frotté. En mesme heure les Anglois furent assaillis des deux bandes : car le Capitaine Gourdes les auoit chargées d'une grand force, prenant soigneusement garde qu'ils demeurassent enuelopez entre sa troupe & celle du seigneur d'Anelot : qui eust esté vn expedient pour en faire mourir la plus grand part, si le general d'Edimton n'eust veu de bonne heure la ruine, qui menaçoit de tumber sur luy & les siens : mais pourfuyant sagement tout ce qu'un chef doit considerer en telles entreprises, commanda aux siens de marcher au pas vers la retraite : ce qu'il eust possible acheué honnestement, sinon que pour auoir trop éloigné son fort par tems de nuit, & affronte gens si vaillans & esleuz, les nostres se meslerent entre les siens, & les firent à toute contrainte de rompre leur ordre, & de prendre la fuyte, pour gagner le pié de leur muraille, & aucuns de se precipiter es fosses.

CONTINUATION DV SUCCES DE L'ENTREPRISE DU GENERAL D'EDIMTON.

CHAPITRE SIXIESME.



E seroit chose estrange de croire, avec quelle hardiesse d'entreprendre les choses hazardeuses, & quel conseil & prudence entre les mesmes hazards, le seigneur d'Anelot conduisoit toutes les entreprises ou il se trouuoit : & chassa les ennemis tuant iusques dans leur fort : car les nostres deuenuz audacieux pour auoir vaincu en vne bataille, & se tenans comme assurez

d'emporter Edimton, etoyent encor entrez en telle fureur, qu'ils s'efforçoient de franchir les tranchées, qui flancquoient les barrières : qui eust été s'exposer à vne perte euidente. Sinon que le seigneur d'Andelot, ne voulant aller à tout perdre à faute de ne mettre au fort l'entiere puissance de nostre camp, les fit retirer à toute peine. Et quant à la caualerie, qui estoit faillie avec le Capitaine Tybere, elle fut, sans passer à fort grand combat, viuement rembarée par les seigneurs de Humes & de Dunes, qui etoyent avec leurs bandes, cete nuit, de garde. Ce font deux gentilshommes Escossois, lesquels, à toutes les occasions, qui se font présentées pour montrer preuue de leur loyauté & valeur, ont bien fait conoitre, qu'il se trouue bien peu d'hommes en tout le monde armez de plus grand vertu, plus vaillans & experimentez en guerre. Or auons nouz assez parlé de ces faillies : reste à discourir sur les autres entreprises.

DES ARMEES, QUE LE DUC DE SOMMARSET ENUOYA EN ESCOSSE, SOUBS LA CHARGE ET CONDUITTE DE L'ADMIRAL D'ANGLETERRE, ET DU MILHORD GRÉS.

CHAPITRE SEPTIESME.



Ombien que les Anglois eussent beaucoup perdu de leurs forces, si n'auoyent ils rien oublié de leur audace : & aimoyent mieux estre souuent battuz, que ne tenter la victoire : car ils se faisoient croire (s'amusans superstitieusement à vne de leurs propheties, comme aucuns d'eux mesmes me l'ont dit depuis) que toute la puissance du monde ne leur pouuoit oster l'honneur de la conqueste d'Escosse. Etant donq l'affaire mis en deliberation, la meilleure part de ceux du conseil d'Anglettere alleguerent, que les Escossois

ne pouuoient estre vaincuz en leurs pays, se seruans de l'exemple des entreprises, que les Anglois ont faites par le passé sur les Escossois : lesquels, autant de fois qu'ils ont fait la guerre sur leur terroir, sans ligue & sans partialitez, sont tousiours demeurez les maitres, recourrans (ainfi que le grand Anthée) leurs forces de leur mere. Mais contre l'opinion d'eux tous le Protecteur d'Angleterre fut seul de cet auis, que, pour rechercher l'occasion, qu'il s'estoit laissé couler des mains, on deuoit aller trouuer les François au milieu de l'Escosse, à cause (comme il meit en auant) que, qui la defferoit sur la frontiere, il n'emporteroit par ce moyen le Royaume d'Escosse, pour le loisir, que pourroyent auoir ceux du pays de se refaire. Mais s'ils vainquoyent les François au cœur du Royaume, en poursuuant plus viuement, qu'ils n'auoyent fait, l'exécution de leur victoire, & sans laisser aux Escossois temps de remettre aux champs nouvelle armée, ils pourroyent demeurer maitres & seigneurs de toute l'Escosse. A cete fin le Protecteur, etant bien auerty que le seigneur de la Mailleraye s'estoit mis au retour en France avec les vaisseaux ronds qui auoyent aporté l'armée, & qu'il ne nous estoit demeuré que Galeres, mit ensemblement dixhuiët mil hommes de pié, & de sept à huit mille cheuaux. Il equippa aussi en guerre vne armée de mer qui estoit de trente vaisseaux ronds, que floins qu'autres nauires moyens, de quatre grandes hourques, six roberges, & deux galleres. Et à fin que le tout fust conduit avec vne merueilleuse discretion, le Protecteur donna ordre, que cete armée de mer, ou commandoit l'Admiral des Anglois, nauigaît terre à terre, pour ne perdre de veüë la grosse armée, que conduisoit par le pays de Tuid le Milhord Grés, Escossois de nation, mais ayant oublié son denoir, en forte que luy seul estoit le fleau & affliction de sa patrie.

POVR QVELLE OCCASION MONSIEUR DE DESSÉ FUT
CONTRAINCT DE LEUER SON SIEGE D'EDIMTON.


CHAPITRE HUITIESME.



Monfieur de Deffé, ayant eu certain auertiffement par les efpiens des entreprinſes des ennemis, depeſcha vn gentilhomme deuers monſieur le Conte d'Aram pour lors gouuerneur d'Eſcoſſe, luy ramenteuoir la promeſſe qu'il luy auoit faite de les ſecourir de fix mil hommes de pié, & de fix mil cheuaux, toutes les fois que l'occafion ſe prefenteroit : & l'aſſurer de ſa part, qu'il ne tien droit qu'à luy, qu'ils ne combatiffent l'armée de terre. Or ha touſiours été monſieur le Conte d'Aram vn fort gentil Prince & loyal entre tous ceux qui naquirent iamais en Eſcoſſe : auſſi l'eſſaya il de le donner à conoitre à ce beſoin : car à toutes les peines qu'il peut, fiſt diligenter toutes chofes pour ſ'aller ioindre à monſieur de Deffé, avec ſi grandes forces qu'ils peuſſent bien receuoir les ennemis. Sollicité d'autre part par la Reyne avec prieres ſans fin, & avec paroles de telle efficace, qu'elle euſt encor fait prendre les armes à tel, qui euſt conclu de paſſer le reſte de ſa vie oifif en ſa maiſon. Si eſt ce que pour auoir été auerty trop tard, monſieur le Conte d'Aram ne peut faire que ſon armée feuft ſi toſt preſte, que monſieur de Deffé ne feuft contrainct leuer ſon ſiege d'Edimton, à ſon grand deſplaiſir, diſant aux Capitaines & gentilshommes de ſon armée.

HARANGVE PREMIERE DE MONSIEUR DE DESSE.

CHAPITRE NEUFIESME.

“  Ource que vous meritez tous de tenir le lieu que ie
“ tiens, i'estime (mes compagnons) que vous ayez
“ bonne conoissance, que ce ne fut iamais honte à vn
“ Capitaine, de se retirer quand l'occasion ne l'incite
“ à combattre son ennemy, ou qu'une extreme neces-
“ sité ne le contreigne. Mais aussi etes vous de si
“ grand cœur, que vous choisirez avec moy de mourir plus tost, que fuir
“ en desordre, comme craintifs & pusillanimes, deuant noz ennemis,
“ quand bien ils feroient en plus grand nombre, qu'ils ne sont : car les
“ bons sont plus obligez d'obeir aux commandemens de l'honneur, qu'à
“ craindre les hazards de la vie : etant le desir de longuement viure
“ (comme il est) motif d'une mort honteuse, & sans reputation : & l'a-
“ mour de la vertu, occasion d'une vie non perissable qu'avec les choses
“ immortelles.”

DE LA FAVTE QVE FIT LE MILHORD GRES, EN
L'EXECUTION DE SON ENTREPRISE.

CHAPITRE DIXIESME.



R voicy quel bien auient par la vertu d'un personnage, qui garde en toute fortune son assurance & preud'hommie, & qui sçait donner tel exemple de sa valeur, que n'estant pour abaïsser iamais son haut courage, il fait que ceux, qui l'accompagnent, ne perdent le cœur pour peril qui se presente. Les

Anglois venoyent en tel ordre vers nous, qu'avec si peu d'avantage que nous auions pour nous retirer honnestement, ils nous pouuoient reduire à vne de ces deux extremitez: De fuir vers Edimbourg, faisans autant de chemins, que nous etions de personnes: Ou nous forcer (enuiron cinq mille hommes en comte, avec monsieur de Dessé) d'attendre au combat de pié coy vingt cinq mille hommes qu'ils etoyent, tenans tous contenance de soldats, qui auoyent enuie de combatre. Toutesfois soit pour mauuaise conduite, ou pour le bon heur de monsieur de Dessé, qui les auoit accoutumez à le craindre, ou bien “ (comme il est de croire, car il ne “ faut atribuer aux vertuz des hommes tout le bien, que nous receuons)” que ce fust par l'infallible disposition de celuy, duquel on doit reconoitre toutes les victoires, et les heureux succés du fait des armes: monsieur de Dessé se retira au petit pas quatre grandes lieues à la venue de ses ennemis, gardant tousiours sa maniere honeste qui est requise à se retraire, & sans perdre vn seul homme (chose estrange) pource que les Anglois, entre lesquels etoyent mille estrangers, & enuiron trois mille cheuaux, le contoyerent tout le chemin: lesquels (sans auoir entrepris de nous attaquer) tournerent tout court vers Edimton, lequel ils refreschirent de gens & de viures.

PAR QVELLE TROMPERIE LES ANGLOIS ESSAYERENT
DE NUYRE AUX FRANÇOIS: ET DE CE QUI EN AUINT.

CHAPITRE VNZIESME.



Eux iours apres, leurs gens de cheual se vindrent embuſquer au village de Treinnant, & nous enuoy-
erent cinq ou ſix cens hommes à cheual, pour don-
ner l'allarme à noſtre camp, & attirer à eux quel-
ques vns des noſtres : & pour cet eſſet ſe preſente-
rent à l'aube du iour ſur le hault d'un coutau, ou
ils ne demeurèrent long temps ſans qu'on les allaſt veoir. Et combien
qu'il n'y allaſt pour leur attaquer l'eſcarmouche qu'enuiron trente che-
uaux des noſtres, les ennemis commencerent à ſe retirer : qui deuoit eſ-
tre aſſez de coniecture de leur tromperie. Ce neantmoins les noſtres,
qui touſiours ſe renforçoient, leur firent vne charge, & les ayans enfon-
cez les chaſſèrent touſiours batant iuſqu'à ce qu'ils tumberent enuelopez
en leur imboſcade de plus de trois mille cheuaux qui ſortit ſur eux, &
pour vn mille leur aprit à paſſer quarrriere. En cete entrepriſe les Ca-
pitaines Pierre Longué, & Lucenet, fort bons & vaillans hommes de
guerre, furent pris priſonniers, ainſi qu'ils auoyent ſeulement tourné viſage
contre cinq ou ſix Anglois, qui etoyent les plus auancez. Et avec cete
ſeulement perte on ſe retira en noſtre camp de Monſſebrou, ou l'armée de mer
des ennemis faiſoit grand deuoir de tirer canonades aux lieux où ils pen-
ſoyent qu'il nous falloir mettre en bataille.

DV SECOVRS QUE LA REYNE DOUAIRIERE ENUOYA
À MONSIEUR DE DESSÉ.

CHAPITRE DOUZIESME.



Ela faisoit beaucoup à couper le chemin aux Anglois d'acheuer la moindre de leurs entreprises, que la Reyne auoit tellement gagné l'amour & bienueillance de tous les François, qu'elle les auoit rendus tresprompts à entrer au danger de la mort pour son seruice. Et avec telle clemence, iustice, liberalité, sainteté de vie, & singuliere prudence se faisoit reuerer de ceux de son Royaume, que, ainsi que ces choses se faisoient, arriuerent en nostre camp quatorze ou quinze mille Escossois, comptant les sauuages, qui estoient venuz avec le conte d'Arquil, promettans tous de faire leur deuoir. Ils n'estoient encores logez, quand trois bataillons d'Anglois, avec deux regimens de caualerie, se presenterent au mesme lieu, ou le iour precedent on auoit veu leurs coureurs, demeurans en ceste sorte plus d'une grosse heure, sans descendre le valon, au pié duquel nous etions campez : qui fut cause (ce pendant que les seigneurs d'Anelot & Conte Rimgrau rangeoyent en ordre de bataille leurs fanteries, que le reste des François s'aprestoient de bon cœur au combat, & que les Escossois sauuages se prouocquoyent aux armes par les sons de leurs cornemeuses) que monsieur de Dessé les enuoya reconoitre par les seigneurs d'Etauges & d'Ouartis : suyuant le rapport desquels monsieur de Dessé conclud de les attendre au combat de pié çoy, s'il osoient nous venir assaillir : combien que quelques " vns missent en auant, qu'il seroit trouué auoir ioué " au plus seur, si on se retiroit à Edimbourg, ou au Petit liêt, qui " n'estoyent qu'à deux petites lieuës de là, d'ou (disoyent ils) on pourroit " attendre les ennemis avec plus d'assurance de vaincre, qu'en ce lieu, ou " la partie estoit trop inegale de vingt cinq mil hommes contre moins de " dix mille qui peussent combattre. A ceux cy monsieur de Dessé disoit."

CONCION DEUXIESME DE MONSIEUR DE DESSÉ.

CHAPITRE TREZIESME.

“ **M** Es compagnons, la vertu & grandeur de courage
 “ des hommes preux & vaillans ne se meliore pas
 “ pour auoir fuy le combat : & ne voy point que la
 “ fortune de la guerre fauorise plustost des fuyars
 “ retirez dans vn fort, que ceux, que la hardiesse,
 “ l'honneur, & la vertu des armes ha arrestez en
 “ la campagne, avec veu & deliberation de sacrifier la vie pour assurer
 “ la renommée.” Sur la fin de ces paroles : ça (dit il) mon acoutrement
 de teste. Puis armé de toutes armes, & monte sur vn fort courfier, se
 tournant vers le regiment du seigneur d'Anelot, dit aux foldats.

CONCION TROIZIESME DE MONSIEUR DE DESSÉ.

CHAPITRE QUATORZIESME.

“ **S** Oit donc icy, foldats, soit donc icy la glorieuse se-
 “ pulture des plus vaillans hommes qui iamais ho-
 “ norerent l'Escosse, plustost que par crainte nous
 “ cerchions d'acroistre cete vie, que la hardiesse
 “ n'amoindrit iamais. Et puis qu'une necessité
 “ inéuitable nous y contraint, que chacun de nous
 “ combatte vaillamment pour la victoire. Les hautes entreprises sont
 “ tousiours honorables, & non pas tousiours fort dangereuses.”

COMME LE MILHORD GRÉS SE RETIRA À EDIMTON
SANS COMBATRE.

CHAPITRE QUINZIESME.



Ource que plusieurs de noz harquebouziers à cheual, & quelques falades de la compagnie du seigneur d'Etauges s'etoyent auancez pour attaquer l'escarmouche avec les cheualiers d'Angleterre, monfieur de Dessè n'entendit son propos plus auant : car ayant encor l'ennuy deuant les yeux, que luy auoyent aporté ceux, qui s'etoyent laissé attirer outre le denoir de la guerre, il s'auança pour les faire retirer : de mesmes se retirerent quelques falades des ennemis, qui etoyent descenduz pour essayer d'attirer les nostres, ce pendant que mille ou douze cens cheuaux gaignoyent le dos de la montagne pour enclorre ceux qui s'auanceroient le plus. Mais si tost qu'ils virent es brausler le regiment du seigneur d'Anelot, qui marchoit teste baissée droit à eux, costoyé par cinquante hommes d'armes, & qu'un regiment de caualerie de messieurs les Contes d'Aram & d'Otonlay, qui estoit de dix huit cens cheuaux, & bataillon du Conte Rimgraué desinarchoyent aussi pour les charger : ils conceurent vne si grande frayeur, que sans estre chargez ils se rompirent d'eux mesmes, pour gagner leurs grosses troupes, lesquelles tantost apres se retirerent sans rien faire, tenans le chemin d'Edimton, combien que le Milhord Grés eust promis au duc de Sommarset de mener son armée de terre au Petit liêt, faciliter la descente qu'y entendoit faire l'Admiral d'Angleterre, pour le fortifier & garder de là en auant pour son Roy. Mais il auoit desespéré de pouuoir rendre & accomplir son vœu, iugeant tres bien que sans hazarder vne bataille (dont il ne se pouuoit assurer d'emporter le meilleur) n'estoit possible d'acheuer si haute entreprise.

COMME SVCCEDA À L'ADMIRAL D'ANGLETERRE VNE
DESCENTE, QU'IL FIT DANS LE PAYS DE THAIS.

CHAPITRE SEZIESME.



Pres que l'Admiral d'Angleterre eut brullé à Brutylan quatre nauires de marchans, & à passades battu le Petit liét de quelques coups de canon, qui alloient mourir dans les leuées de terre, qui deffendoyent la ville du costé de la riuere de Ford : Il tourna tous ses desceins à faire descente dans le pays de Thais : car il pensoit estre tant informé de la negligence de ceux de cete coste, qu'en sorte que ce fust l'auantage ne luy pourroit eschapper des mains : & au pis aller qu'il feroit conoitre " en ce faisant à vn chacun, " que les Anglois ne cerchoient point tant la victoire, qu'ils ayment la " continuelle guerre." Estant donq cete armée en mer, & aprochée du pays de Thais, les Anglois se tindrent cachez tout le reste du iour, & iusques sur les dix heures de la nuict, qu'ils se mirent à la voile, tirant à vne plage, qui est à vne lieuë de Moures, ou estans arriuez plus de quatre heures auant iour, & mis ordre à ce qu'ils auoyent à faire, commencerent à faire porter gens en terre. Or en ce temps estoit demeuré malade en sa maison le seigneur de Dunes Escossois (duquel nous auons parle quelquesfois en cete hystoire) sage & fidele gentilhomme : lequel (comme bien vstité aux armes) " sachant que la moindre erreur, que sauroit commettre " l'homme de guerre, cause le plus souuent inconueniens de grande importance, mesmement en lieu de legere auenuë," encores qu'il eust besoin de repos, ne se retiroit iamais sans auoir visité la garde du fort,

qu'au paravant (& en si peu de temps qu'il feroit incroyable) il auoit fait construire sur la bouche du port de Moures : puis ayant reueillé le premier guet, ou renforcé, s'il estoit de necessité, & donné bon ordre à toutes autres choses, s'il conoissoit que sa presence n'y fust requise, retournoit en sa maison : ou s'il voyoit que les affaires y fussent disposées, y passoit la nuit, ayant ce propos souuent en la bouche : que “ les hommes vertueux, etans tenuz de craindre la honte, sont aussi obligez à ne fuir les dangers & la pene.” Etant donq allé visiter le fort la nuit & à heure qu'auons dit, il s'aperceut (iettant son regard sur la marine) qu'il y auoit grand nombre de nauires en mer : car les Anglois furent si peu auisez, qu'outre le bruit qu'ils faisoient à la descente, non seulement au Phanal, mais encores le feu se montroit es moindres nauires de leur flotte : qui “ ha tousiours esté tenu pour vne erreur notable es menées “ qu'on veult exploieter de nuit, & par surprise.”

Or voicy vn exemple de iugement prompt & singulier pour remedier à vn affaire suruenu. Le seigneur de Dunes ayant decouuert l'armée des ennemis par cete coniecture qu'auons dit, & la prenant en la pire partie (chose peu souuent subiette au repentir) donna ordre qu'aucuns des siens se ietteroyent dans les meilleurs vaisseaux du haure, pour empescher & defendre l'entrée aux ennemis : Que d'autres demeureroient à la garde du fort, & que neuf ou dix de ses domestiques (sans donner alarme) feroient de main à main prendre les armes aux habitans de Moures, & à tous les marchans & mariniers estrangers qui se trouuoient dans le port. Puis ayant instruit les vns & les autres de ce qu'on deuoit faire, marcha avec le reste de sa troupe au denant des ennemis. Et pour ce faire avec plus de consideration que les Anglois n'auoyent iusqu'icy conduict leur entreprife, ayant laissé de sa ban de en vn lieu auantageux hors de la ville remparée de longue main de tranchées & terrines pour assurer sa retraite, s'auança avec les plus disposés, pour aller reconoitre que c'estoit : ce qu'il fit avec si expresse diligence,

que fans estre decouuert il veid les fragates des ennemis aller & venir portans gens armez en terre : lesquels il sceut luy deuxiesme approcher, en forte, qu'il les reconeut à la parole & à l'escharpe. Parquoy ayant appris ce qu'il vouloit fauoir de ennemis, commença à retirer ses gens vers la grosse troupe : ou les ayant laissez & rangez en bataille fur le bord des tranchées qu'auons dit, & assis sentinelles en lieux commodes & à propos, pour se garder de surprise, retourna à la ville : ou de plus de mille, qui se trouuerent, il en choisit enuiron trois cens, lesquels il enuoya ioindre avec les siens : commandant à deux gentils hommes, qu'il conoissoit fideles & loyaux, de conduire tous les autres (qui luy semblerent mal propres pour le combat) au couuert d'une montagne, qui regardoit la place ou les ennemis auoyent pris terre : avec ceux cy il enuoya tous les valets des nauires, & autre populaire de peu de compte : enioignant aux deux gentilshommes, qui auoyent à leur commander, qu'au deuxiesme coup d'artillerie, qu'il feroit tirer, ils fissent de couvrir toute cete troupe, & montrer de loing aux ennemis, au meilleur ordre qu'il leur seroit possible. Il eut assez de temps pour ordonner toutes choses : car pour le peu de conoissance, qu'auoyent les ennemis, de l'affiette du pays, & pour l'obscurité de la nuit, laquelle, à mesure qu'on aprochoit du iour, se faisoit plus obscure, bien qu'ils fussent huiet ou neuf cens hommes en terre, n'auoyent encor déplacé du riuage de la mer. “ En quoy les Anglois faillirent grandement : car semblables entreprises requierent estre “ promptement executées, & s'empirent d'attendre le conseil.” Ce pendant aussi le seigneur de Dunes s'aidoit du temps, & dispoit ses gens en lieux opportuns pour recevoir les ennemis : lesquels au poinct du iour vindrent à grand pas vers la ville, cuydans n'auoir encor esté decouverts, & de la pouuoir saccager, auant que les Escossois peussent mettre vn seul homme en bataille. Mais, comme dit vn docte gentilhomme,

Stratageme
du seigneur
de Dunes.

" Il ne faut que l'homme humain
 " S'affure de nulle chose,
 " Si ia ne la tient encluse
 " Etroitement dans la main."

CONTINUATION DE CE QUI AUINT À L'ADMIRAL
D'ANGLETERRE AU PAYS DE THAIS.

CHAPITRE DIXSEPTIESME.



E leger penfement fut dommageable aux Anglois en
 plusieurs fortes, trouuans les chofes autrement dif-
 pofées qu'ils ne cuidoyent : car eux ayans les Efcot-
 fois en trop grand mefpris, & parce confuz & en
 grand defordre, tumberent en l'imbofcade du feigneur
 de Dunes, laquelle decocha fur eux de grande affur-
 ance, & à coups de flefches leur liura vn fi fier & foudain affault, que
 plusieurs tumberent morts & bleffez des ennemis, auant qu'ils viffent de
 quelle part ils etoyent affaillis. Auffi n'eft il point de plus inutile de-
 fenfe, que celle qui fe fait à l'impouruenë & fans ordre. Les Efcossois
 de l'imbofcade chargerent de cete façon leurs ennemis par quatre ou cinq
 fois : puis voyans qu'ils fe raflembloyent pour leur faire teſte, ſe retirer-
 ent, par le commandement du feigneur de Dunes, à leur groſſe trouppes,
 avec tel auantage & fi bon ordre, qu'ils ne firent que bien peu de perte,
 combien que les Anglois les ſuyuiſſent à vauderoute iuſqu'aux tranchées
 qu'auons dit, ou ils furent arreſtez tout court par les Eſcoſſois : leſquels
 à coups de flefches & harquebouzades en firent mourir pluſieurs de plus
 auancez, & ſoutindrent longuement les autres, ſans encores venir aux

main : car ainſi eſtoient ils inſtruiçts par le ſeigneur de Dunes. Lequel voyant l'occafion luy eſtre favorable pour exploiçter ſon deſcein, retira ſes gens peu à peu derriere les tranchées, de peur que l'ardeur du combat les attiraiſt plus loing : Ce qu'il fit avec ſi gentile adreſſe, que les eunemis ne ſ'en aperceurent, iuſques à ce que luy meſmes ſe retiroit avec les derniers : & alors ſ'aperceuant qu'ils le fuyuoient chaudement, il fit donner feu à trois pieces de campagne, leſquelles pour eſtre toutes aſſiées ſur les ennemis, qui venoient epanduz, & en deſordre, en tua vn grand nombre ſur le camp : ce qui refroidit beaucoup la chaleur de ceux qui fuyuoient, d'autant plus etonnez, que la reſiſtence qu'ils trouuoient etoit hors de tous leurs diſcours. Mais le ſeigneur de Dunes & les Eſcoſſois (qui combatoyent pour leurs vies, pour leurs facultez, & pour leur Reyne : choſes, qui donnent ordinairement les armes en la main) ayans leué vn grand cry, ſe ietterent à eux, & les chargerent de telle ardeur, qu'ils en executerent bonne part : & ce pendant qu'ils ſe meſloyent avec la groſſe troupe des Anglois, donnans la mort à pluſieurs, & receuans auſſi quelque perte, ceux que le ſeigneur de Dunes auoit enuoyez par le dos de la montagne, faiſans de grans huées & criées ſe monterent de loing aux ennemis en vn bataillon quarré & ordonné tant ſubtilement, & les hommes encores armez de telles armes (combien que ridicules) qu'ils ſemblerent aux ennemis foldats armez à la Françoisſe, leſquels vinſſent pour leur couper le chemin & empeſcher la retraite en leurs vaiſſeaux : choſe, qui les troubla & etonna tellement, que ſans auifer à ſe prouoir de remede contre cete inuention, mais ne pouuans ſeulement decouurir la fraude, ils tournerent le dos, fuyans au plus grand deſordre du monde vers la marine, ſe laiſſans tuer aux Eſcoſſois ſans tourner viſage, & chaſſer ſi furieuſement, que de huiçt ou neuf cens hommes, qui etoyent deſcenduz en terre, ne ſe rembarquerent cent en leurs nauires : leſquelles auſſi toſt firent voile, ſinglans en haute mer, tant qu'on les perdit de veü. Et le ſeigneur de Dunes, apres auoir party le butin & depouilles

des Anglois aux fiens, se retira à la ville, avec cete gloire d'auoir sceu dextrement accompagner sa force & vaillance, d'une astuce de guerre de si grand efficace, qu'elle peut croistre le courage des fiens, & intimider celui de ses ennemis, iusqu'à se rompre d'eux mesmes, & se laisser tailler en pieces, comme bestes.

D'VN FORT, QUE FIT CONSTRUIRE LE MILHORD GRES, À DEUX LIEUËS DE DOMBARRE.

CHAPITRE DIXHUITIESME.



Pres que l'Admiral d'Angleterre se fut retiré sus sa perte, comme dit est, le Milhord Grés, qui n'estoit encor delogé, se mit au retour en Angleterre, laissant à Edimton quatre cens hommes à cheual, dont les cent etoyent montez & armez à la Françoisë, avec tout ce qu'il conent estre necessaire pour la garde & defense de la place. En se retirant il brulla quelques petites maisons à Dombarre, & à deux lieuës de là se meit à construire vn petit fort, qu'il nomma Douglas, sur vne croupe de montagne, ou ne se trouuoit commodité d'eau quelconque, & outre ce mal, cete montagne, ou il fit son fort, est veüe & commandée d'une colline à cinquante pas, si haute qu'un homme n'y fauroit demeurer à la muraille pour defendre la bresche : par ce que de cete colline, qui est au dessus, il seroit à decouvert battu en flanc. Cete subiection estoit accompagnée de tant d'inconmoditez, qu'il semble bien, que Dieu ne voulut pas souffrir, que le Milhord Grés s'opposast à ses desceins : lequel, voyant qu'il ne pouuoit faire mieux, se retira en Angleterre : ou (comme de coutume) le Protecteur faisoit incontinent semer tout le contraire de ce qui estoit auenu, & que les fiens auoyent tousiours heu du meilleur.

D'VNE ESCARMOVCHE, QUE MONSIEUR DE DESSÉ ATTAQUA
AUX ANGLOIS D'EDIMTON : ET DU SUCCES D'ICELLE.

CHAPITRE DIXNEUFIESME.



Monfieur de Deffé etoit en ce tems au village de Monfiebrou, qui eft à deux lieuës d'Edimton, basty fur le bord de la mer en fort bon pays : ou etant auerty du delogement du Milhord Grés, & qu'environ quatre ou cinq cens cheuaux, qui etoyent dedans Edimton, fortoyent liberalement quand on les alloit veoir, delibera de les vifiter. Et à cet effet les feigneurs d'Anelot & Conte Rimgrau eflurent mille de leurs foldats, lefquels, avec trois cens cheuaux, furent conduits iufques au couuert d'une petite montagne aflez pres de la ville, ou monfieur de Deffé commanda, que le Capitaine Loup allaft, avec dix fallades, attirer ceux d'Edimton, & que le feigneur d'Etauges s'aprochaft au pas, pour le fouftenir, avec le refte de fa caualerie. Le Capitaine Loup ne fe montra fi toft aux Anglois, que tous leurs gens de cheual, & quelques etrangers à pié fortirent de leur fort, & fans grand refpect vindrent promptement donner fur la caualerie du feigneur d'Etauges, qui s'eftoit ainfi avancé pour les obftiner d'avantage à venir au combat. Lors monfieur de Deffé enuoya dire au feigneur de la Chappelle de Biron, & au capitaine Routouze, aufquels auoit efté laiffée la conduite des gens de pié, que fi toft qu'ils orroyent fonner fa trompette, ils marchaffent droit à leurs ennemis. Lefquels voyans debufquer fur eux monfieur de Deffé avec les hommes d'armes de fa compagnie, & les deux fieres troupes de gens de pié, ils volurent vfer de la plus diligente retraite qu'il leur fut poffible : mais ils ne la peurent faire

si soudaine, que, les ayans faulsez & rompuz de la premiere charge, n'entraillions pesse mesle avec eux dans la porte du faulxbourg : ou vn Anglois, qui veid le defordre des siens, nul desquels (selon son iugement) auoit encor fait acte digne de la discipline Angloise (car ils s'estoyent mis en fuite, auant qu'estre chargez) tourna tout seul sur nous, & rompit sa lance contre le seigneur d'Andelot : lequel, vaillant & assuré qu'il est, d'un coup d'espée, qu'il donna en la veuë de l'Anglois, le tumba mort par terre : & en mesme heure nous accompagnâmes noz ennemis iusques dans la porte d'Edimton, les chargeans de tant de coups de coutelas & de masse, qu'il en demeura plus de deux cens morts estenduz sur le camp, qui alloient rendre compte de la religion, qui leur commandoit sacrifier leurs vies & honneurs en si iniuste guerre : & sans perdre trois hommes des nostres. Avec cete gloire d'auoir vaincu noz ennemis au pié de leur muraille, nous emmenâmes six vingts prisonniers à la veuë de leurs compagnons, lesquels, encores qu'ils fussent dans la ville en trop plus grand nombre, que nous n'estions dehors, n'osèrent sortir à leur recouffe.

DE CEVX, QVI SE MIRENT AU RETOUR EN FRANCE :
ET BREFUE DESCRIPTION DU PETIT LICT.

CHAPITRE VINGTIESME.



Onorez de cete entreprise, nous deslogeâmes bien tost apres de Monsefbrou : & apres que feusmes venuz à Edimbourg, monsieur le Marechal Strozzi, le seigneur d'Andelot, & plusieurs capitaines & gens de bonne maison s'embarquerent sur les Galeres pour nauiguer en France : demeurant Collo-
nel general en Escosse le seigneur de la Chappelle de Biron, personnage

de grande experience au fait des armes, & d'admirable & excellente vertu, & si grandement digne de louange, que quiconques l'aura bien coneu, fera toufiours contraint à le louer. Quant au fait de la mer, il refta feulement quatre Galeres armées en Eſcoffe, fous la charge du Capitaine Bache, Italien, homme recommandable & de grand valeur. En ce temps monſieur de Deſſè, ayant au parauant fait deſcein de fortifier le Petit liët, y vacquoit en toute diligence, comme à vne ville ſituée ſur la riuere de Ford, au lieu le plus opportun & mieux à propos de tout le pays, doué de toutes commoditez, qui peuuent attirer les perſonnes, & (pour le faire court) d'autant & poſſible de plus d'importance de toute l'Eſcoffe, pour eſtre le principal apport de toutes les marchandifes, qui y ſont apportées de pays etrange. Telle affiete doncques & ſi commode oportunité de lieu eſlent monſieur de Deſſè pour fortifier, que pluſieurs Eſcoffois delaiffans Edimton, Dondy, ſainët André, Glaſcouë, Eſtrelin, & les autres lieux & villes d'Eſcoffe, ont depuis edifié logemens & maiſons en icelle: parquoy elle ſ'eſt toufiours acreuë depuis, & va encor aujourd'huy en ſ'augmentant, de forte qu'elle eſt tenuë pour vne des premieres de tout le Royaume d'Eſcoffe, & ſi aiſée à garder, qu'y batiffant vne citadelle de peu de deſpenſe, ſur vne colline, qui commande au port & à tout le reſte de la ville, trois cens bons ſoldats la pourroyent defendre contre tout le monde.

QUELLES FORCES PEVT AVOIR VN DOUX ET HUMAIN
 TRAICTEMENT À L'ENDROIT DE GENS DE GUERRE.

CHAPITRE VINGT ET VNIESME.



Infi que monsieur de Dessé faisoit diligenter son œuvre, la Reyne auisa, quil seroit bon, que monsieur de Dessé allast chasser deux enseignes d'Espagnols, qui estoient logez au lieu de Gedouart, dans le pays de Thuydel, ou ils rangeoyent par force ou par amour tous les habitans à la deuotion de l'Anglois. Entreprisē, que monsieur de Dessé feit auoir autant agreable aux gens de guerre de son armée, comme s'ils eussent eu vn seiour de trois moys : car l'exercice continuel auoit en forte acoustumé les soldats aux armes & au trauail, & auoyent tousiours été gouuernez avec vn si doux & humain traitement, que le chauld, le froid, les coruées, & necessité de viures estoient pour rien comptez vers si vaillans hommes, qui auoyent en plus grand pris l'honneur & le deuoir, que toutes les peines & perils du monde. “ Et certainement il semble bien par cet exemple, que plus ha de vertu & d'efficace es cœurs libres & gentils vn “ gouuernement gracieux & plain d'humanité, qu'un gouuernement rude “ & feure.”

Et encor que j'en aye dit vn mot autre part, il ne me semble superflu de redire, que la Reyne douairiere d'Ecosse commandoit avec si gratuite autorité, que ceux, auxquels s'adresloit son commandement, luy en restoyent trefredeuables, & contents de ce, que par le moyen d'elle mesmes l'occasion se presentoit de luy faire treshumble seruice.

QVI FVT OCCASION QUE MONSIEUR DE DESSÉ NE PEUT
ARRIUER À TEMPS POUR TROUVER LES ESPAGNOLS, QUI
ESTOYENT DANS LE PAYS DE THUYDEL.

CHAPITRE VINGTDEUXIESME.



R estoit chose fort nouuelle à sept ou à huit cens
Escossois à cheual, que nous auions avec nous, de
voir viuandiers ordonnez pour suyure les armées,
comme ceux qui ne veulent seruir à la guerre plus
de quarante iours, comptant celuy qu'ils deslogent
de leurs maisons. Aussi n'est aucun entre eux si
misérable, qui n'ayt vn cheual, ou vn fort valet pour le bagage : & par
ce moyen portent avec eux autant de viures, qu'il leur en fault pour le
temps qu'ils veulent loger en la campagne. Qui fut cause, que faillif-
mes à cete entreprise : car ne leur etant permis de porter aucun bagage
en ce voyage, & ayans à passer par dixhuit lieuës de pays bruslé & de-
fert, au deuxiesme iour les viures nous faillirent, dont feusmes contrains
les attendre à Peuples : & ce pendant les Capitaines Pierre Negre, &
Iulian Romerou chefs des bandes Espagnoles (auertiz de nostre entre-
prise) se sauuerent dans le pays d'Angleterre : & ainsi sans rien faire
nous retirasmes à Edimbourg, ou si peu de tems que les gens de guerre
y seiournerent à veoir leur conuersation entre les Escossois, ils se mon-
troient estre nays & nourriz en Escosse. Car outre que ces deux peu-
ples ont tousiours esté bons amis, & qu'on ne sauroit trouuer deux autres
nations en tout le monde plus compatibles, la singuliere prudence &
iustice de monsieur de Dessé, sa douce, humaine, & priuée maniere de

gouverner, etoyent de si grande efficace, qu'il sembloit, que ce fust assez de sa volonté, pour faire faire à chacun ce qu'il deuoit. De sorte que pour estre obey des soldats (ce qui se trouuera en peu d'autres) iamais ne leur commanda avec feuerité ne menaces : mais ie suis certain qu'en sa vie il n'en offensa vn tout seul, ny d'effect, ny de paroles : & au cas pareil ne fera aucun, qui vueille dire, que iamais soldat contreuint en aucune chose à son vouloir.

DE QUELQVE TVMVLTE, QUI SE FIT À EDIMBOURG.

CHAPITRE VINGTTROISIESME.



Insi viuoyent bons amis les François & Escossois, comme la parfaite amitié est ordinairement entre les bons & semblables en vertu, quand vn soldat François, inconnu & de peu de compte, & trois ou quatre Escossois d'Edimbourg iniurierent l'un l'autre par paroles outrageuses. Et apres maintes disputes entr'eux vindrent aux armes : plusieurs Escossois accourans pour mener le François en prison, & quelques soldats François à l'aide du feditieux : qui fut vne erreur, qui cuida tourner à grand scandale : & toutesfois sans la faute des chefs : lesquels aussi tost qu'ils en oyrent le bruit, y acoururent hatiuement, & pacifierent la querelle à fort grand pene. Puis firent le iour mesme en la grand place d'Edimbourg (ou auoit esté commencée la noise) pendre & estrangler le chef du tumulte. En ce faisant aplicquerent tel certain remede à cet inconuenient, que cet accord tint, & tient encor aujourd'huy, sans que la conuersation, encor qu'elle ait esté fort familiere & amie entre ces deux nations, ait peu engendrer depuis nouuelle occasion de querelle.

DV MOIEN DE PROCEDER, QU'EUT MONSIEUR DE
DESSÉ, À COURIR LE DEFFAUT DE SON ARMÉE.

CHAPITRE VINGTQUATRIESME.



Vi voudra confiderer les œuvres de monsieur de Delfé, conoitra facilement, en quelle grandeur de courage & sagesse il se maintint entre ce peuple etrange : lequel venant à recouurer sa liberté, estoit de plus dangereuse & difficile conuersation, que ceux, qui ont tousiours eu la fortune prospere & fauorable. Pour montrer donq aux Anglois, que les troubles n'etoient si grans entre nous & les Escossois, qu'ils s'etoient fait croire, monsieur de Delfé assembla ses forces le plus secretement quil peut : lesquelles, bien qu'elles fussent fort afoiblies, il les sauoit faire paroistre pour aussi grandes, que s'il n'eust iusques lá perdu vn seul homme. En ceste maniere monsieur de Delfé fit deloger son armée pour aller à Monsebbrou : ou les gens de guerre, assurez que c'etoit pour executer quelque entreprinse, alloyent de grande gayeté de cœur. Tant est ce moyen de proceder vtile & profitable, encor que les commandemens fussent extraordinaires, qu'ils sont tousiours aisez à accomplir, sans ce qu'on s'en acquiert vn honneur incomparable, avec la bienueillance & contentement des soldats.

D'VNE ESTRETTE ET CAMISADE, QUE DONNA
MONSIEUR DE DESSÉ, À CEUX D'EDIMTON.

CHAPITRE VINGTCINQIESME.



Outes choses donques prudemment ordonnées & appareillées pour cet effort, sur les vnze heures de la nuit chacun print les armes : & etant le ciel fort obscur, monsieur de Dessé fut guidé par vné commodé & secrète auenuë gagner la porte de la ville d'Edimton, & ce avec tel silence & promptitude, que les ennemis ne s'en apperceurent iamais iusques à ce qu'aucuns de noz foldats, etans montez par vn eperon, & ayans coupé la gorge à trois sentinelles, firent oyr le nom de France avec si grand bruit, qu'en mesme heure chargeans viuement leur corps de garde (qui estoit assez mal en son deuoir) se donna l'alarme à la ville : alors noz gens de guerre se declarerent, & selon l'ordre, qui leur auoit esté donné, coururent teste baissée les vns par derriere vne eglise, ou les Anglois tenoyent leurs viures & munitions, & les autres vers la porte, laquelle ils forcerent avec si grande impetuosité, que peu d'espace fut laissé aux ennemis pour courir aux armes. Le corps de guet des Italiens fut incontinent taillé en pieces : & de ce peu d'Anglois, qu'on trouua faifans vne autre garde, les vns furent tuez en dormant, & ceux qui veilloient furent couchez pour iamais en terre. Car les ennemis donnoient assez de loisir aux nostres d'en faire grande execution, & encores d'emporter la ville sans grand perte. Mais ne voulant monsieur de Dessé auanturer vn seul des siens à la mercy de fortune, redoutant tousiours (comme tout prudent capitaine doit

faire) que sous vne si grand faute feust quelque ingenieuse fraude cachée : & sachant, que toute insolence en la faueur du fort est tousiours perilleuse & dommageable : sans separer ses forces l'efforceoit avec incroyable diligence à gagner dedans la ville. Ainsi n'auoyent les ennemis qu'vn seul endroit à garder, qui estoit cause qu'ils ne se trouuoient en si grand danger, que s'ils eussent esté enuironnez & ceinçts à l'entour : dautant que peu de gens batoyent à la defense, etant cete auenuë fort malaisée & étroite, & accommodée de terrins & tranchées, ou ils pouuoient tirer à couuert. Et ce neantmoins monsieur de Deslè, n'abandonnant iamais le front de sa bataille, gaignoit tousiours pays sur eux, montrant tels signes de sa vertu, que, si la renommée n'est fort ingrate, elle tesmoignera à ceux, qui viendront apres, que peu de ses contemporains ont manié les armes avec plus de prudence & hardiesse, que luy. Il estoit secondé de plusieurs braves hommes, qui y firent tous ce, qu'il est possible à vaillans hommes de faire. Desia noz soldats auoyent crié mille foyz Victoire, Victoire, & la pensoient tenir par les cheueux : car de cinq cens ennemis, qui s'etoient presentez pour leur defendre l'entrée, vns avec l'espee & la dague en chemise, autres avec hallebardes, & bien peu qui feussent armez, les deux cens cinquante auoyent esté iettez morts sur le pané à coups de main, sans iusques lá perdre vn seul des nostres.

CONTINUATION DE LA CAMISADE.

CHAPITRE VINGTSIXIESME.



Veritablement à veoir comme la fortune nous ryoit à ces commencemens, il sembloit que la victoire ne nous peust eschapper, si cet empeschement ne se fust opposé à l'execution de nostre entreprise. Qu'estant monsieur de Dessé & les siens en butte d'un double canon braqué entre deux gabions à l'estroite auenuë de la ville, lequel il n'auoit encor esté possible de gagner, se trouua de mal'heur vn foldat François natif de Paris (qui s'estoit peu de tems au parauant laissé corrompre à seruir d'espie aux ennemis) lequel pour la crainte qu'il auoit d'estre venu à temps de porter la punition deuë à sa faute, iouant à la desesperade, tout nud & sans armes qu'il estoit, se ietta à ce canon, qu'auons dit, & y meit feu. Or pource que noz gens de guerre (encores qu'ils entraissent de furie fort pressez & ferrez) etoyent soustenuz de plusieurs terrins, fossez & rempars, le canon en tua beaucoup. Par ce moyen, & que l'erreur nocturne empeschoit de veoir quelle perte nous auions faite (laquelle veritablement n'estoit point si grande, qu'elle peust empescher la victoire) se leua vn estrange cry, qui sembloit estre de plusieurs voix ensemble.

“ Et comme le moindre accident, qui se puisse rencontrer, ruine le
 “ plus souvent telles entreprises, pour estre tousiours les expeditions no-
 “ éturmes accompagnées de faulces imaginations :” Ces voix entendues
 par les derniers, ils commencerent à se retirer, & de degré en degré quel-
 ques autres, avec si peu d'ordre qu'ils se rompirent d'eux mesmes. Ce

que venant aux oreilles de monſieur de Deſſé, demeuré à tenter la victoire avec vn bon nombre de vaillans hommes, ne peult qu'il ne fiſt démonſtration du regret qu'il auoit, qu'vn tel & ſi grand auantage luy coulaſt des mains. Toutesſois amoneſté par ſes familiers de ne courir à vne mort euidente, & puis que ceſtuy cy ne ſuccedoit, qu'on pourroit apres chercher par autres moyens la victoire, il feit ſonner la retraite, gardant touſiours la maniere honorable, qui y eſt requiſe. Ainſi avec la perte d'aucuns des ſiens, & plus grande ſans comparaifon de ſes aduerſaires, gagna lieu de ſeureté: ou diſſimulant prudemment ce qu'il en penſoit, il diſt en ſoubriant au ſeigneur d'Oifel: Prenons le cas (mon compaignon) que nous callions le voile, attendans vn tems proſpere à ſuivre noſtre route.

DE PORTYGRES, QUE LE MILHORD GRÉS MIT ENTRE LES MAINS DES ANGLOIS: QUELLE ISSUE PRINDRENT LES ENTREPRISES, QUE FEIT MONSIEUR LE CONTE D'ARAM, POUR LE RECOUURER: ET CELLES, QUE FIRENT LES ANGLOIS, POUR S'AGRANDIR EN CET ENDROIT D'ESCOSSE.

CHAPITRE VINGTSEPTIESME.



L ſemblera, peut eſtre, à quelqu'vn, que ie ſois entré trop auant en l'hiſtoire d'Eſcoſſe, ſans faire plus ample mention du Milhord Grés. Je diray donc, que ce gentilhomme auoit tant voulu fauoriſer les Anglois, que de leur bailler volontairement vne de ſes maiſons, nommée Portygrés, aſſiſe tant bien à propos ſur le fleuee de Thais, vn des plus nauigables fleuees de toute

l'Eſcoſſe, qu'au montant des marées les nauires du port de trois cens & trois cens cinquante tonneaux pouuoient anchrer à cent ou fix vingts pas pres la porte de ce chasteau. Au recouurement du quel monſieur le Conte d'Aram auoit defia fait deux entrepriſes : en la moindre deſquelles il y auoit plus de huit mil hommes, & huit pieces d'artillerie. Mais il l'estoit retiré la premiere fois, voyant que le moyen, qu'il auoit de l'emporter, ne luy ſuccedoit. Et en la ſeconde le Conte d'Arguil, qui les tenoit aſſiegez, fit trefues pour quelque tems avec ceux qui etoyent dedans : durant lequel il vint ſecours aux Anglois, avec telles forces, que le Conte d'Arguil, avec ſes ſauuages (qui auoyent accomply le tems, qu'ils etoyent tenuz de ſeruir) fut forcé de leuer ſon ſiege, & laiſſer emparer les Anglois d'une petite montagne, qui eſt à neuf cens pas du dict Portygrés. Ou, encor qu'ils l'aidaffent aſſez mal de la belle & forte aſſiete, & des grandes commoditez, qu'ils auoyent entre les mains : ſi eſt ce qu'ils y feirent vne belle fortrefſe, n'epargnans aucune choſe pour le rendre admirable, & le bien munir d'artillerie, d'hommes, & de viures. Car pource qu'ils l'aſſuroyent, que par lá ils auroyent vne facile entrée en Eſcoſſe, voulans l'en ayder, ils y enuoyerent de ſeize à dixſept cens Lanſquenets, et quelques Anglois à pié & à cheual, qui allerent de lá à Domdy, vne des plus belles & mieux peuplées villes de tout le pays : dans laquelle ils entrerent ſans aucune difficulté. Car encor que Domdy ſoit vn lieu des plus riches & mieux baſtiz de tout le Royaume, & plus aiſé à rendre inexpugnable : comme de tout tems les Eſcoſſois ſe ſont peu ſouciez de ſe fortifier, les habitans de Domdy n'auoyent autre cloſture ne fort pour ſe retirer, que leurs maiſons. Et par ce deſſaut les Anglois n'y trouuerent pas grande reſiſtance. Ce qu'entendant monſieur de Deſſé, y enuoya le Conte Rimgraue, avec deux enſeignes d'Allemands, & le ſeigneur d'Etauges, avec ſa compagnie : leſquels il ſuyuit de pres avec bonne part de ſes forces.

Or ne ſe peurent exploiter toutes ces choſes ſans le ſceu des Anglois :

Domdy.

combien que cete entreprife, et toutes autres, qui etoyent de monfieur de Delfé, feuffent conduittes avec toute la prudence qui fe peut trouuer en vn perfonnage de finguliere vertu. Ayans donc les Anglois bien auertiffement, qu'on les alloit trouuer, quitterent leur entreprife de fortifier Domdy, à quoy ils auoyent vacqué huit iours entiers : & apres qu'ils l'eurent pillée & laiffée en feu, quand ils fceurent que les François s'ap-prochoyent deux, se retirerent incontinant à leurs forts de Portygrés, qui n'en etoyent qu'à vne lieuë Françoisé. Enquoy la fortune leur auoit aministré de bons efpiens : pource que le Conte Rimgraue, avec quelques harquebouziers à cheual, & le feigneur d'Etauges, avec fa caualerie, s'e-toyent mis deuant, pour les amuser, ce pendant que les gens de pié ve-noyent le grand pas, faifans doubte de n'arriuer à tems pour combatre. Ceux cy entrez en Domdy, en intention de donner l'alarme aux ennemis, n'y trouuerent que quelques pauures femmes, & peu d'hommes qui s'es-lâyoyent d'estaindre le feu, que les Anglois auoyent mis en leurs maifons. Parquoy enuoyerent querir leurs gens de pié, & s'y logerent.

D'VNE ESCARMOVCHE, QUE LE CONTE RIMGRAUE, ET LE
SEIGNEUR D'ETAUGES ATTAQUERENT AUX ANGLOIS 'DE
PORTYGRÉS.

CHAPITRE VINGTHUITIESME.



Eux iours apres les Capitaines. que j'ay nommez, entreprendrent d'aller avec leurs compagnies, veoir la fortresse, que de nouueau les Anglois auoyent faite à Portygrés, & en aprochoyent en forte, que ceux de dedans furent contrains de sortir, ou laisser reconoistre leur place du pié de la muraille. Par ce moyen s'y dressa vne fort braue escarmouche : ou noz Allemans l'atta-

querent avec ceux de l'Anglois, lesquels ils chargerent si rudement, qu'ils les repoulsèrent iufqu'au pié de la baffe court de leur fort : ou ils trouuerent le refte de leurs forces, qui receurent les noftres à la faueur de leur artillerie, qu'ils auoyent toute affifé de ce cofté. Là le feigneur d'Etauges, & le Conte Rimgrauue montrèrent tel exemple de bien faire à leurs foldats, & firent tous tant de deuoir, que fans crainte de peril, qui fe prefentaft, ils rembarrerent plusieurs fois leurs ennemis iufques dans leur fort. Puis quand ils virent leur poinct, fe mirent à la retraicte vers Domdy, tournans vifage à tous propos, & gardans en forte la maniere honorable, qui eft requife à fe retraire, que ie puis dire des Allemans, qui firent feruice au Roy en Efcoffe, que nation de la terre ne fäuroit, avec plus grand deuoir de fidelité, plus de vertu & grandeur de courage, l'expofer aux dangers pour fon Prince & fouuerain feigneur, que le Conte Rimgrauue & fés Allemans ont fait en toutes les entreprifés, qui ont été faites contre les Anglois en Efcoffe, pour le feruice du Roy. Et quant au feigneur d'Etauges, ie croy qu'il n'eft homme viuant, qui peuft dire, que ce ne feuft vn des plus affurez & vaillans hommes, qu'on euft fceu trouuer : & la compagnie, qu'il auoit en Efcoffe au feruice du Roy, vne des plus belles & mieux completees, qu'on en veid oncques.

LA MANIERE, COMME LE CHASTEAU DE HUMES
TUMBA ES MAINS DES ANGLOIS.

CHAPITRE VINGTNEUFIESME.



Pres que ces entreprises eurent eu l'issué que nous auons dit, monsieur de Dessé, pour empescher que les Anglois de Portygrés ne donnaissent plus auant dans le pays, laissa à Domdy sept enseignes de gens de pié François, & deux d'Escoflois, avec artillerie & pioniers, pour l'y fortifier : puis se retira à Edimbourg, avec le surplus de ses bandes : ou iugeant estre fort raisonnable de donner quelque repos aux gens de guerre, les ennoya à sainct André, à sainct Ian d'Eston, à Aberdim, à Monrofts, à Blacquenay, & en quelques autres villages de la prouince de Faif.

Sainct André est assis sur le bord de la mer, & soloit estre vne des meilleures villes d'Escofle : Mais elle est incommodée de ces necessitez, que le port ne la rade, n'y font point feurs, & ne peut estre fortifiée, qu'elle ne demeure de plus grand garde que Thurin. Et toutesfois ne l'y peut trouuer lien commode pour faire vne Citadelle, qu'on n'endommage beaucoup l'abbaye, ou est le siege de l'archeuesque de toute la prouince de Faif, qui est vn fort beau & grand edifice. D'autant que le chasteau qui y estoit, lequel fut en grand partie ruiné par deffunct monsieur le Prieur de Capue, estoit commandé non seulement de la dicté abbaye, mais encor de toute la ville.

Sainct André.

Et quant à saint Ian d'Eston, c'est vn fort gentil lieu, plaissant, & bien accommodé pour y faire vne bonne ville, qui se pourroit rendre feure pour les habitans, faisant vne citadelle ou est l'eglise sainte Croix.

S. Ian d'Eston.

Aberdim.

Aberdim, est vne ville belle & riche, habitée d'un bon peuple, assise en la province de Marach, sur le bord de la mer. Il n'y a pas bonne rade, mais le port y est fort seur & aisé, n'étoit pour l'entrée, qui est étroite. Elle est aisée à fortifier, pour estre des deux costez close de Dom, & Dé, deux fleuves peu gayables. Et par les autres endroits ayant la plaine rase & spacieuse, pour y dresser Boulouars & defences, pour euter qu'une montagne, qui est du costé du pont, ne luy puisse nuire en baterie. Il l'y pourroit à trop moindre frais faire vne Citadelle, qui pourroit commander au port & à toute la ville : en laquelle est un siege Episcopal, & vne vniuersité assez bien ordonnée & accomplie.

Monrosts.

Quant à Monrosts : Monrosts est un beau bourg assis au pays de Marine, ou la riuere d'Haes entre en la mer. La rade n'y est pas seure. Mais il y a un fort bon port, & aisé à entrer & sortir à toutes marées. Et est fort aisé à fortifier : mais qui voudroit euter plus grand frais, il l'y peut commodement faire un fort, qui commandera à tous les nauires, qui voudront entrer ou sortir de la riuere. Car quant au fort, qui y est, il n'a aucune commodité d'eau, & est si peu spacieux, qu'il n'y a lieu pour retirer viures, ne loger gens de guerre. Et outre le mal d'estre assis sur sablons mouuans, & fait de gazons de terre seche, il n'est aucunement flanqué ny construit en endroit pour le pouuoir estre. De Blacquenay, & des autres places assises en la province de Faif, pource qu'elles ne sont pour estre de grand seruice en tems de guerre, ie retourne à dire, que toutes choses furent disposées par monsieur de Dessé avec tel ordre, qu'il n'y auoit homme, qui se mescontentast : Et n'étoit laissée aucune occasion aux ennemis d'entreprendre sur nous quelque chose à leur auantage. Ce pendant le Milhord de Humes (duquel nous auons parlé plusieurs fois en cete histoire) qui auoit avec déterminée volonté resolu de recourir son chasteau, ou despendre sa vie à la poursuite, practiquoit plusieurs moyens pour reprendre sa place de Humes, laquelle les Anglois auoyent heuë plus par tromperie, que par force, peu apres la desfaite des

Escossois à Monffebrou : & pource qu'il ne fera hors de propos, ie diray comme il auint.

Les Anglois donc s'attribuans desia la conqueste d'Escosse, apres que les choses leur succederent mieux qu'ils n'auoyent esperé, estimerent n'auoir rien si neceffaire pour acheuer si haute entreprise, que s'employer à la prise du chasteau de Humes, etant (comme il est) vn Boulouard & frontiere à tout le Royaume d'Escosse, assis sur vn rocher taillé, & de tres difficile auenuë, & droitement sur le passage d'Angleterre en Escosse. Et de fait l'assiegerent tout autour. Mais pour estre le lieu de sa nature fort auantageux, encor qu'il y eust peu d'hommes dedans, les Anglois y auoyent consummé plusieurs iours en vain, quand ils s'auiserent de cete cautelle. Ils firent vn matin planter vne potence à la veuë du chasteau, & manderent par vn trompette à madame de Humes (laquelle avec aucuns de ses subiets s'estoit iettée dedans, en intention de le garder) que, si dans deux heures elle n'auisoit à leur rendre la place, ils feroient pendre deuant ses yeux son propre fils, lequel ils tenoyent prisonnier entre leurs mains. La bonne dame, qui n'auoit avec elle qu'un pauvre peuple sans experience & iugement, fut tellement troublée de ces nouuelles, qu'elle ne peut oncques penser à dissimuler sa crainte deuant le trompette Anglois. Ne voyant encores toutesfois, que la chose feust reduitte à l'extreme neceffité, elle respondit : " Que la vie & la mort de son fils estoient en la volonté de Dieu, avec l'aide duquel elle esperoit garder son chasteau tant qu'elle viuroit, & iusqu'à la mort du dernier des siens." Cete parole portée aux Anglois par la trompette, ils prirent ce pauvre gentilhomme son fils, & l'ayant lyé etroitement, & acoutré au reste comme vn homme qu'on mene au dernier supplice, le trainerent iusqu'à la potence, apres l'auoir fait passer en tel equipage pres le fossé & murailles du chasteau, pour estre piteux spectacle à la mere : laquelle n'ayant pas le cœur d'attendre qu'on passast à plus grand desroy, mais voulant promptement pourueoir au salut de son fils, commanda qu'on leuast

une banderolle sur les murailles, pour appeller les ennemis à parlementer. Pour le faire court, ceste pauvre dame, estimant qu'elle estoit tenuë de fuyure le party, qui sauuoit la vie à son fils, & le pouuoit tirer hors de danger, rendit par ce moyen son chasteau de Humes aux Anglois : lesquels l'auoyent tenu iusqu'icy, comme vn fort, qui leur estoit fort à propos, & de grand support & seruice.

DU RECOVVREMENT DU CHASTEAU DE HUMES.

CHAPITRE TRENTIESME.



Mon iugement que madame de Humes vîa de prudente deliberation, mettant arriere tout autre respect, & tenant tout son conseil du salut de son fils. Pource que la vie & grandeur de sa maison, consistant en la sienne, etant hors de danger, il auroit tems de venger cete iniure, & de recouurer sa perte : ce qu'il sceut faire, avec louable & glorieuse fraude, comme vous orrez. Incontinat apres que le Milhord Grés se fut retiré en Angleterre, le Milhord de Humes ayant retiré sa troupe au couuert des montagnes à vne lieuë pres de Humes, enuoya sept ou huiët de ses hommes vers le chasteau, ceux mesmes, lesquels à cet effet auoyent par le commandement de la Reyne douairiere, & de madame de Humes leur maistressë, longuement fauorisé les Anglois, & aydë à dresser les boulouards, couillons, & casinates, qu'ils y firent, & par ce moyen noté suffisamment la façon de leurs guets & sentinelles. Ceux cy doncques vestuz en paisans, & sans armes, avec quelques viures estans pris par les Anglois, & menez à Humes, furent interrogez sepäremment, ou etoit l'armée des François, &

celuy qu'ils appelloient le Milhord de Humes. Ils furent tous trouuez conformes en leur responce, ainſi qu'ils auoyent eſté inſtruits par la Reyne, & dirent que tous etoyent à Edimbourg. Ce que croyaus les Anglois, compterent le payement de leurs viures, & les prierent de retourner ſouuent : Ce que les ſept feirent des le lendemain, par le commandement de leur maiftre, arriuans au chafteau les vns apres les autres, ou etans ſurpris de la nuit à auant qu'ils fuſſent depeſchez par les Anglois, & comme ſi le ciel euſt voulu fauoriſer l'entrepriſe, tombant à l'heure vne forte pluye, & ſe leuant vn tems le plus impetueux, qu'il ſeroit poſſible, furent aucunement priez de demeurer : à quoy obtemperans du premier coup, ainſi qu'on leur auoit fait le bec, ſceurent la nuit enſuyuant trouuer l'opportunité de coucher en lieu, ou ils peuſſent fauoriſer leurs compagnons. Leſquels ainſi qu'ils etoyent guidez par le huitieſme, qui ſçauoit toutes les adreſſes, & plus faciles aduenues du chafteau, en approcherent aſſez pres, ou ils ſe poſerent attendans, que celui, qui auoit la charge de la place (qui eſtoit vn Capitaine Anglois, hardy de ſa perſonne, mais ayant peu d'experiance du fait de la guerre) euſt fait ſa ronde : aſſurez que (ſelon ſon accouſtumance) il ſe retireroit incontinent apres. Or l'auoyent ils recogneu à la lanterne, qu'il faiſoit ordinairement porter deuant luy : qui fut cauſe qu'avec plus d'aſſurance ils l'aprocherent peu à peu, tant qu'un gentilhomme du nom de Humes, aagé de plus de ſoixante ans (qui guidoit toute la troupe) monta par vne muraille de gazons, par laquelle, pour eſtre faite en talus, & refreſchie des grandes pluyes qui tumboient, la montée etoit aſſez aiſée & facile.

Quand ce gentilhomme fut à ſa hauteur pres du bord de la muraille, il ſe voulut encor auancer, mais ainſi qu'il ſe haulſoit, vn Anglois poſé en ſentinelle en ce meſme endroit, l'ayant entreueu, donna l'alarme fort chaude au corps de garde, & au reſte de la garniſon du chafteau. A ce bruit le Capitaine Anglois, qui etoit entre les draps, ſe leua en ſurſault,

& s'étant armé d'un coutelas & d'une rudelle d'acier, & au reste en ses acoutremens de nuit, courut la part d'où venoit l'alarme, ou ne voyant rien de vray semblable (selon son iugement) qu'il y eust gens en pays, pour le temps qui étoit froid & pluvieux, entrant en cholere se meust à blâmer & injurier la sentinelle qui avoit donné ceste faulx alarme. " Les François (disoit ce Capitaine de Humes) sont trop loing de nous pour se venir acheuer de perdre à espier nos murailles : & les Escossois trop debiles aux entreprises de la guerre, pour perdre de semblables nuits à hazarder leurs vies, qu'ils ont en si grande recommandation disant ces paroles, ce gentil Capitaine se retira en son logis." Mais les Escossois qu'il avoit outragez de parole, & qui auoyent bien oy tout ce qu'il avoit dit, quand ils pensèrent, qu'il pouvoit estre retiré, & le reste des foldats rassurez & paisibles, firent monter le vieil gentilhomme, qu'auons dit avoir plus de soixante ans, pour les guider à l'acheuement de leur entreprise. Cetuy cy, entendant que la sentinelle se promenoit en filant, remonta le plus doucement, qu'il peut iusques au parapet de la muraille, d'où s'aperceuant que son sisleur luy avoit tourné le dos, luy courut sus la dague au poing, de laquelle il luy donna tant de coups à la gorge & à l'estomach, que l'ame trouua assez d'ouverture pour sortir de son corps. Et se trouua si bien fuyuy des siens, & fauorisé de ceux, qui étoient entrez des le iour precedent, que ceux, qui se rencontrèrent des Anglois, passerent tous au fil de l'épée. N'étant le Milhord de Humes rien moins louable pour avoir vaincu ses ennemis & recouert sa place par ceste ruse, que s'il l'eust emportée d'assault, apres une furieuse batterie, & un long siege de grand despenf. " Car c'est une gloire incomparable à un chef d'entreprise, de manier les armes avec tant d'avantage, que, preferuant les siens des perils, il surmonte son ennemy, & fait " sortir plain effet à ses desceins."

LA PRINSE DV SEIGNEUR D'ETAUGES DEUANT
BROUTYGRECQ.

CHAPITRE TRENTEVNIESME.



N ce temps le Conte Rimgrauue s'embarqua pour retourner en France, laissant cinq enseignes d'Alle-mans sous la charge, du Capitaine Rotouze, bon homme de guerre, & de grande experience. Et pour continuer mon histoire encommencée, ie veux dire, comme il auint, que le seigneur d'Etauges fut pris deuant Portygrêcq, afin que si les choses du monde ont en tout tems quelque conformité avec ce qui ha esté fait, on se puisse seruir en celles, qui se presenteront, de la consideration des choses passées, bien ou mal qu'elles ayent esté faites. Le seigneur d'Etauges auoit le siege de sa garnison à Domdy, qui est vne des meilleures villes d'Escosse, assise sur le fleuve de Thays, fort aisée à fortifier, continuant le dessein qui en est commencé : elle est distante vne lieuë du fort de Broutygreccq, construit & occupé par les Anglois, lieu veritablement, qui sembleroit imprenable à tous les hommes du monde pour mille circonstances & bonnes parties. Avec la compagnie du seigneur d'Etauges, vne des plus belles (à mon auis) & des mieux montées & armées qu'on veid oncques, estoient sept enseignes de gens de pié François, & deux d'Escossois, dont l'une estoit de gens de cheual. Tous lesquels d'un commun accord dressoyent ordinairement quelque entreprise, pour aller recueillir les Anglois de Broutygreccq, & en auoyent tousiours emporté le meilleur, comme ceux qui sauoient sagement prendre leur auantage, & choisir tems oportun pour ce

faire. En cete forte etoyent reduits les Anglois à cete subiection, qu'ils n'osoient plus faillir de leur fort, au moins abandonner la faueur de leurs murailles plus que de la portée d'une harquebouzade. Ce qui estoit cause, que le seigneur d'Etauges (qui estoit homme vaillant & hazardeux) les auoit en tel mepris, qu'un iour se delibera d'aller veoir en petite compagnie un bateau qui estoit eschoué aupres de Broutygrecq. Et estimant qu'aussi bien ils n'oseroient venir au combat, en collet de marroquin, & sans autres armes, que de l'espee & la dague, il monte sur un gentil cheual Turc, & ayant dit à sept ou huit gentilshommes des siens, qu'ils l'armaient & le suyuissent, se met deuant au pas, ne pensant aller autre part qu'à l'esbat aux champs une heure ou deux. Mais Beauchatel, qui se trouua à propos, voulant iouer au plus seur, ayant veu son Capitaine monter à cheual en cet equipage, fait prendre les armes à vingt ou vingt-cinq de ses compagnons, & avec eux se met apres le seigneur d'Etauges à toute bride, lequel auoit desia esté decouuert par les Anglois : car depuis Domdy iusqu'à ce fort n'y a qu'une grande plaine egale, marécageuse, & penible par tems d'hyuer, laquelle est toute à la veuë de Broutygrecq, assis sur le plus hault d'une montagne, qui s'esleue en cete plaine à mille pas de la riuere de Thays. Partant des que le seigneur d'Etauges se monstra hors de Domdy, ceux du fort commencerent à luy tirer plusieurs canonades : car les Anglois entre toutes les nations de la terre sont ceux, qui sont plus d'estat de l'artillerie, & qui y mettent plus leur assurance : chose, peut estre, qui leur peut valoir contre quelques autres, mais non contre les François, qui en sont auuiourd'hui si peu de compte, que leur fureur n'est soutenable, soit en defense de place, ou en la campagne, de toute l'artillerie du monde. Aussi ne peuvent ils empêcher, que le seigneur d'Etauges ne reconeust leur place tout au tour, comme il auoit fait plusieurs fois : ce qui incita les Anglois de faire fortir sur luy quelques soldats Espagnols de Pierre Negre & onze soldats Italiens, que la liberalité du seigneur d'Etauges auoit peu de temps au par

auant montez & armez, & en reconoiffance de ce bien fait auoyent tourné leurs robbes, & changé d'efcharpe, pour nuire à celuy, auquel ils etoyent redeuables en mille fortes. Ce pendant Beauchastel l'estoit ioinct à luy, avec vingteinq falades de sa compagnie, tous bouillans, hazardeux, & vaillans, ce qu'hommes fauroyent estre : ce qu'ils ont fait conoistre par mille preuues, en toutes les entreprises, qui ont été faites de leur tems contre les Anglois. Le seigneur d'Etauges les retint quelque peu, pour attirer ces Espagnols & Italiens le plus loing qu'il pourroit : puis voyant son poinct, & qu'ils commençoient à se retirer vers leur fort, les chargea de telle ardeur & violence, qu'il porta par terre tous ceux, qui se trouuerent les moins prompts à la retraite : mais ainfi qu'ayant acheué sa charge il retour noit pour reprendre son auantage, & les siens obeiffans à son commendement auoyent desia pris la cargue de ceux, qui etoyent accouruz à la recouffé des Espagnols, en vn contournement, que fait son cheual en lieu marecageux, il l'enfondra en sorte, qu'il ne peut, qu'il ne tumbast du tout sur le costé dextre : & se voulant retirer en haste, il fut enueloppé par plus de trois cens, tant d'Anglois, d'Espagnols, que d'Italiens, tellement qu'il fut contraint de mettre pié à terre, & de chercher sa deliurance en la force de ses bras : & de fait fait tant d'armes (comme fort vaillant homme, qu'il estoit) qu'en le difant aucuns pensoyent oyr choses extraordinaires, mesmement d'un homme defarmé, comme il estoit alors. Finablement toutesfois il fut faisy de toutes parts, & retenu prisonnier. Beauchastel & ses compagnons, qui le virent en si mauuais party, tournerent pour faire vne recharge, & firent tout ce que gens de bien fauroyent faire pour le recouurer : mais les Anglois le retirerent incontinant dans leur fort, laiffans les Espagnols & Italiens pour leur faire teste, à la faueur de l'artillerie qu'ils auoyent toute affisé de ce costé : parquoy ils furent contraincts de se retirer avec celle perte, qui leur fut d'autant plus pesante à porter, que c'estoit la premiere qu'ils eussent encores receuë des Anglois, & (qui est le principal) d'un capitaine

vaillant de sa personne, & si familier & liberal à ses foldats, que s'il n'estoit à la guerre, il auoit tousiours plus d'egard à leur liberté, qu'à sa prééminence.

CONTINUATION DE L'HISTOIRE, ET DES QUATRE COMPAGNIES ENUOYÉES PAR LE ROY EN ESCOSSE.

CHAPITRE TRENTEDeuxIESME.



Ombien que les Anglois fussent les plus affligez (car ils auoyent tousiours emporté le pire) si est ce que le nombre des François estoit fort diminué, pour beaucoup de capitaines & gentilshommes, qui estoient retournez en France, avec les seigneurs Strozzi & d'Andelot : pour d'autres, qui estoient morts à la guerre : & plusieurs, qui nous estoient ostez par le cours des maladies, lesquelles auoyent esté si grandes au nouveau changement d'air, qu'à bien peu de ceux qui estoient tumbéz malades auoit esté possible de sauuer la vie, nonobstant la curieuse diligence, que la bonté de la reyne douairiere metoit à les folliciter, n'y employant seulement l'œuure, & la peine de ses medecins & chirurgiens, mais n'espargnant se maiesté mesmes, à visiter pauvres & riches, & faisant part aux vns & aux autres de tout l'argent qu'elle auoit. Or etant le Roy amplement assauanté de tout, en ce mesme tems que monsieur le Connestable estoit à Bordeaux, le Roy ordonna qu'en attendant la saison nouuelle, qu'il enuoiroit en Escosse vne plus grosse armée, monsieur le Connestable y feroit passer quatre compagnies de gens de pié de celles qu'il auoit. Ce qui fut promptement executé : & s'embarquerent ces quatre bandes à Bordeaux dans nauires

de marchans, conduites par le Conte de Visques, & le seigneur de Fourqueuaux, perfonnages de bon fervice, fages, & dignes d'honneur : lefquels retardez par vents contraires (etant la faifon mal conuenable à nautiquer) furent contraints d'aller chercher refrefchiffemens à Brest, & de paffer enuiron trois moys auant, que d'arriuer à Dombertram vn port d'Efcoffe, d'ou ils allerent trouuer la Reyne, avec les Capitaines Ialinques, fainct André, Cageac, & la Mothe Rouge, vaillans hommes, & accompagnés de bons foldats Prouençaux & Gascons, bien armez, & qui ont autant fait de deuoir en tous les lieux ou ils ont trouué occafion de montrer leur vertu, & es entreprifes, efquelles on les ha employez, qu'autres firent oncques. Ils furent receuz avec bon vifage de la Reyne, de monfieur de Deffé, & du feigneur de la Chappelle de Biron. Avec cete armée etoyent venuz gens des finances, qui apportoyent l'argent du Roy pour les foldats : chofe, qui leur vint fort bien à propos : car les trois moys, que cete armée auoit été à faire le voyage depuis Bordeaux iufqu'à Dombertram, etoyent deus aux gens de guerre, qui auoyent paffé en Efcoffe avec monfieur de Deffé. Et en cet endroit fault que ie dye, qu'oncques foldats, qui ayent été fi long tems fans recevoir la foulde en pays etrange, & entre tant de coruées & de trauail, ne porterent (peut etre) tant d'obeyffance à leurs chefs, & ne firent ce qu'ils debuoyent fi volontairement, que ceux cy ont fait. De cela etoit caufé en grand partie la nompareille douceur, clemence, & liberalité de la Reyne, qui faifoit naiftre es cœurs de tous vne fouueraine reuerence enuers elle : & l'humanité de monfieur de Deffé, par laquelle il fe faifoit obeyr, & gaignoit la grace des foldats, & leur contentement.

D'VNE ESCARMOVCHÉ DEUANT DOMBARRE, OU FUT
PRIS SER IAN OILFORT GENERAL D'EDIMTON.

CHAPITRE TRENTETROISIESME.



Es Capitaines Achault Carrouan & Define etoyent en garnison au chasteau & ville de Dombarre, qui est assise fur le bord de la mer, à dix lieuës d'Edimbourg du coste de lodient en si bonne assiette du pays & accommodée de tant de bonnes parties, qui profitent à la vie des hommes, que si la ville estoit bien fermée de murailles, veu qu'on y pourroit aysément & à peu de frais faire vn bon port, nous la compterions entre les plus belles villes des Isles de l'Océan. Et quant au chasteau, c'est vne fort belle & forte place, bastie sur vn hault rocher, au bord de la mer, de tresdifficile aue-nuë, & ou l'art ha esté gardé tellement, que peu de lieux se trouuent au-iourd'huy au monde, qui soyent de leur nature plus auantageux, ne moins subiets à baterie & à toute autre forte d'expugnacion, qu'est ce chasteau, qui est assez pres de Ladres, de Domglas, d'Edimton, d'Ef-mons, & Fauxcastel, & sur le chemin de Berruic, & Rousslebron en Es-cosse. Parquoy ne se passoit iour que les ennemis ne se presentassent deuant, courans le pays tout autour, depuis que nostre camp s'y fut re-tiré, comme ha esté dit. Les Capitaines François, que j'ay nommez, s'etoyent rencontrez avec eux maintesfois : Mais, pour estre les Anglois à cheual, & les nostres à pied, ils n'auoyent encor passé à fort grand com-bat, & s'etoyent ces Capitaines (comme gens experimentez au fait de la guerre) auisez, qu'ils deuoyent feindre de n'oser plus faillir sur eux, à fin de les attirer par ce moyen, & leur donner enuie de s'auanturer à venir

quelques fois plus auant. A quoy ils ne faillirent pas : Car apres que les ennemis eurent noté par cinq ou six diuerfes fois, que les François auoyent fuy le combat, ils le tournerent du tout à leur auantage, & en vindrent à telle & si grande infolence, que tous desbandez s'espandirent par le bourg, iufqu'à se hazarder de mettre pié à terre, pour entrer aux maifons. Or auoyent à ce coup les Capitaines (qu'auons dit) mis tel ordre à leur apprefter vne tromperie, qu'avec leurs plus grands forces ils s'etoyent iettez des le plus matin dans deux logis vis a vis l'un de l'autre, & dans vne Eglise, qui est à l'entrée du bourg, droitement fur l'auenü des ennemis : & auoyent en quatre ou cinq autres des plus fenres maifons atiltré de leurs foldats avec harquebouzes à croc, & autres munitions, pour les endominager s'ils osoyent entrer si auant : ayant semblablement mis ordre à tout ce, qui seroit bon à faire. Apres donc que les Anglois se furent epanduz par le bourg de Dombarre, & que le General d'Edimton, avec cinquante ou soixante harquebouziers à cheual, se fust auancé iufques à vue harquebouzade du chasteau : les Capitaines Carrouam, Define, & Achault, lesquels ne s'etoyent encores declarez, fortirent de leur imbofcade, & commencerent de tous costez d'enuironner les ennemis. Le General d'Edimton voulut alors retirer ses gens vers la riue de la mer. Mais soixante ou quatre vingts foldats Snialats, embusquez en cet endroit pour leur empescher cete voye, tirerent sur sa cavalerie, & garderent qu'ils ne passassent outre. Car en mesme heure les Capitaines Achault & Define leur donnerent à dos, les chargeans à gauche & à dextre de telle ardeur, que plusieurs furent portez par terre. D'autre part les harquebouziers, qui etoyent dans les logis qu'auons dit, ainfi qu'on les auoit instruits, auoyent percé le mur en diuers endroits, & tiroyent franchement au trauers d'eux, qui leur etoyent comme en butte.

Ainsi etoyent les Anglois encloz & enuelopez de tous costez, & assailiz de la plus grand furie, qu'il est possible, qui les renga à vne si ex-

treme contrainte, qu'ils commencerent à deffendre leurs vies avec vne grande vertu. “ Car les armes qui sont plus inuincibles, & de plus forte deffense, sont celles, que met en main la neccessité.” Mais sur ce poinct vn foldat Basque, vaillant & assuré de sa personne, appelé Pellicque, lequel fut peu apres Lieutenant du Capitaine Cageac, s'adressa au general d'Edimton, & apres luy auoir ietté plusieurs grands coups de picque, luy tua son cheual entre les iambes, & l'ayant blessé le forcea de luy donner la foy. Ce qui affoiblit le courage des siens en forte, qu'ils commencerent à se retirer à la debandade : & ceux, qui se trouuerent contraints de tourner visàge, se ietterent à la desesperade à trauers de soixante ou quatre vingts foldats François, lesquels leur auoyent coupé le chemin de leur retraite : Lesquels en tuerent & retindrent prisonniers plusieurs : les autres se sauuerent par la vitesse de leurs cheuaux, sans qu'ils osassent plus attendre vne seule charge : comme il auient souuent, qu'à la retraite d'une entreprise, ceux, qui y ont mal fait leurs besongnes, perdent le cœur en forte, qu'ils font beaucoup moins de cas de la renommée, que de la vie.

FIN DU SECOND LIVRE.

TROISIESME LIVRE DE L'HISTOIRE DE LA GUERRE D'ESCOFFE.

ESCRITE PAR I. DE BEAUGUÉ, GENTILHOMME FRANÇOIS.

AVEC QVELLE VERTV MONSIEUR DE DESSÉ
ENTREPRIT LE VOYAGE DE THUYDEL.

CHAPITRE PREMIER.



Vous avez ouy des façons de faire des Escossois, de la bonté & valeur de monsieur de Dessé, & des efforts & faits d'armes de tant de preux & excellens hommes, qui se trouuerent en la guerre d'Escosse. Et n'estimons auoir rien obmis en ces commencemens de la guerre, qui peut estre digne de souuenance. Sinon (& cela veux ie confesser librement) que, pour n'auoir tant d'eloquence à racompter les vertuz des vertueux, qu'ils ont montré de preud'homme & bonté, ou ils ont esté employez, ie fraude plusieurs vaillans hommes, à mon grand regret, de bonne part de leur gloire. Mais ayaus achené tant de hautes entreprises pour l'amour de vertu : ioinct, qu'ils ne manqueront de Prince, qui vueille donner le salaire de leurs recommandables seruices : cete honneste consolation leur demeure, "Que les
" vertueux faits d'armes sont tant haultlouables de foy, qu'ils portent
" non seulement leur honneur avec eux, mais sont encor louëz des hommes de peu de compte, outre leur volonté."

Retournans donc reprendre le fil de nostre histoire, Si tost que la nouuelle de la prise du seigneur d'Etauges fut venuë aux oreilles de monsi-

eur de Delfé, il proposa d'aller mettre son siege deuant Portygrés. Car cet excellent personnage, qui estoit acoutumé à porter constamment l'une & l'autre fortune, ne se contristoit ny esmouuoit iamais pour inconuenient qui luy eust peu auenir. Bien fauoit il appliquer certain remede aux mauuais accidens, comme ie croy certainement qu'il eust fait à celui, qui estoit suruenu au seigneur d'Etauges, sachant que les forts de Portygrés etoyent prenables. Mais les Escossois furent d'auis, que monsieur de Delfé feroit plus de seruice à la Reyne, s'il alloit à Gedouart, avec ses forces, remonstrans que la noblesse & menu peuple du pays de Thuydel se rendoyent tous Anglois, d'autant qu'on ne leur donnoit aucune faueur, & qu'ils n'esperoyent plus en nostre secours, ayans veu que les Anglois nous en auoyent fait desloger vne fois. Ce qui esmeut la Reyne (qui auoit à craindre, que les Anglois l'y fortiffiasent) à commander à monsieur de Delfé de ce faire. Lequel, encores qu'il coneuft euidentement la necessité que souffroyent ses soldats, auxquels il estoit deu deux moys entiers, & qu'il preueust sagement le peu de moyen de viure que nous pourrions trouuer dans vn endroit de pays, ou la plus grand part des gentilshommes, & tout le peuple, portoyent les armes contre nous: si est ce qu'il s'accorda liberalement d'obeyr à la Reyne, remettant les moyens, qu'il auoit d'emporter Portygrés, à vne saison plus conuenable. Et ainsi feit publier son depart, pour aller au pays de Thuydel: sans qu'un tout seul des gens de guerre, soit des François, ou des Allemans fist semblant qu'il y allast à regret ou contrecœur. Sur quoy on peut asseoir iugement, que peuuent valoir les bons & loyaux soldats, qui ont tel zele & affection au seruice de leur Prince, que sans argent & sans viures, ils s'exposent de tel cœur aux dangers & à la pene, que si outre leur souldo ordinaire on leur faisoit à toute heure mille presens.

COMME ON EMPORTA D'VN SEUL ASSAULT LE CHASTEAU
DE FERNAYS, QUI ETOIT ESTIMÉ INEXPUGNABLE.

CHAPITRE DEUXIESME.



L n'y auoit encor vn iour naturel que nous estions arriuez à Gedouart, qui est (apres Berruiq, que l'Anglois ha iniustement vny à sa prouince de Northumbeland) des meilleures villes du pays de la marche, que Lerd de Fernays, gentilhomme du mesme pays, aduertit monsieur de Dessé qu'en vn sien chasteau l'etoyent iettez soixante ou quatre vingts Anglois, avec vn Tyran tant miserablement cruel & barbare, que depuis trois ou quatre moys, qu'il auoit surpris cete place par fraude, il n'auoit obmis vn seul acte de l'impieté des plus inhumains Mores de l'Afrique. Dont monsieur de Dessé esmen proposa de l'aller assaillir. Pource faire luy, & les seigneurs d'Oisel, & de la Chapelle de Biron partirent de Gedouart, avec quelque nombre de gentilshommes & soldats esleuz, donnant ordre que les Capitaines Ialinques, saint André, Pierre Longue, Cageac, & la Mothe Rouge se metroyent deuant, avec deux cens harquebouziers, & quelques corselets de leurs compagnies. Lesquels approchez à vn trait d'arc du chasteau de Fernays descouvrirent environ vingtcinq harquebouziers Anglois, s'efforceans, avec la commodité d'un lieu etroit & aisé à deffendre (qu'ils auoyent sceu choisir bien à propos) de leur empescher le passage. Mais à l'approcher des nostres ils furent de la premiere charge forcez de gagner hastiuement le dedans du boys, ou les Capitaines, que i'ay nommez, les poursuuyirent tousiours batant iusqu'à la porte de la

baillé court du chasteau, ou dix de ces harquebouziers Anglois, moins dispos que leurs compagnons, furent tumbez morts, ou bien blefsez par terre, & presque tous de coups de main. Toutesfois les plus avancez sceurent trouver le moyen de fermer leur porte, & noz gens de guerre de reconoistre leurs murailles tout à l'entour : & voyans qu'elles n'estoyent hors d'eschelles (pource qu'ils n'eussent pas voulu, qu'autres qu'eux mesmes eussent part à l'honneur de cete entreprise) enuoyerent diligemment pour recouurer quelques longues perches pour s'en ayder au lieu d'eschelles. Quand les Capitaines que j'ay nommez & quelques gentils-hommes qui estoient venuz avec eux, se faisoient ayder à quelques goiats s'acrochent de pied & de mains à la muraille, & receuans plusieurs coups de pierres & de flechades montent sur la muraille, ou ils monstrent grande experience de leur valeur. Et tout en un tems furent si bien suyvis de leurs soldats, qu'ils forcerent les Anglois se retirer dans une grosse tour carrée, qui estoit au milieu du chasteau, à l'entour de laquelle noz harquebouziers se rangerent, en sorte que piece de ceux de dedans n'osoient monstrier le nez. Puis ayans trouué le moyen de se couvrir de tables, firent en peu d'heure un trou en la muraille à passer un homme. Et furent ces choses exploitées tant heureusement, que fors le Capitaine Serret (qui y fut blessé d'une harquebouzade, qui luy perça la main gauche d'outre en outre) homme n'y receut coup ne blessure, qui l'empeschast de continuer son entreprise. Ce que ayant esté veu par le Capitaine Anglois & ses compagnons, ils s'estonnerent en sorte, que, ne trouuans plus de remede à leurs affaires, & perdans entierement toutes leurs forces & l'espoir de leur defense, ils commencerent à parler de se rendre : & conclurent que leur Capitaine nous viendrait offrir la place. Ce capitaine donc, passant par le trou qu'aons dit, fit offre de rendre le chasteau, la vie de luy & de ses soldats sauue : auquel, par le commandement de monsieur de Delfé, fut dit pour toute réponse, que les serfs ne peuvent presenter conditions à leurs maistres. Parquoy, suyuant la

promesse qu'on auoit faite à ce Capitaine, on le laissa rentrer dans la tour, & alors recommencerent noz soldats à besongner à la muraille, pour les auoir par force. Ce pendant grand nombre d'Escoffois, qui auoyent suyuy monfieur de Deffé, auoyent mis pié à terre, & ayans abandonné leurs cheuaux (comme ils font coustumiers de faire) anoyent tant fait, qu'ils auoyent forcé la porte de la basse court, ou nous estions. Ce que voyant le Capitaine Anglois, & iugeant en soy mesmes, que, s'il tumboit entre les mains des Escoffois (lesquels il auoit autrefois tant offenze) il y alloit de sa vie, descendit de rechef à ce trou, & cherchant à sauuer sa personne, se vint rendre entre les bras du seigneur de Duflac, & de la Mothe Rouge. Lesquels ainsi que, luy voulans faire bonne guerre, le menoyent par la main pour le tirer hors de la presse, se trouua vn Escoffois, qui le recogneut pour le cruel Tyran, qui auoit autrefois forcé sa femme & ses filles. Et se ressentant de tant d'outrages, auant qu'aucun l'aperceust de ce, qu'il proiettoit de faire, luy coupa si iustement la teste d'un coup d'espée, qu'elle futa plus de quatre pas loing du corps : laquelle fut foudainement auec de grandes huées recueillie par plus de cent Escoffois, & en haut esleuée, pour monstrier la vengeance, qu'ils auoyent prise de ses ordes & sales cruantez. Puis, apres que plusieurs d'entre eux se furent mouillé les mains au sang de cete charongne, auec vne telle ioye, comme s'ils eussent emporté d'un assaut la ville de Londres, porterent cete teste sur vne croix de pierre, qui depart trois chemins : ou ils la laisserent pour estre veuë de tous les passans. Qui considerera bien la fin de ce malheureux homme, dira, qu'un gentilhomme de Charrolois dit auec bon iugement,

“ Iamais, iamais l'impieté.

“ Sans la vengeance n'a esté

“ D'une, & d'une autre iuste pene,

“ Cy haut, & là bas en enfer.

“ Si les Dieux ont les pieds de laine,

“ Aussi ont ils les bras de fer.

DU PAYEMENT QUE RECEURENT QUELQUES ANGLOIS
DE LEURS CRUAUTEZ.

CHAPITRE TROIZIESME.



E monstre, tout le tems qu'il demeura en Escosse, ne trouua onc ieune femme, qu'il ne forçast : ne vieille, dont il ne se peust ayder, à qui il n'ostast la vie avec cruels & impetueux tormens. Et voicy qu'apres tant de stupres, occisions, & larrecins il receut le payement deu à son merite. Et ainsi que ces choses se faisoient, d'autres Escossois s'eprouuoient, qui plus aisément couper oit vn bras ou vne iambe d'un Anglois : & quand ils ne trouuerent plus que tuer, ils achetoyent ceux, auxquels les François auoyent sauué la vie : pour tel pris qu'on en demandoit : & pource faire ils nous donnoient iusques à leurs armes, puis les faisoient mourir cruellement. Et me souuient, qu'ils en recouurerent vn de moy pour vn cheual, puis luy lierent les pieds, les mains, & la teste ensemble : & l'ayant trainé en cet esquipage au milieu d'un grand pré, le coururent à coups de lance, ainsi armez & à cheual qu'ils etoyent, par tant de fois, qu'ils le feirent mourir, & puis feirent mille pieces de son corps, lesquelles ils se partirent entre eux, & les portoyent au fer de leurs boys. " En ce cas ie ne louë beaucoup les Escossois : car ie ne sçay quel est ce luy, qui prend plaisir au dommage d'autrui. Mais ie dy bien, ainsi " comme avec tyrannie les Anglois auoyent affligé l'Escosse, qu'avec " iustice les Escossois retournoyent payer leurs cruautez."

COMME LE SEIGNEVR DE LA CHAPPELLE ALLA RECO-
NOITRE ROUSSEBROU : ET QUEL RAPPORT IL EN FIT.

CHAPITRE QUATRIESME.



Tans tous de retour à Gedouart, le feigneur de la Chappelle de Biron en partit, avec mille hommes de pié, & avec la compagnie du feigneur d'Etauges, pour aller reconoitre Rouffebrou, que les Anglois auoyent fortifié, à deux lieuës de là. Ce qu'ayant executé avec fort sage affurance, brulla (en se retirant) tous les moulins, qui leur pouuoient estre commodés. Et pource que par son rapport on coneut, que la place estoit de sa nature forte & en difficile affiette, comme celle qui est ceinte des deux costez de deux bonnes & grosses riuieres, la Thuyde & Ladre, & au demeurant accommodée de tant de bonnes parties, qu'on la pourroit dire inexpugnable : Monsieur de Dessé remit les moyens, qu'il auoit, de l'emporter, à vn tems mieux à propos : Iugeant que voloir gagner vn tel fort par vn long siege, estoit vn moyen de si grans fraiz, que la despenfè passeroit trop le gaign, & l'auantage qui s'en pourroit esperer. Je croy bien estre fouueraine louange à vn chef d'armée, acquerir par siege vne place, qui importe à son Prince de grand chose. Mais avec ceux, qui ont plus de connoissance des choses du monde que moy, i'estime, que si vn Capitaine conoist, que cete maniere d'expugnation n'est pour luy succeder aisément, il doit cercher par autres moyens la victoire : à l'exemple de monsieur de Dessé, lequel sachant que Rouffebrou (comme auons desia dit) estoit flanqué par les deux costez de deux fleuues peu gayables, & que les au-

tres endroits etoyent trop marecageux & incommodes pour y camper par tems d'hyuer, il delibera, avec monfieur le Conte d'Aram, d'employer fès forces en endroit, ou fe prefenteroit plus d'auantage.

AVEC QVELLE PRVDENCE MONSIEUR DE DESSÈ SAUOIT
EUITER LES INSOLENCES DE LA GUERRE: ET QUEL BON
HEUR IL AUOIT, À EMPORTER LES PLACES DES ENNEMIS.

CHAPITRE CINQIESME.



Ne des preuues, qui montra monfieur de Dessè etre accomply de toutes les vertuz, qui font neceffaires à l'homme de guerre, fut, que fâchant combien les foldats fouffroyent de neceffité à Gedouart, il ne les laiffloit oififs vne feule heure, à fin qu'etans occupez en quelque entreprife, n'euffent tems ne pour murmurer, ne pour penfer au dommage d'autrui. Pour le faire court (à fin que ie ne defrobe à vertu fon falaire) monfieur de Dessè etoit tant heureufement obey, qu'en fâ prefence les gens de guerre craignoient d'auantage etre veuz tenir les bras en efcharpe & fuyr le trauail, que quelques autres ne craignent iouër à l'enny deuant leurs chefs, qui mettra plus de vices. Considerant donc ce bon perfonnage, que les foldats etoyent reduits à vne grande extremité, dreffoit ordinairement nouuelles entreprifes fur les Anglois: en l'vne defquelles nous entrafnies fi auant dans le pays de Northumbeland que par dela leur Ouare emportafmes fur eux par force d'armes le chateau de Cornouaille, basty à l'antique de groffle maffonnerie, & fort bien garny de defenfes, au demeurant accommodé de bonnes eaux, de boys, & de plufieurs autres chofes requi-

les à la vie humaine. Nous trouuâmes en cete place grande quantité de Saumons salez, & beaucoup de bons meubles, qui se troquerent fort à propos, pour subuenir au besoing des gens de guerre.

CONTINVATION DE L'HISTOIRE, ET DU BON HEUR DE MONSIEUR DE DESSÉ.

CHAPITRE SIXIESME.



Ainsi que monsieur de Dessé deliberoit de passer outre les monts de Chenyot & Eufdail, il fut auerty par les Escossois, qu'à deux lieues du chasteau de Cornouaille estoit vne autre place sur la riniere de Tif, que tenoyent les Anglois : lesquels par ce moyen pourroyent beaucoup endommager le pays, si on la laissoit entre leurs mains. Et luy, qui n'auoit plaisir plus grand au monde, qu'à chercher de faire seruice à la Reyne d'Escosse, sachant combien vostre maiesté, Sire, l'auroit agreable, achemina son armée droit à ce chasteau, dans lequel etoyent quatre vingts ou cent Anglois, qui se rendirent à la discretion de monsieur de Dessé des la premiere sommation qu'il leur fit faire. Et reprochans quelques vns des notres cete vilté de cœur aux Anglois, en presence de monsieur de Dessé, il dist : Que les Anglois en cet endroit auoyent fait acte de prudens hommes, ayans mieux aimé se fier en sa volonté, qu'auoir recours à l'espée. Ce sage & heureux cheualier sauoit, autant qu'homme viuant, haultlouër & honorer vn hardy courage, & en ses ennemis mesmes. Mais comme celuy, qui estoit n'ay pour executer les hautes & grandes entreprises, il estimoit, qu'un fort de si petite consequence, qu'il estoit, n'estoit pas assez pour tenir contre luy, quand encor les plus gens de bien d'Angleterre eussent esté establiz à la garde.

D'VN EXPLOICT D'ARMES, DONT LE CAPITAINE COBIOS
EMPORTA LE DESSUS SUS LES ANGLOIS.

CHAPITRE SEPTIESME.



Le veulx dire vn exploit d'armes digne d'accompagner les plus extraordinaires, soit des anciens, ou de nostre temps. Les Anglois de la frontiere, ayans oy les nouuelles de la perte de leurs forts, commençoient à s'assembler en grand diligence, pour nous repouller hors de leurs terres. Et etoyent desia de sept à huiët cens cheuaux, lesquels separéz en deux troupes couroyent tout le pays, pour nous trauailler, & surprendre ceux, qui l'escartoyent de nostre camp. Les Escossois en faisoient autant de leur costé, brulans & fondroyans toute la frontiere, par ou ils passoyent. Entre autres le Capitaine Cobios le ienne, qui auoit charge de cinquante cheuaux legiers Escossois, au seruice du Roy, personnage belliqueux, & de bonne entreprise au fait des armes, estoit fort de Gedouart trois ou quatre heures deuant iour, avec cinquante lancettes, & six gentilshommes François sans plus, qui etoyent Dussacq, Desboryes, Duno, Brouilly, Danché, & Beauchastel. Et fault que ie dye en cet endroit, que les Escossois, qui font ordinaire exercice du fait de la guerre, font entre toutes les autres nations du monde ceux, qui sans difficulté achenent plus heureusement les entreprises hazardeuses, & qui sont plus propres aux expeditions nocturnes. Le Capitaine Cobios n'estoit encor esloigné deux lieues Françoises de nostre camp, que ses coureurs luy raportèrent, qu'ils auoyent descouuert enuiron cinq cens ennemis tous montez & armez à l'Angloisè,

lesquels il estoit pour rencontrer en teste, s'il continuoit à s'uyure le chemin, qu'il auoit proposé de tenir. Ce que voulant euit le Capitaine Cobios (" car, disoit il, la partie seroit trop inegale de cinquante six contre cinq cens, & est follement preux celui, qui met en peril sa vie, pour " en remporter vn reproche à sa renommée") il tournoit bride pour se retirer au couuert d'une montagne, quand il oyt vne grosse troupe d'ennemis venir le gallop comme pour s'adresser droit à luy. Ceux cy estoient les coureurs des Anglois, en nombre de quarante ou cinquante chevaux : lesquels ayans descouvert le Capitaine Cobios, n'osans entreprendre de le charger, retournerent tout court en auertir leurs compaguons, qui n'estoyent loing six cens pas. Et ce pendant le Capitaine Cobios retira sa troupe au pié de la montagne d'Escedail, se tenant à la teste, avec les plus assurez & experimentez des siens. Car puis qu'il ne se voyoit fort grand auantage pour se retirer à toute bride, il aimoit mieux attendant les ennemis prendre la fortune du combat, & en ce faisant mettre luy & les siens en esperance d'une mort honorable, qu'en fuyant à van de route se desesperer de la vie & de l'honneur ensemble. En cete resolution il commença à inciter les siens de bien faire. Et ainsi qu'il leur ordonnoit se tenir prests pour charger les ennemis, si tost qu'ils se montreroient à eux, le seigneur de Dufflacq les descourrit à deux cens pas, qui venoyent mal en leur deuoir, crians & faisant vn grand bruit. Et lors Cobios & sa petite troupe tous à la fois allerent donner sur les ennemis, ainsi qu'ils auoyent à demy passé l'endroit de leur imbofcade, & les chargerent de telle furie, qu'ils rennerferent & mirent en route les premiers. Le croy bien, que le bon heur fut de la partie des Escossois en ce rencontre : mais d'autant que ceux, qui assaillent, entrent au combat avec plus grand courage, que ceux, qui sont assailliz, s'estime que le Capitaine Cobios auoit par ce moyen doublé l'assurance aux siens, & diminuée aux ennemis. Lequel, voyant que la fortuné luy ryoit, commença à escrier à voix forte, & les gentilshommes François avec luy,

France, France, Victoire, Victoire. Ce qui meit vn tel froid aux os des Anglois, qu'étans en mesme instant rechargez viuement par la troupe de Cobios, commencerent à fuyr en tel desordre, qu'il y en eut la plus part de morts, ou prins prisonniers, iusques entre les deux chasteaux de Feur. Et n'en eust eschappé que bien peu, sinon que le Capitaine Cobios voyant paroistre l'aube du iour, & amonesté par les gentilshommes de craindre, que ceux, qui alloient fuyans denant luy, quand ils viendroyent à s'appercevoir de ses forces, tournassent pour luy faire teste. rallia les siens, qui fuyuoient chaudement la victoire. & avec plus de prisonniers Anglois, qu'il n'auoit eu de gens à les combattre, se retira à Gedouart, ou il fut recen de monsieur le Conte d'Aram, & de monsieur de Dessé, avec l'honneur, & bon visage, que merite vn gentil Capitaine. apres l'heureuse & honorable issue d'une haute entreprise.

DU DEGAST, QUE FIT LE SEIGNEUR DE LA CHAPPELLE
AU PAYS DE NORTHUMBELAND.

CHAPITRE HUITIESME.



Ar ce que i'ay dit des exploits de tant de preux & vaillans hommes, il est aisé de conoitre, qu'en hauts & vertueux faits, & en toute autre perfection d'excellente vertu plusieurs de nostre tems se conforment aux anciens, & mettent pene de les ensuyure avec telle grandeur de courage, que nous pouuons dire, avec vn tresdocte gentilhomme du pays de Vendomois.

“ Ces meſmes flambeaux des cieux,

“ Ce Soleil, & cete Lune,

“ C'etoit la meſme commune,

“ Qui luifoit à noz ayeux :”

Nous etant demeurez au monde tous les ſignes de la vertu ancienne. Mais pour retourner d'ou ie ſuis ſorty, pour faire cete digreſſion : Sachant monſieur de Deſſé, qu'apres tant de deconſitures les vnes ſur les autres, tous les cœurs des Anglois de la frontiere ſe rempliſſoyent de peur & de frayeur, ayant mis l'affaire en deliberation, enuoya le ſeigneur de la Chappelle de Biron, avec la compaɡnie du ſeigneur d'Etanges, & cinq cens hommes de pié, bruſler & foudroyer tous les villages, iuſques à Neufchattel : ce qu'il acheua avec tant de vertu, que pour la prudence & bon ordre, dont il vſa en cet endroit, & pour le ſeruice qu'il ha fait à la Reyne en toutes les entrepriſes qui ont été faites contre les Anglois, les Eſcoſſois l'appellent encores auiourdhuy Cheualier excellent & ſans blaſme. En ce voyage nous viſines le lac Myrtoun (duquel pluſieurs historiographes ont eſcrit, & à la verité) etre gelé en la moitié d'iceluy. & en l'autre etre en ſon entier, comme en temps d'eſté.

DV DEGAST, QVE FIT MONSIEUR DE DESSÉ DANS LE PAYS D'ANGLETERRE.

CHAPITRE NEUFIESME.



Le ſeigneur de la Chappelle de Biron retourné à Gedouart, monſieur de Deſſé en deſlogea deux iours apres, avec quatre pieces d'artillerie de campagne, & toutes ſes forces : & entrant dans le pays d'Angleterre print le chateau de Feur, ou les ſoldats mirent le feu, & à dix villages habitez à vn quart

de lieuë l'un de l'autre. En quoy les Anglois receurent vne fort grande playe, pour estre les plus riches, mieux bastiz, en meilleure & plus comode affiette de pays, qu'autres villages, qu'ils eussent en toute leur frontiere. Autres plusieurs grandes, & louables entreprises acheua monfieur de Delfé, auant qu'il se mist au retour vers Gedouart. Et auint, ainfi qu'il faisoit marcher son armée, que plus de trois mille cheuaux ennemis furent veuz de loing faire semblant de voloir adreffer à nous. Par quoy monfieur de Delfé enuoya incontinent le seigneur de Villegaignon, avec harquebouziers à cheual, & quelques falades de la compagnie du seigneur d'Etauges, reconoitre de pres que c'estoit : mais eux, qui s'etoyent maintesfois aperecez à leurs despens, que monfieur de Delfé aimoit beaucoup mieux combatre, que fuyr, auoyent reculé, & gagné l'auantage des montaignes. Et continua monfieur de Delfé de faire marcher son armée comme au parauant, gastant & ruinant tout le pays ennemy, par ou il passoit, sans qu'il se presentast autre chose pour nous empescher, que quelques Anglois esbanduz & escartez par le pays, qui se retiroient aussi tost, que dix cheuaux des nostres se debandoyent, pour les aller reconoitre. Et en ce bon ordre arriuasmes à Gedouart, ou ne fut possible de faire en forte, que les Escossois rapportassent aucune chose du pillage qu'ils auoyent fait à la faueur des François, qui pouuoit valloir plus de neuf mille escuts. Et ainfi ne demeura aux gens de guerre (outre les playes & blessures) que l'honneur de l'obeyssance, qu'ils portoyent à leurs chefs, & l'heur des assaults, & exploicts de guerre, ou ils auoyent montré leur vertu.

COMME LES ANGLOIS FONT TOUSIOURS CAS DES
PROPHETIES.

CHAPITRE DIXIESME.



E pourrois par plusieurs exemples montrer clairement, combien les Anglois ont de tout tems fait ceremonie de leurs propheties, si nostre propos estoit d'eux principalement. Mais pour laisser infinies choses, qui de cecy font foy, quelques soldats du Capitaine saint André auoyent pris en vn village pres d'Onart vn Anglois entre autres tant fier & superbe, qu'encores qu'il se dist prestre il portoit trop mieux le semblant d'un rude barbare & rebarbatif homme de guerre, que d'un personnage, qui se iettaist fort sur l'obseruation de l'amour & crainte de Dieu. Ce gentil prestre, captif comme il estoit, auoit si peu oblié de sa presumption, qu'il entroit en piques à tous propos avec tous ceux qui deuisoyent avec luy, disant à tous, mesinement à ceux dont il estoit prisonniers: que les François n'estoyent entré en Angleterre à autre fin, que pour reconoitre & remarquer les lieux, ou les Anglois leur feroient vne fois tirer la charrue, reseruant la pene de leurs cheuaux pour aller encor vn coup froudroyer la France. Car (disoit il) nous auons vne prophetie, en laquelle ie croy comme en l'Euangile, qui nous assure, que les Anglois auant trois ans se feront seigneurs de la France & d'Escoffe, commandans aux vns & aux autres, comme vn maistre à son esclaue. Mais quand les Capitaines Ialiques & saint André luy eurent fait veoir de trois à quatre cens de ses voisins

prisonniers entre les mains des François, & qu'il eust entendu par eux mesmes, que tous leurs meilleurs villages auoyent esté mis en feu, leurs forts ruinez & rafez par terre, & entierement toute leur frontiere iusques à Neufchastel fourragée & destruite, il dist, puis que sa prophetie monroit d'estre faulſe, qu'il ne voloit plus viure, pour n'estre contraint de veoir ce Ciel, qui auoit (comme il disoit) souffert, qu'un tel & si grand malheur tumbast sur les Anglois. Et depuis ne volut boire ne manger, quelque force qu'on luy feit pour ce faire : mais couché le visage contre terre, sans parler ny ouurir les yeux, mourut languissant de faim, en cete obstination, & cruauté de courage.

DES AFFLICTIONS QVE RECEURENT LES FRANÇOIS À GEDOUART.

CHAPITRE VNZIESME.



Es miseres humaines sont telles, & les auantures des hommes tant diuerſes, que ceux, que la fortune veult trauailler, elle les flatte premierement de quelques prosperitez. Apres que monsieur de Desſé eut couru le pays d'Angleterre, emporté leurs places, coupé leurs viures, deffait & vaincu tous ceux qui s'estoyent presentez en la campagne, & (à fin que ie le dye en vn mot) apres toutes heureuses issues de magnanimes entreprises : Ce tres vertueux personnage fut affligé de ces piteux inconueniens, que la necessité, que souffroyent les soldats à Gedouart, estoit si grande, que celui, qui ne voloit mourir de faim, estoit contraint de conseruer sa vie en peschant, ou chassant : les autres, qui ne pouoyent s'accommoder à tels

exercices, deffailloyent fous le faix, & mouroyent fans remede : d'autant qu'apres tant de trauaux qu'ils auoyent soufferts fans interualle ny relafche, venans à languir de faim, trauaillez & rompuz, ils tumboient malades, d'ou ils ne leuoyent de leur vie. Et encor que tous les foldats fuſſent vaillans & de grand cœur, qui ne ſ'etonnoient pour choſe qu'ils euſſent à souffrir, ſi eſt ce que la mort nous rait tant de bons & braues hommes, qu'à moins de pene ie compterois le peu, qui nous reſta de vi-uans, que le grand nombre de ceux, qui morurent. Entre ceux, qui y pourueurent le mieux, furent les Allemans, deſquels on dit encor auourd'huy en Eſcoſſe, qu'ils prindrent tout le poiſſon de la riuere de Gept, dont eſt appellé Gedouart, & qu'on n'y en ha veu depuis.

La Reyne douairiere auoit, comme l'or au feu, montré ſa valeur parmy ces calamitez : & comme douée de tresexcellentes vertuz, auoit en telle maniere ſupporté les miſerables incommoditez de la paureté des gens de guerre, que tout ce, qui ſe peut faire, elle l'auoit fait pour eux. Monſieur de Deſſé y auoit liberalement deſpendu tout ce, qui luy reſtoit pour la deſpenſe de ſa maiſon, & iuſques à ſes meubles. Les ſeigneurs de la Chappelle & de Villepareſis, n'auoyent épargné tout ce qu'ils auoyent peu recouurer pour le ſoutenement de la vie des foldats, & ce peu ou beaucoup de pris, qu'ils auoyent retiré de leurs meubles, ils auoyent deſpendu de bon cœur, ou en tenant maiſon, ou le departant egale-ment à ceux, qui laſſez & vaincuz du trauail, & des maladies ne pouoyent fortir du logis : & exerçans leur liberalité en toute autre maniere louable & vertueuſe, comme excellents qu'ils ſont en toutes choſes dignes de louange. Les Capitaines, & gens de bonne maiſon auoyent tous fait ce qu'ils deuoyent, & pouoyent faire pour leur deuoir. Leſquels en grand partie etoyent demeurez malades, ou des playes qu'ils auoyent receuës aux aſſauts des places, que nous auons emportées ſur les Anglois : ou de la pitié, qu'ils prenoyent du beſoyn de leurs foldats. Entre leſquels le Capitaine Ialinques, gentilhomme de Languedoc, excellent en experi-

ence de discipline militaire, & de recommandable vertu, apres qu'il ne luy resta plus, en quoy il peust penfer, pour conferuer la vie à ses foldats, se molesta de tant d'ennuys, qu'ayant esté bleffé à la guerre quelques iours au parauant (dequoy il n'estoit encor bien guarý) tumba malade de fiebures, dont il morut peu de iours apres, avec autant d'honneur (pour les vertuz & bonnes parties, qu'on conoissoit estre en luy) que s'il fust mort au milieu de cent mille espées ennemies. Le Capitaine Charles, bon & vaillant homme de guerre, qui estoit enseigne du Capitaine saint André, le seigneur du Pont, gentilhomme Poiçteuin, le seigneur du Verger, le seigneur du Mont, & plusieurs bons foldats y moururent des bleffeurs qu'ils auoyent reçeuës à la guerre : ausquels on feit tel honneur, que meritent recevoir les vaillans hommes, pour guerdon de leurs beaux & excellens faits. Eux tous depouillerent les miseres de cete vie avec telle allegresse de cœur, qu'il feroit estrange de le croire. “ Aussi n'auient il “ qu'aux vertueux hommes, & faisans profession de force, proësse, & “ vertu, de pouuoir honorablement morir : &, comme dit vn docte gen-
“ tilhomme,

“ Nous ne deuons esperer

“ De tousiours vifs demeurer,

“ Nous, le songe d'une vie :

“ Qui (bons Dieux !) auroit enuie,

“ De vouloir tousiours durer ?

D'VN AVERTISSEMENT, QUE RECEUT MONSIEUR DE
DESSÉ DES ENTREPRISES DES ANGLOIS.

CHAPITRE DOUZIESME.



Omme il auient souuent, que la trefinconstante fortune offense les tresgrandes vertuz : il vint auertifement à monsieur de Dessé, que les Anglois en nombre de plus de huiët mille hommes s'etoient assemblez à Rouffebrou, pour nous courir fus. Encor que tous les mauuais accidens, qui luy eussent peu auenir, ne luy fissent peur, mais se voulant tenir sur ses gardes, ayant laissé le seigneur de la Chappelle de Biron à Gedouart, pour disposer de toutes choses, & pourueoir de remede aux inconueniens, qui pouuoient suruenir, monta à cheual enuiron la minuiët, avec les seigneurs de Villeparefis, de Villegaignon, & ceux, qui luy etoyent demeurez, tant de sa compagnie, que de la caualerie legere du seigneur d'Etauges, pour entendre plus au vray la deliberation des ennemis. Et comme il se feust tenu quelque tems au couuert de quelques vieilles ruines, qui etoyent sur le chemin de Rouffebrou à Gedouart, il sceut par deux Anglois, etans de fortune tumbéz en ses mains, que leur armée estoit deslogée de Rouffebrou, pour l'aller trouuer à Gedouart, cuidans le suprendre endormy, ou du moins le charger de si pres, qu'il ne pourroit s'exempter de la bataille : de laquelle (disoyent ils) les Anglois (comme les plus forts) se tiennent affurez d'emporter le meilleur, ayans sceu par vn Escossois, nommé Feruais, que vous ne pouuez auoir en vostre camp mille hommes, qui puissent combattre. Ces nouuelles entendues par monsieur de

Dessé, retourna tout court en son camp faire mettre aux chams ce peu de gens de guerre qui luy restoyent. Et ce pendant que le seigneur de la Chappelle les rangeoit en ordre de bataille, monsieur de Dessé, ayant decouvert les coureurs des Anglois, à fin qu'ils pensassent, que ses forces etoyent plus à craindre que Feruais ne leur auoit donné à entendre, enuoya le Capitaine Loup & Beauchastel pour les reconoistre, & pour les soustenir fit auancer les Capitaines saint André & Cageac, avec cent barquebouziers, lesquels, tous vaillans & assurez qu'ils sont, autant que gens de bien fauroient estre, y alloient teste baissée, en intention d'attaquer les Anglois : mais eux, qui en auoyent aussi peu de volonté, que de charge, se retirerent dans le bois de Feruais, & les nostres au pont de Gept, ou le demeurant de nostre petite armée attendoit en bataille.

DE LA RETRAITTE DE GEDOUART.

CHAPITRE TREIZIESME.



Monsieur de Dessé, comme tres experimenté qu'il estoit, sçauoit fort bien, qu'en tenant la campagne il ne pourroit euitier le combat, si les Anglois le voloyent contraindre, mesmement encloz de fleues profonds & impetueux, & si pres des ennemis qu'il estoit. Partant donc de là, à la veüe de tous les Anglois, il print son chemin par les montagnes droit à l'abbaye de Meuros sur la riuere de Thuydel, sans que les ennemis montraissent vn seul signe de nous vouloir attaquer : en quoy ils faillirent lourdement : car outre les extremitez, ou (comme nous auons dit) nostre petite armée estoit reduitte, ils auoyent bonne conoissance que nous etions encloz entre eux, & le

fleuve de Thuydel, lequel estoit creu de telle inondation d'eaux, qu'il n'y auoit ordre de le passer à pié, ny à cheual. Que noz foldats Allemans & François des garnisons de Dondy, du Petit liêt, & de Dombarre ne se pouuoient affembler, ny les Escossois mettre huiët mille hommes ensemble, qu'il n'y allast plus de dix iours de tems : pendant lequel tems ils pouuoient acheuer de plus grandes entreprises, que de brusler les maisons de Gedouart, en nous poursuyuant chauldement, qui ne pouuions estre quinze cens hommes de pié, & cinq cens cheuaux prests à combattre : & donnant ordre, que deux ou trois mille hommes, quils auoyent à Edimton, à Donglas, à Emoux, & à Ladres empeschassent nostre retraite : De sorte que feussions contraints nous exposer à la fortune contre ennemis, pour lesquels l'incommodité du tems, des maladies, & du lieu auoyent entrepris de combattre. A mon iugement, que ce qui reu-doit les Capitaines Anglois plus tardifs, negligens, & moins auisez, estoit, que depuis qu'ils furent deffaits & vaincuz à Edimton, le Protecteur d'Angleterre le depeschoit avec si peu d'autorité & de pouuoir, qu'ils ne pouuoient proceder en la guerre, sinon ainsi qu'il moderoit leur commission de iour en iour : & vsoit de telle cruauté à mal traicter ceux, qui ne s'etoyent conduits & gouuernez par son commandement, comme s'ils eussent failly par dol ou fraude, ou par malicieuse machination avec les ennemis.

DES NOUVELLES ENTREPRISES, QUE DRESSERENT LES
ANGLOIS SUR LE ROYAUME D'ESCOFFE.

CHAPITRE QUATORZIESME.



Pres tant de grosses pertes les vnes sur les autres, qu'auoyent receu les Anglois, il n'est pas à croire, que leur mauuaise fortune leur augmentast la hardiesse, ayant été leur armée entierement deconfitte en bataille, & rangez à la raison autant de fois qu'ils s'etoient iettez en la campagne : mais ils auoyent pensé, que s'ils vouloyent emporter l'auantage sur les Escossois, il failloit entreprendre quelque chose par mer, sachans que pour lors l'Escosse estoit eslez mal armée de nauires de guerre, & que quatre galeres, qui y etoyent demeurées, ne pourroyent pas rompre leurs entreprises. Ainsi ayant le Protecteur vne enuie desesperée de tenter la fortune, apres que l'armée, qu'il auoit enuoyée pour nous faire abandonner Gedouart, se fut retirée en Angleterre sans rien faire, il dressa nouuelles entreprises sur l'Escosse, & de fait y enuoya de rechef vn equippage de vingt cinq vaisseaux de guerre, du nombre desquels etoyent les Roberges du Roy d'Angleterre, & quelques grandes hourques de Flandres, lesquelles portoyent toutes fortes de munitions d'arnes, & de viures. L'endroit, ou ils feirent leur premier essay, fut l'Isle des Magots, ainsi appellée pour quelques gros oiseaux blancs, semblables à oyes faunages, qui y font leurs nids, desquels les Escossois comptent pour chose vraye, que cent ou fix vingts mortepayes, qui sont ordinairement à la garde du chasteau de Bas, qui est dans l'enceinte de l'isle, ne viuent le plus du

tems d'autre chose, que du poisson qui y est apporté chacun iour par ces oiseaux & ne brulent d'autre boys, que de celuy que ces oyseaux apportent au printems pour dresser leurs nids, qui leur peut suffire pour vn an entier. L'affiette du chasteau est telle : l'Isle, ou est le chasteau assis, est vn rocher inexpugnable, de petite etendue, qui est taillé par nature comme en figure Ouale, & n'a qu'une seule auenuë, qui est du costé du chasteau, fort difficile & penible, d'autant qu'on n'y peut aborder qu'avec bien petits bastemens, & l'un apres l'autre : etant le rocher tout environné d'escueils couverts de mer, qu'autres qu'eux mesmes ne sauroient euer : Et l'Isle si fiere & inegale, qu'il n'y a lieu iusqu'à la muraille du chasteau, ou on peut assieoir le pié plainement : de sorte (comme ie l'ay souuent veu) que les ministres des affaires du Capitaine, quand ils y veulent entrer, faut qu'on leur iette vn gros cable, duquel ils s'aident en montant, & paruenus qu'ils sont à toute pene au pié de la muraille, on leur descend vne grande corbeille, dans laquelle ils sont tirez à mont : & n'y a autre moyen d'entrer en ce chasteau. Il y faisoit auoir vne poterne, qui faisoit l'entrée plus facile : mais elle est auioird'hui terrassée & remparée en maniere incroyable, & le reste du chasteau edifié tellement, qu'il semble estre dressé à plomb.


Voila l'endroit, auquel les Anglois voloyent heurter leurs forces : mais quand ils eurent cogneu, que la place n'estoit prenable, & que la vehemence des vents tempetoit leurs vaisseaux iusques à faire arer les anches en peril de toucher à terre, (car on n'y sauroit estre à l'abry de quelque vent que cefoit) conoissans de quelle importance leur pouuoit estre ce fort pour empescher la nauigation des pays estranges en Escosse, auiserent de tenter d'autres moyens, & conclurent d'enuoyer vn homme de iugement reconoitre la place de plus pres, sous vmbre de vouloir parlementer à ceux de dedans. Pour ce faire fut esleu vn Capitaine Anglois, homme qu'ils auoyent en grande reputation : lequel en acoutrement de trompette, etant mis dans vne frigate, fit d'assez loing signe de vouloir parlemen-

ter : & venu qu'il fut iufqu'au pié de l'ifle, requift que par courtoifie on le feit parler au Capitaine du chafteau : auquel fut refpondu, qu'il ne fe pouuoit faire, mais qu'il dit franchement fa charge, & que tel estoit en la compagnie, qui en feroit le raport au Capitaine. Alors l'Anglois demanda f'ils voudroyent receuoir vn Capitaine de l'armée, pour traiter amiablement avec eux de chofe, qui leur feroit grandement vtile & profitable. Luy etant refpondu que non, il commença à vouloir perfuader plusieurs chofes, par lefquelles il cuydoit mieux venir à fes fins, defquelles cete cy eft vne des principales. Que combien que l'ifle ne fut tenable contre les forces des Anglois, qui auoyent acheué maintes fois de plus hautes entreprifes, toutesfois voulans plus toft chercher l'amitié des Efcossois, que leur ruine, le chef de leur armée offroit de bailler comptant au Capitaine cinq mille nobles, & aux foldats, qui etoyent dedans, à chacun trois cens, & leur faire encor obtenir du Roy d'Angleterre autres plus grandes dignitez, f'ils vouloyent liurer la place en fes mains. Le Capitaine du chafteau, qui estoit lá prefent (homme fage & loyal) ne vult permettre que l'Anglois s'etendit plus auant en paroles. Mais, comme en se mocquant de fes belles offres, luy dit : " Je n'ay pas trouué ef-
" trange, que (felon le naturel des Anglois) tu ayes parlé en termes pre-
" fumptueux : mais ie n'auoys encor peu croire, que les Capitaines
" d'Angleterre fuffent fi groffes beftes, que de penfer, qu'en lieu, qui
" n'est acceffible qu'aux oifeaux, peuft monter vn homme chargé de fi
" grande quantité d'or, que tu dis : lequel, d'autant qu'il vous viendra
" mieux à propos pour vous deffendre du Roy de France, voftre maiftre
" ordinaire, qu'à nous autres, qui fommes coutumiers de viure des pro-
" uifions de noz oifeaux : ie ferois bien marry d'accepter. Et te depef-
" ches de leur aller porter cete refponfe, ou ie t'enuoyray bien toft à tous
" les diables." Ce furent les paroles que le Capitaine de l'ifle des Ma-
gots, Efcossois, donna pour toute refponfe à l'Anglois, qui estoit enuoyé pour le corrompre par dons & promeffes, commandant qu'on luy tiraft :

ce qu'on fit : & luy paſſerent ſept ou huit mouſquetades pres des oreilles, auant qu'il peuſt auoir gagné quelques nauires, qui auoyent été enuoyées à cete entrepriſe, leſquelles peu d'heures apres leuerent leurs anchres, & firent voile à leur groſſe flotte.

CONTINVATION DES ENTREPRISES DE L'ARMÉE D'ANGLE-
TERRE. ET BREFUE DESCRIPTION DE L'ISLE DE MAY.

CHAPITRE QUINZIESME.

 Ay voulu diſcourir ſur ces particularitez, tant pour informer ceux, qui ne le ſçauent, des ſimulations, & des fraudes dont on ſ'ay de au maniment des armes, comme pour ramanteuoir de quelles pratiques ſe ſeruent ordinairement les Anglois à la conqueſte des places, ou des eſtats qui leur importent de quelque choſe. Or auoyent ils vne autre entrepriſe en main, & en plus de recommandation, que celle de l'iſle aux Magots, comme ie le ſeray veoir au diſcours de leurs entrepriſes. Etais doncques hors d'eſperance de profiter en cet endroit, ils ſe tindrent le reſte du iour cachez à l'abry de l'iſle de May : qui eſt vne iſle de beaucoup plus grande eſtenduë, que l'iſle Dieu, accommodée de belles fontaines, de minieres de charbon & de pierre, & de fort bons paturages. Et puis qu'il vient à propos, ie croy qu'il ne meſſiera point de dire, que cete iſle ha touſiours été la retraite de tous les pyrates, qui ont cherché de nuyre aux peſcheries, trafficques, & armées des Eſcoſſois, & de leurs amis : & qu'il ſ'y pourroit dreſſer vne retraiçte aſſurée pour tout le pays, d'autant qu'il ſ'y peut à peu de deſpenſe faire vn port, pour receuoir aiſement trente ou quarante vaiſ-

seaux. Au demeurant, pour estre douée de toutes les bonnes parties que nous auons dit, & qu'il y ha lieu commode pour y dresser iardins & prairies, elle peut estre fortifiée & habitée. En ce faisant les Escossois, & les estrangers, qui traffiquent avec eux, pourront nauiguer librement, sans estre reduicts à cete contrainte d'attendre les vents propres à sortir des ports du Petit liêt, & de Brutilan, ou de la riuere de Fort : qui feroit vne commodité tant profitable, que toute l'Escoffe en vaudroit mieux.

COMME L'ARMÉE D'ANGLETERRE ENTRA DANS LA RIUIERE
DE FORT. ET COMME LES ANGLOIS S'EMPARERENT DE
L'ISLE DIEU.

CHAPITRE SEIZIESME.



Fin que reprenions le propos, qu'auions entrelaissé, pour discourir sur les circonstances de l'isle de May : les Anglois, qui voloyent conduire leur menée le plus secretement qu'il leur seroit possible, demurerent longuement à l'abry de l'isle de May : car ils craignoyent beaucoup d'estre decouverts, & que les François assauantez de leur intention, se jettassent dans l'isle Dieu, pour les preuenir & rendre vains les effectés de leur voyage. On peut estre qu'ils se promettoient, que par cete maniere de proceder ils viendroyent à surprendre quatre galeres de France, etans en Escoffe, lesquelles etoyent quelques fois à l'anchre à la rade du Petit liêt, & souuent à l'abry de l'isle Dieu, attendans occasion de s'employer. Mais quand ils virent, que le soleil se perdit de veüë, ils reprindrent leur route, & auant

qu'on sceut à Edimbourg que les Anglois eussent armée en mer, ils se faïfrent de quatre nauires de marchans Escossois & François. Et le lendemain à l'aube du iour comparurent deuant le Petit liêt avec vingt & neuf vaisseaux, faïfans vne grand fanfare, & hazardans cinq ou six de leurs floins, iusqu'à l'auancer à la portée d'une couleurine, pour tirer à coups perduz dans le Petit liêt : brauerie, qui leur demeroit inutile : parce qu'étant la mire beaucoup plus basse que le plant de la ville, à pene qu'un double canon eust peu donner iusqu'aux leuées de terre, qui la remparoyent. Ce pendant descendoyent gens en l'isle des autres nauires, & à l'heure de plene mer remerquerent, le plus pres qu'ils peurent, vne grande hourque de Flandres, ou etoyent les prouisions, à fin qu'elle s'eschouast, quand la marée s'en iroit, & qu'en cete maniere elle accommodast ceux qu'ils auoyent laissez dans l'isle, iusqu'à ce qu'ils eussent proueu d'autre lieu, pour retirer à couuert leurs viures & munitions de guerre. Monsieur de Dessé, qui auoit son logis au Petit liêt, fit auancer trois canons, lesquels il feit atiltrer sur les floins des ennemis, & les contraignit de se retirer aux autres nauires de leur flotte. Iugeant de prime face monsieur de Dessé, que cete armée n'estoit là pour autre chose, que pour faire descente en l'isle Dieu, & pour s'en emparer. “ Les Anglois (dist il) se fient en vne chose, qui les pourra legerement deceuoir, s'ils estiment, que nous, qui les auons nagueres batuz en leurs maisons, ne les puissions par force ietter hors de la nostre.”

Apophthegme
de monsieur
de Dessé.

Dix ou douze iours demeura l'armée des Anglois à la rade du Petit liêt, pendant lesquels ils descendoyent vne nuit en la plage de Berladé quelques munitions pour Edimton, & auoyent mis ingenieurs, pionniers, & gens de pene dans l'isle, pour commencer la fortification avec grand diligence, & quatre enseignes Angloises, & vne d'Italiens gens de pié, pour s'employer à la besongne, & s'y accommoder de bonne heure de logis & de defenses. Or se faïfoient ces choses au moys de Iuin, saison belle & aisée pour l'exécution de telles entreprises : & étant l'air serain,

& la mer calme & tranquille, on pouuoit aucunement veoir du Petit liêt ce remuëment de terre & appareil de fortification. Parquoy ayant fait monsieur de Dessê vn conseil sur toutes ces choses, ayant eu sur ce le sage aduis & deliberation de la Reyne, conclud de temporiser iusqu'à ce que les nauires Angloises eussent fait voile. Car de grande experience qu'il estoit au fait de la guerre, puis que la necessité ne les contraignoit encores, il ne pensoit deuoir permettre si grande entrepriſe avec tel defauantage, & si peu d'esperance de victoire: n'estant raisonnable, que quatre galeres l'attaquassent avec vingtcinq grands vaisseaux de guerre, & encor moins soixante ou quatre vingts petits bateaux de pescheurs, qu'on pouuoit faire venir d'Estrelin & de la riuere de Fort, qui estoit tout le moyen qu'on auoit pour lors d'entrer en mer. Mais quand la defense du lieu seroit reduitte aux mains, quoy que soit, quand l'isle (quelque artillerie qu'on y peust laisser) n'auroit autre defense que d'hommes, aucune chose n'empecheroit, qu'on ne les peust aller trouuer, avec bonne esperance de vaincre, & faire sentir & iuger aux Anglois, " Que c'est vn dommage
" plus reprochable de perdre vne place, qu'on ha fortifiée, & laquelle on
" fait estat de garder & defendre avec toute sa force, que n'est l'honneur
" auantageux de l'estre emparé d'un lieu abandonné, & laissé en proye à
" chacun, comme chose dequoy on ne tient compte."

DESCRIPTION DE L'ISLE DIEU.

CHAPITRE DIXSEPTIESME.



L'Isle Dieu ha été nommée de ce nom par la Reyne douairiere, le iour qu'elle fut recouuerte sur les Anglois : car au parauant les François l'appelloyent l'isle aux cheuaux : car elle n'auoit iamais été habitée, comme vn lieu dequoy on ne tenoit compte. Toutesfois elle est fort auantageuse de sa nature, & d'assez bonne grandeur pour s'y accommoder & fortifier, d'autant qu'elle est bien proueuë d'eau douce, & de lieux propres à faire iardins & prairies, & d'endroits à dresser bon ports & salines. Et pour les commoditez des minieres de charbon, & des pierrieres qui s'y trouuent abondamment, on y peut à peu de fraiz faire de la chaulx & bastir de grosse maçonnerie, tant pour se fortifier, que pour loger les habitans. Elle est située au milieu de la riuere de Fort, qui est de cinq lieuës de largeur, & en telle oportunité de lieu, qu'elle donne, ou deffend l'entrée à ceux qui veulent nauiguer de la meilleure Escosse en France. Elle est de difficile acces, & tant forte de sa nature, qu'il ne s'y treuve que trois lieux oportuns à la descente, esquels la mer, qui entre dans la riuere de Fort, n'ha qu'un pié, & pié & demy de profond : dont il auient qu'estant ces auenuës empeschées descueils, que la mer laisse descouuerts en tout tems, on ne peut aborder a l'isle auec quelques vaisseaux que ce vueille, mais est force qu'on descende sur ses roches, & que saillant de l'une à l'autre on gagne terre par ce moyen, si on ne se veult ietter en la mer, en quoy y ha danger de tumber es fosses etroittes & profondes, lesquelles se trenuent à deux & à trois toises de l'isle entre ces escueils, si le pié fault à

choisir ceux que la mer couure ordinairement. De tous les autres costez le Roc ha fait vn grand precipice, fors de la part de l'occident : ou la roche est coupée par nature de plus de vingt toises de haulteur, par tous lesquels la descente est impossible. Ainsy est l'isle tresforte, & bien assise. Car outre ces difficultez qu'auons dit, les chemins, qui menent à la riue de l'isle, sont tant etroicts, tortuz, & penibles, qu'à grand difficulté y pourroyent aller trois hommes de front : tous lesquels sont commandez de la cime, sur laquelle les Anglois auoyent assis & construiët leur fort en forme quarrée, & rendu en defenſe en moins de quinze iours.

DE LA VENUE DE MONSIEUR DE TERMES EN ESCOSSE.

CHAPITRE DIXHUITIESME.



Eu au parauant que l'armée de mer des Anglois entraſt dans la riuiere de Fort, la Reyne auoit eu nouuelles, que monſieur de Termes estoit arriué à Dombertram, avec cent hommes d'armes, deux cens cheuaux legiers, & mille hommes de pié, pour ſucceder à la charge generale de la guerre, & au pouuoir qu'auoit monſieur de Deſſé : ce qui augmenta la volonté que ce bon ſeigneur auoit de ſ'employer au recouurement de l'isle Dieu. Car ayant de ſon premier aage commencé ſa reputation par actes extraordinaires, & icelle maintenuë la part ou il ſ'etoit trouué, meſmement en Eſcoſſe, par vne grande & ſinguliere vertu, il vouloit encores “ acroiſtre ſon “ renom par cete victoire : & ne laiſſer (comme il diſoit) matiere à ſes “ ſuccedeurs de publier qu'il euſt empiré les affaires de la guerre en Eſ- “ coſſe, qu'il euſt laiſſé perdre vne choſe, qu'il n'eũſt recouuerte, ou qu'il “ n'eũſt deſpendu la vie eſſayant de la recouurer.”

COMME MONSIEVR DE LA CHAPPELLE ALLA
RECONOITRE L'ISLE DIEU.

CHAPITRE DIXNEUFIESME.



'Autre part la Reyne douairiere, conoissant combien pourroit nuire au bien, & liberté d'elle & de son Royaume, que les Anglois s'accommodassent en l'isle Dieu : avec cete souveraine prudence, & rare vertu qui l'accompagne en tous ses actes, dependoit tout le tems à maintenir monsieur de Dessé, le seigneur de la Chappelle de Biron, & les Capitaines & gentilshommes François en ce bon vouloir, de s'employer au reconuement dicelle. Mais c'étoit (comme on dit au proverbe) faire sentir les esperons au gentil cheual, qui est de son naturel vite, & prompt à la course. Et ainsi que chacun se conformoit au desir de la Reyne, elle voulut premierement enuoyer vn homme de iugement, pour reconoitre quel commencement de fortification y auoyent fait les Anglois, & combien ils pouuoient estre en nombre. Pour ce faire fut esleu le seigneur de la Chappelle de Biron, pour la grande experience, qu'il ha au fait des armes. Lequel etant porté sur vne galere du seigneur de Villegaignon, iusqu'à la portée de l'harquebuzade pres de l'isle, & pour l'empeschement des escueils, qu'auons dit l'enveloper de toutes parts, n'estant possible de l'approcher de plus pres : le seigneur de la Chappelle armé à la soldade, avec les seigneurs de Duffac, de Ferrieres, & de Guordes, & les Capitaines la Mothe Rouge & Nicolas, descendu dans la fragate du Cheualier de Villegaignon, fit tout le

tour & circuit de l'isle, terre à terre, laquelle il fcent reconoitre avec tant d'affurance & bon iugement, qu'il raporta au vray non feulement les circonftances du fort, qu'y auoyent commencé les Anglois, mais encores le nombre des enfeignes, & la qualité des gens de guerre, qui etoyent demeurez dedans.

DU BON ORDRE, QUE DONNA LA REYNE EN
L'ENTREPRISE DE L'ISLE DIEU.

CHAPITRE VINGTIESME.



Outes ces choses raportées en conseil, encores que la Reyne se ressentist en elle mesmes (comme de singulier iugement qu'elle est) de la perte qu'elle auoit faite d'un lieu de grande importance, lequel il ne seroit fort aisé de reconuer, toutesfois elle le dissimuloit, comme tresprudente. “Ainsi que les personnes heroïques & d'excellent entendement, sentent au cœur plusieurs choses, qui les passionnent, qu'ils dissimulent sagement, pour la dignité de l'honneur.” Bien remontroit elle, avec graues & courtoises paroles, combien telle expedition estoit vtile & necessaire, faisant conoitre, que ceux, qui s'y emploiroient, luy feroient fort agreable seruice. Or auoit la Reyne gagné la volonté des soldats avec telle modestie, & si vertueuse maniere de gouverner (comme les Princes doiuent tousiours faire à l'endroit de ceux qu'ils veulent quelquesfois employer en leurs affaires) qu'elle les auoit renduz tresprompts à l'exposer aux dangers pour son seruice. “Et ainsi que la vraye vertu est plus crainte & donnée, que le braue & seuer commandement,” les gens de guerre se re

iouyffoyent fort, qu'ils euſſent trouué occaſion, de montrer, que la reuerence, qu'ils portoyent à la maieſté de la Reyne, etoit encor accompagnée d'une grande & fidele volonté de luy obeyr. D'autre part les chefs & gens de bonne maiſon conoiſſans ſon deſir: “ & que l'entrepriſe eſt “ touſiours louable, dont l'entrepreneur eſt ſage & vaillant:” eux, qui auoyent ſuyuy monſieur de Deſſé en d'autres dangereuſes entrepriſes, craignoyent d'auantage que cet exploict ſ'acheuaſt ſans eux, que la Reyne ne ſouhatoit qu'ils ſ'y trouuaſſent. Ainſi ſe diuulgua l'entrepriſe d'aller veoir les Anglois de l'isle Dieu, non de ſorte toutesfois qu'on ſceuſt le iour qu'on les deuoit aſſaillir. Et cela nous aida beaucoup: parce que ſi les Anglois euſſent été auertiz de la deliberation de la Reyne, ils euſſent aiſément été ſecouruz de vingt grands nauires, qui etoyent demeurez à la rade d'Eſmons, attendans vent propre à ſuyure leur route de Calaix. Et parce qu'il vient à propos, Eſmons eſt vn chateau à deux lieuës de Berruiq en la prouince de la Marche, aſſis tant à propos ſur le bord de la mer, que les rochers inacceſſibles le deſſendent des deux coſtez: & des autres deux il eſt aiſé à eſtre mis en deſenſe, d'autant que la riuiera de Thuyd, eſt fauorable de l'un, & de l'autre il ha la plaine raſe, ou lon peut aſſeoir telles deſenſes qu'on veut: & à mon iugement, qu'il ſe doit fortifier, & qu'en ce faiſant il peut faire de grands ſeruices à la Reyne d'Eſcoſſe. Mais pour retourner à noſtre propos: Apres que meſſieurs de Deſſé, & de Termes, les ſeigneurs de la Chappelle, & de Ville-gaignon eurent donné ordre au fait de leurs charges: Et que meſſieurs de Monluc, & de Villeparesis eurent non ſeulement aidé l'entrepriſe de leur conſeil, mais encores avec vne prudente diligence, & continuël travail prouueu à recouurer humainement des Eſcoſſois tous les bateaux qui ſe peurent trouuer en la riuiera de Fort, & iceux fait entrer au haure du Petit liët: “ la Reyne, ſachant que ſe bien ſeruir du tems, & de l'oportunité fait les hommes heureux & proſperes, volut qu'on tentaſt promptement la fortune.” Et pour ce faire le iour du corps du Dieu ſa

Description
du chateau
d'Emons.

maiesté se trouua au Petit liët au point du iour, tant pour faire cesser toutes difficultez, qui pourroyent suruenir entre les soldats au choix des bateaux, que pour amonnester les gens de guerre, qui alloient en cete entreprise, de faire leur deuoir. Aufquels (ainfi qu'ils luy faisoient la reuerence pour entrer es bateaux) la Reyne disoit.

HARANGVE DE LA REYNE AUX FRANÇOIS.

CHAPITRE VINGTVNIESME.

“ **L** me semble (mes amis) que la bonté de Dieu fa-
 “ uorise grandement vostre vertu, quand vous en
 “ pouuez faire preuue en entreprise tant honorable.
 “ Et puis que la grandeur de voz courages vous ha
 “ renduz inuincibles, comme le malheur des Anglois
 “ les ha renduz lasches : ie ne fais point de doubte,
 “ que ne veniez facilement à vostre honneur de si foibles auerfaires :
 “ vous, sans alleguer autre cas, qui etes naiz & nourriz en France. Car
 “ autant de fois que vous auez attaqué les Anglois, vous en auez toufi-
 “ ours emporté le dessus par la vertu de voz armes, & par vostre bonne
 “ fortune. Continuëz donc, soldats mes amis, ie vous prie, continuëz
 “ vostre vertu : & vous souuienne que nous auons vn Dieu, qui aide à
 “ l'estat d'Escosse : ce grand Dieu, qui vous ha tirez de France, pour
 “ preferuer ce Royaume de destruction & ruine.”

CONTINUATION DE L'ENTREPRISE DE L'ISLE DIEU.

CHAPITRE VINGTDEUXIESME.



Es vertueufes paroles de la Reyne eurent telle force d'efmouuoir les foldats à fouhaiter de dependre la vie pour fon feruice, que tous d'une voix vouèrent à fa maiefté, qu'ils y vaincroient, ou mourroyent tous vaillamment. Ce ne feroit pas chofe nouuelle de veoir vn ou deux foldats de tel cœur : mais c'eft (à mon opinion) chofe eſtrange & bien rare, de trouuer cinq ou fix cens hommes tous de fi grand vertu. Non ſeulement par ceſte reſponſe, mais en la gayeté & aſſurance des cœurs qu'ils montroyent euidentement, il n'y eut homme, qui n'en conceuſt vne treſbonne eſperance. La Reyne, qui prenoit grand plaifir de les veoir en fi bonne volonté, demanda à monſieur de Deſſé (lequel, tout ioyeux, & plein d'une certaine eſperance, prenoit congé pour entrer dans ſa fragate) combien il penſoit mener de gens de guerre en ceſte entrepriſe. “ Ie ne vous ſçaurois (reſpondit il) rendre bon compte de cela, madame : mais ie ſçay bien, que ie mene de forts, bons, & vaillants hommes. Dequoy ſ'eſiouiffant la Reyne luy dit : Puis que l'eſpoir des ſages eſt peu ſouuent vain & leger, qu'elle voyoit deſia la victoire entre ſes mains : luy, qui l'auoit aſſurée & par ſes paroles, & par le bon viſage de ſes gens de guerre, que l'entrepriſe ne ſçauroit venir à mal. L'euenement de toutes chofes, madame (repliqua monſieur de Deſſé) eſt en la main de Dieu : mais ie ſuis fort certain, que ie vous rendray aujourd'huy voſtre iſle entre vos mains, ou Deſſé ne donnera iamais coup d'eſpée.” Ces paroles dites, & autres

*Apophtegmes
de monſieur
de Deſſé.*

dont ie ne puis parler à la verite, pour ne les auoir oyés, tous les bateaux feirent voile droit à l'isle : & ce pendant les galeres, dont etoyent Capitaines les feigneurs de Villegaignon, & de Seure, feirent le tour, pour empescher que les ennemis ne fortifissent de leur fort, pour nous defendre la descente, & feirent ce que gens de bien sçauoyent faire, comme personages, qu'ils sont, de fort grand suffisance & vertu. Toutesfois les ennemis, qui nous auoyent decouuerts si tost que fusmes fortiz du haure du Petit liët, ne laissoient de disposer de leurs affaires, pour nous recevoir : & ayans veu que (nonobstant vne bourrasque, qui s'estoit leuée sur la mer) avec diligence merueilleuse nous les approchions à pleines voiles, ils enuoyerent leurs harquebouziers Italiens, & quelques archiers Anglois, pour nous empescher la descente, faisans deux troupes de leurs bandes Angloises : l'une, dans l'enceinte du fort qu'ils auoyent commencé : & l'autre, au de hors : à quarante pas l'une de l'autre, à ce que nous pouuions iuger de noz bateaux. L'enseigne des Italiens s'estoit rangée à part du costé de leuant, ou la poincte de l'isle se baïsse quelque peu vers la mer : endroit, qu'ils auoyent laissé le dernier à fortifier, pour l'opinion qu'ils auoyent, que cete partie de l'isle estoit inaccessible. Ce pendant monsieur de Dessé alloit cottoyant la meilleur part des bateaux, & disoit aux gens de guerre, qui etoyent dedans.

HARANGVE DE MONSIEUR DE DESSÉ AUX SOLDATS DE FRANCE.

CHAPITRE VINGTTROISIESME.



“ Oicy l'endroit, foldats, ou le hardy & le couart fe-
 “ ront recompensez chacun selon leurs merites.
 “ Mais si la hauteur de cete ille, & l'auantage
 “ qu'ont les Anglois sur nous ont aucunent refroidy
 “ la furie Françoisse, fuyuez, fuyuez seulement ce-
 “ luy, lequel avec souveraine gloire, vous ha d'au-
 “ tresfois guidez en plus dangereuses entreprises, & vous estimerez avec
 “ moy, quand les hommes combatent vaillamment, qu'il ne fault iamais
 “ regarder au lieu du combat.”

DISCOVRS DES COMBATS, QU'ILS FIRENT À LA DESCENTE DE L'ISLE.

CHAPITRE VINGTQUATRIESME.



L volut passer outre, quand avec dix ou douze petits
 bateaux, qui le cotoyoyent, il se trouua au deffoubs
 des ennemis, qui luy iettoient telle quantité de
 grosses pierres, & luy tiroient tant de flefachades,
 que tout le bateau en estoit plein : & alors il laissa
 les paroles pour s'employer à l'effect : car, ainsi

qu'aux combats de terre, il vouloit encor estre des premiers à l'attaquer aux ennemis : & à ceste fin il auoit poulsé sa fragatte vers l'endroit, ou nous auons dit estre les escueils qu'on veoid descouuerts en tems de basse mer : qui le detint plus que la grandeur de son courage ne pouuoit permettre. Et ce pendant le seigneur de la Chappelle, avec quelques gentilshommes, aborda à la poincte de l'isle, ou il gagna sur les Italiens l'auantage d'une roche, que la mer auoit laissée descouuerte, & de là leur donna tant d'affaires, que les soldats de trois ou quatre bateaux, qui le suyuoient de pres, eurent grand loisir de descendre en terre, d'où ils rembarrerent les Italiens iusques sur le plus hault de l'isle. Et presque en mesme tems monsieur de Delfé, & huit ou dix Capitaines gagnerent terre. Mais ce fut en tel lieu, qu'ayans fait retirer ceux, qui s'etoient efforcez de leur empescher la descente, ils demurerent au pendant d'un coutault, qu'il falloit aller cotoyent à bien grand pene plus de quarante pas, auant que trouuer lieu pour monter à la cime de l'isle, ou s'etoient rendues toutes les bandes Angloises & les Italiens : car le seigneur de la Chappelle auoit brauement repoulsé ceux qui s'etoient auancez pour luy faire teste. Mais ainsi qu'étant bien suyuy des siens il gaignoit tousiours pays dans l'isle, facilitant à son pouuoir la descente des Allemans, qui s'etoient adressez la part ou il estoit : Il receut une harquebouzade, qui luy perça la rudelle d'acier, & la main gauche, & luy enfonça encor sa bourguignotte fort profond dans la teste. En quoy il donna tesmoignage d'une grande magnanimité & vertu : car comme ses amis le virent couuert de sang, & (ainsi qu'ils estimoient) en danger de mort, ils s'efforcerent de le retirer du combat. "Le vous pry, mes amis (leur dist il, " avec assuré & ioyeux visage) puis que ie ne saurois reseruer ma mort à " un plus grand honneur, que ne m'ostiez le bien de vous accompagner " à vaincre, ou mourir vaillamment."

Mais ainsi qu'il s'efforçoit de vaincre en soy mesmes l'imperfection du corps humain, l'excès du travail, croissant d'heure en autre plus excessiue

effufion de fang, encor que de cœur il fust inuincible, fon corps deffailloit fous le faix : parquoy fes amis le retirerent à toute force en vne galere, & fit on venir le chirurgien. Quoy faifant i'ay fceu depuis qu'il dift :
 “ O fortune, tu es trop cruellement iniufte, que du mefmes coup, par lequel tu defrobes le falaire de l'homme de bien, tu ne t'efforces encores
 “ de luy ofter la vie.”

Apophtegme
 du feigneur
 de la Chap-
 pelle de Biron.

CONTINVATION DV COMBAT.

CHAPITRE VINGTCINQIESME.



“ **I** E croy qu'entre toutes les autres chofes dont on
 “ fait plus d'eftime, faire peu de cas de la vie, foit
 “ le plus certain eguillon pour hardiment entre-
 “ prendre.” Les Anglois, outre le grand auantage
 qu'ils auoyent fur nous par la faueur d'un lieu
 inaccessible & fortifié curieufement, etoyent en
 plus grand nombre dans l'ifle, que nous n'etions à les affaillir, laffez de
 la mer, & du penible trauail de la defcente. Et eft chofe coneuë de
 mille perfonnes qui vivent, en quelle grandeur de courage ils defendirent
 longuement leur ifle, à l'encontre des gens de guerre Allemans & Fran-
 çois : & en quelle obftination, eux, qui combatoyent pour leur Roy, pour
 leur facultez, & pour leur vie, ils s'expoferent à tous dangiers pour nous
 repouffer, tant à la defcente, qu'apres qu'eufmes mis pié en terre. Mais
 ils auoyent à faire à perfonnes ayans en fi grands mefpris le terme de la
 mort, & qui etoyent guidez par Capitaines tant magnanimes, encores
 que les Anglois euflent la hardieffe de les attendre, qu'ils deffailloyent
 fous la force de les fouftenir. Ils auoyent entre eux vn Capitaine Ita-

lien, homme que le Roy d'Angleterre auoit en grand pris, & estimé, pour la conoissance qu'il auoit du fait des armes, lequel d'un lieu auantageux, qu'il auoit sceu choisir en homme de guerre, trouuoit mille moyens de nous endommager de hault en bas. Cetuy cy comme il faisoit tirer aux vns & aux autres, & que luy mesmes bracquoit, & mettoit feu es pieces avec vne fort grand diligence, recent vne canonade partant d'une de noz galeres, qui luy emporta la teste. Il auoit eu en sa vie (comme me dirent quelques prisonniers Italiens) l'entiere conoissance des Mathematicques. Et luy, qui aux Princes annonçoit les fortunes bonnes ou mauuaises qui leur deuoyent auenir, s'estoit promis toute prosperité en l'isle de la grand Bretagne, & qu'il ne pouuoit mourir, qu'en Italie :

Vn docte gentilhomme
Vendomois.

“ Chetif, qui n'auoit deuinée,
“ A son befoing, sa destinée.”

DE QUELQUES COMBATS PARTICULIERS EN LA FURIE DE L'ASSAULT.

CHAPITRE VINGTSIXIESME.



Oyla comme les hommes s'employent à la besongne, & la fortune iuge. Tant que l'auantage dura aux Anglois, ils empêcherent le passage. Mais quand ils s'apperceurent, que par vn grand circuit, & non par les chemins plus estroits & difficiles, nous venions à gagner l'endroit, ou l'isle s'étend en vne longue plaine, ils se ferrerent en vn troupeau, comme moutons. Ce que voyant vn Anglois d'entr'eux, pensant les animer à faire leur deuoir,

l'auança avec vne enſeigne au poing pour nous faire vne cargue : mais pour estre mal ſuyuy des ſiens, fut contraint de ſe retirer à ſa troppe, qu'il commença à blaſmer avec paroles de grand cholere : puis comme il couroit droit à nous, il receut en la teſte vne harquebouzade, qui le ietta mort par terre : ou luy fut arrachée d'entre les mains l'enſeigne qu'il portoit, laquelle fut arborée avec grands criz & ſignes de victoire. Et nous trouuans alors enuiron deux cens enſemble, fiſmes vne charge aux ennemis, leſquels en ſe retirant nous ſouſtindrent de ſorte, que ne pouuions entrer ſur eux, qu'à coups d'harquebouzades. En cet endroit ie vy deux pauvres ſoldats, l'un natif de Sens, & l'autre d'Arles en Prouence, monſtrer tels ſignes de leurs vertuz, que ſ'ils euſſent été de bonne maiſon, ou portez de quelque grand ſeigneur, ils euſſent du moins eu des l'heure deux compagnies de gens de pié, en recompenſe du ſeruice qu'ils firent ce iour. “ Mais que nuyt d'eſtre yſſu de pauvre maiſon, ſi on eſt “ orné de conditions vertueuſes ? Car il eſt plus raiſonnable que l'homme ſe face honneur par ſes vertuz & propres bontez, que par les faueurs “ de fortune.” I'en conueuz d'autres, qu'on tenoit en fort bonne reputation, leſquels auoyent plus grand ſoing de paroître gens de bien, que de l'etre : du nombre de ceux (à mon iugement) leſquels accoutumez ſeulement à eſcrimer ſur le paué d'une ville, depuis qu'ils ſont chargez d'armes, & qu'ils ont en teſte gens armez, perdent entierement le cœur. Mais il y en auoit ſi peu de ceux cy, que les autres autant gens de bien & entiers, qu'il en fut oncques, recullerent les plus auancez des ennemis iuſques à leur ſeconde troppe. Ou le General des Anglois (comme vaillant & aſſeuré, qu'il estoit) ainſi qu'incitant les ſiens au combat, il ſ'eſbranloit pour nous faire vne charge, fut luy meſmes, & ſon petit bataillon chargé de tant de harquebouzades, qu'il ſe veid en peu d'heure enuironné de corps morts : qui le reduiët à telle deſeſperade, que baiſſant la teſte il entra plus auant au combat, qu'il n'auoit point encores fait. Et l'adreſſant la part ou etoyent noz enſeignes, vn gentilhomme, nommé Deſboryes, qui

portoit l'enfeigne coronalle du feigneur de la Chappelle, se volut attaquer à luy à coups d'espée: mais le General l'aidant de son auantage, luy ietta vn si grand coup de picque en la gorge, qu'il le tumba par terre: ou bien peu apres son ame, desirant la participation des allegresses de la vie immortelle, departit de ce monde, faisant permutation d'vn grand mal à vn grand bien. “ Car l'infelicité de la vie humaine est telle, qu'on “ la doit mettre au ranc des choses de nul pris, & estime.”

COMME ON EMPORTA L'ISLE DIEU SUR LES ANGLOIS.

CHAPITRE VINGTSEPTIESME.



Insi avec grand resistance & difficulté tous noz gens de guerre descendirent en terre. Mais quand le combat fut attaqué dans l'isle, & que monsieur de Dessé & ses soldats furent venuz aux mains avec les ennemis: eux ia d'ailleurs espouventez quand ils virent meurdrir de coups deuant leurs yeux leur General, celuy, qui auoit nagueres fait morir Desboryes, s'espouventerent de forte, qu'ils ne faisoient plus de teste, mais en desordre gagnerent vne poincte de l'isle, ou ils furent tous pris comme moutons. Je ne veux icy ramenteuoir la peur, que les Anglois eurent de la mort. “ Car “ i'estime que la crainte d'autrui (pour estre vne chose tant indigne de “ l'homme de guerre) ne doibt estre mise deuant les yeux des ieunes “ hommes faisant profession de proësse & vertu.” Je diray bien, que sans auoir perdu trois hommes nous emportasmes l'isle Dieu sur les Anglois, qui estoient plus de huit cens hommes acoustumez & nourriz aux armes, qui n'etions pas sept cens à les combattre. Nous y trouuasmes

bonne quantité de groſſe & moyenne artillerie, munitions de viures, & de guerre, & de toutes fortes d'outils, & d'eſtoſſes pour ſ'y fortifier, outre vne grande hourque chargée de Maluoifie, de matras, de draps de foye, & de laine, & autres choſes neceſſaires pour habiter, & fortifier vn lieu de conſéquence, & de quoy on tient grand compte. Et en cet endroit fault que ie die, que les Anglois, entre les autres nations de la terre, ſont ceux, qui aitaillent plus curieufement vn fort qu'ils prennent en main : mais auſſi ſont ils ceux, qui les ſçauent auſſi mal garder. Monſieur de Deſſé refuſa de prendre part au butin, qu'on auoit fait en l'iſle : reſpondant à ceux, qui ſ'efforçoient de luy perſuader le contraire : “ Qu'il ne ſ'attribueroit iamais les choſes, qui deuoyent appartenir aux “ ſoldats, en recompenſe de leurs vertuz : moy meſmement (diſoit il) qui “ ne deſiray oncques de retourner en France, enrichy d'autre choſe, que “ de gloire.” Parole, à la verité, partant d'un cœur magnanime, qui ne demandoit avec l'honneur, autre ſalaire de ſa vertu.

D'VN STRATAGEME QUE VOLUT IOUËR LE CAPITAINE SAINT
ANDRE. ET COMME MONSIEUR DE DESSÉ SE MIT AU RE-
TOUR EN FRANCE.

CHAPITRE VINGTHUITIESME.



LE lendemain à l'aube du iour deux grans nauires Angloiſes, & vne roberge venans pour apporter d'autres munitions en l'iſle Dieu, ietterent vne frigate en mer, ou deſcendirent quelques ſoldats Anglois, en intention de venir en l'iſle auertir leurs compagnons de l'occafion de leur venuë : mais ainſi

qu'ils etoyent fort pres d'aborder, combien que le Capitaine saint André, qui auoit esté laiffé dans l'isle, en vſast autant accortement qu'il estoit poſſible, & qu'il euſt feinçt avec bon ordre & grande diſcretion, qu'il estoit pour les receuoir comme bons amis & compagnons, ſi eſt ce qu'ils deco-
 uirirent ſa tromperie, ie ne ſçay par quelle apparence, & à force de vo-
 guer gagnerent leurs vaiſſeaux, leſquels ſ'etoyent approchez de l'isle,
 qu'ils firent retirer haſtiuement, les ayans aſſurez que les François
 etoyent maiſtres & ſeigneurs de l'isle, qui auoit esté à eux ſeize iours.
 Ce qu'ils leur firent croire plus facilement, alors que ſaint André (qui
 auoit pour les amuſer feinçt iuſques là de donner à noz galeres) com-
 manda qu'on leur tiraſt : ce qu'on fit, en telle diligence & adreſſe, qu'à
 bien grand pene les Anglois ſe peurent eſloigner aſſez à tems. Ce iour
 meſmes la Reyne ſe feit porter dans l'isle ſur vne galere du ſeigneur de
 Villegaignon. Et apres qu'elle eut viſité le fort des Anglois, & veu de
 trois à quatre cens hommes, qui auoyent esté tuez au combat, leſquels
 etoyent encores tous eſtenduz ſur la terre, elle dit au Capitaine ſaint
 André : “ Et bien, Capitaine : feroit il maintenant auſſi aiſé à noz en-
 “ nemis de prendre cete iſle ſur nous, qu'il nous ha esté facile de l'em-
 “ porter ſur eux ? Non, pardieu, madame (reſpondit il) car voſtre iſle
 “ eſt auiourdhuy fortifiée de meilleures murailles, qu'elle n'estoit hier,
 “ etant en la garde de ces foldats, qui ſont tous hardiz & fort vaillans
 “ hommes.” Et à monsieur de Monluc, qui eſt auiourdhuy Eueſque de
 Valence, lequel (comme ſage & de ſingulier iugement, qu'il eſt) remon-
 ſtroit etre neceſſaire de continuer en toute diligence l'œuvre de la fortifi-
 cation de l'isle : “ Monsieur (luy dit il) plus nous ferons fortifiez de mu-
 “ railles, plus ferons nous inuincibles : mais ou les Anglois nous vou-
 “ droient preuenir, ces vaillans hommes (monſtrant ſes foldats) feront
 “ des rampars de leurs armes, & de la bonté de leurs courages. Outre
 “ que les louanges, qu'on donne en payement de vertu, la font croiſtre
 “ merueilleuſement : Et qu'il n'eſt rien, qui face tant aymer & reuerer

Apophtegme
 du Capitaine
 ſaint André.

Apophtegme
 du Capitaine
 ſaint André.

“ vn Capitaine de ses gens de guerre, que cete louable façon de proceder.” Le Capitaine saint André ne haultlouoit ses soldats sans propos : car ie n'en vy oncques, esquels l'argent du Roy fust mieux employé, ne qui se hazardassent plus hardiment à la guerre. Bien tost apres l'heureux achemement de cete entreprise, monsieur de Dessé se retira en France sur les galeres, accompagné de vertu & fortune, lesquelles ne se trouuent gueres de compagnie à fauoriser les hommes : & comblé de tant d'honneur & de gloire, oultre qu'on ne veid iamais autre plus heureux en l'execution des haultes & magnanimes entreprises, ne qui plus modestement aye vû de sa fortune, qu'il n'est homme viuant de ceux, qui l'ont suyuy en sa vie, qui n'affirme auoir veu tousiours en luy vne si vertueuse maniere de commander aux gens de guerre, & vne si rare vertu à entreprendre les expeditions hazardeuses, que sans exposer sa propre personne aux mesmes dangiers, il ne hazarda oncques vn seul des siens à la mercy de fortune. Combien que tous les soldats de l'armée, & tous ceux, ausquels il ha eu à commander, pour la reuerence quils luy portoyent, meslée d'amour & crainte, ayent tousiours fait d'une grand gayeté de cœur tout ce qu'ils deuoyent.

FIN.

Imprimé à Paris par Benoist Preuost, en la rue Fremetel, à l'enfeigne de l'Etoile d'or.

